

**SIXTH LEGISLATIVE ASSEMBLY OF MIZORAM  
(SEVENTH SESSION)**

**LIST OF BUSINESS**

**FOR FOURTH SITTING ON FRIDAY, THE 25<sup>TH</sup> MARCH, 2011  
(Time 10:30 AM to 1:00 PM and 2:00 PM to 4:00 PM)**

**QUESTIONS**

1. QUESTIONS entered in separate list to be asked and oral answers given.

***PRIVATE MEMBERS' BUSINESS***

2. \*Resolutions.

**S P E A K E R** : Tichuan thil tha tih i ning suh ang u; kan in thlahdah loh zawngin a hun takah chuan kan seng dawn si a. (Galatia 6:9).

Zawhna leh chhanna hun kan lo hmang ang a, zawhna 41 na kan lo la nghal ang a, zawt turin Pu Liantlinga i lo sawm ang.

**Pu K. LIANTLINGA** : Pu Speaker ka lawm e. Agriculture Minister zahawm tak ka zawhna starred question No.41 na (a) NLUP atana kan sorkar in sum a hmuh hi Prime Minister package atanga hmuh a ni em ? (b) NLUP atanhian Central sorkar hian pawisa engzatnge a rawn pek tawh ? Year wise in min hrihl thei em ? tih a ni.

**Pu H. LIANSILOVA, MINISTER** : Pu Speaker, Pu Liantlinga zawhna (a) chhanna chu Prime Minister Package anga hmuh a ni lo. (b) chhanna chu Kum 2009-2010 ah crore 100 kan hmu a, 2010-2011 chhung atan crore 234.82 ACA atangin min pe.

**Pu K. LIANTLINGA** : Pu Speaker, ka lawm e. Kum 2010-2011 ah hian cheng vaibelchhe 1700 vel kha kan plan budget niin a lang a, nikum aia tamna kha cheng vaibelchhe 250 tih a ni a. Chuti a nih chuan Plan fund atangin cheng vaibelchhe 234.82 hi sanctioned a ni em ? tih kha ka zawt duh a. Tin, kumin ah hian ACA atanga tih tur nge Plan fund atangin.

**Pu LALDUHOMA** : Pu Speaker ka lawm e. Kan hriat angin NLUP scheme ang hi India rama awmchhun leh a hmasa ber a nih avangin Central pawhin a tuipuiin mahni scheme ang hrimin Line Department 8-a Technical Committee ah te pawh close supervision te rawn neiin pawisa pawh an dah thahnem viau niin kan hria a, a hlawhtlin chuan India ram pumpuia introduce an tum a ni tih pawh ziakin kan lo hmu ve a. A hlawhtlin chuan hun kal zelah pawh chhunzawm theih turah kan ngai a, chuvangin a hlawhchham ang tih a hlauhawm khawp mai a. Calendar of Works siam a ni a, kan um pha lo viau ni tein kan hria a. Hemi hi tun atanga um phak loh a nih chuan tun Financial year-a kan pawisa lo kal leh tur pawh hi a tam thei lo ang a, a leh pekah pawh a tam thei lo ang a, keimahnin kan thawh chak loh na na na chuan.

Hemi Calendar of Works Department 8 in an siamah hian pakhat chauhan sawi ila. Industry Department hian trade chi hrang hrang atan Calendar a rawn siam ta a, chu Calendar ah chuan 1<sup>st</sup> installment hi October – December nikum kha a ni. Chu chu pek a ni tawh em? 2<sup>nd</sup> installment hi kumin January atanga March, tuna tawp tur hi a ni a, pek a ni tawh em? 3<sup>rd</sup> installment hi April – June kumin a ni a, last installment hi July – September kumin a ni. Tichuan a vaiin Rs.1,05,000/- an dawng dawn a. Khatianga Calendar fel tak siam a nih lai hian 1<sup>st</sup> leh 2<sup>nd</sup> installment ah tunah hian kan awm mek a, hemi Calendar ang hian pek a ni em? Industry Department kher lo pawh, an nih loh chuan behind schedule-a tuna kan kal a nih chuan enge nghawng a neih theih? tih leh engnge a chhan? tih ka zawt duh a ni.

**Pu LALTHANSANGA** : Pu Speaker, ka lawm e. Kan Minister khan ACA atangin tih kha a nei a. Planning Commission khan ACA leh CSS atang khan vaibelchhe 70 kha a rawn dah baw si a, khati lai kha min hrilhfhiah thei em? Hemi 234.82 crore bakah hian ACA atang khanin 70 crore vel kha ACA leh CSS atang khan NLUP a dah a ni tih kha a ni baw a. Tin, chubakah chuan trade thlan chungchangah hian Keitum ah khian puanthui thlang kha hmunphiah an pe a. Engtinngge an thawh ang tih kha khawtlang pawn an ngaihtuah a, a thawh dan tur hi an ngaihtuah thiam lova. Ram vawikhat pawh kal lo, puanthui a eizawng kha an ni a, anni'n an duh naah chuan an puan thuina kha a khawl te leh changkang deuha han upgrade kha an duh dan a ni si a. An trade thlan nen a in ang ta lo lutuk kha kan Minister zahawm tak hian engtia tih nge a tum? tih kha ka han zawt duh a ni.

**Pu H. LIANSALOVA, MINISTER** : Pu Speaker, ka lawm e. Pu Liantlinga zawhbelhna kha, hetiang hian han chhang mai ila. NLUP fund hi kan Prime Minister in min ngaihpawimawh sak avangin Planning Commission pawh ngaihpawimawh turin a hrilh a, kan House Leader te pawhin min hriattir tawh thin a; chutiang tak chuan Planning Commission ah pawh hian kan NLUP hi project hranpa angin min ngaihtuah sak zel mahse, sum inpekna erawh hi chu ACA atanga hmu kan ni, chu chu kan Plan ah pawh a lo lan dan a ni.

Tin, Pu Duhawma zawhna leh thahnemngaihna atanga a han zawh kha a lawmawm hlein ka hria a, kan duh angin kan Calendar of Works angin kan kal tha thei lova. A chhan chu kan budget neih theih dan leh kan pawisa ACA atanga lo kal, nikuma kan passed tak kha kan hre reng ang a, chuvangin kan tlai ta deuh a. Tuna kan kalpui mekah hian chak tak, fimkhur si, hmanhmawh taka kalpui a ngai ta a. Tin, Planning Commission lam pawhin kan Chief Minister te nen sawihona an neihah pawh vawikhat plan ACA atanga min pek hi kan thawh that dan azira hmuh tam a, hmuh tlem tur a ni tih pawh an hriattir avangin, kan hmalakna lang tak sia kalpui a ngai a. Chutih rual chuan ram chungah kan mite

tute pawhin NLUP kan nghahhlelh dan hi hetiang hi a nih avangin a theih chin chinah Calendar of Works thlir chungin kan theih chhung leh kan hun neih dante enin kan kal ta nawk nawk a, fel tawk lo lai pawh a awm tih kha a pawmawm khawpin ka hria.

Tin, kan member zahawm takte pawhin kan NLUP hi chu min thlirpui a ni tih kan hria a, tuna kan han kalpui mekah pawh hian kan miten tha tawka an hman theih tur si, 1<sup>st</sup> leh 2<sup>nd</sup> installment in chawhpawlh siin, tunah hian a line Department-a District Officer leh NLUP Board lamin ngun taka ngaihtuahin hetiang zat hian pe chhuak phawt mai ang tih an lo rel angin kan kal a. Chuvang chuan activity an lak dan azira pek te, a sang deuh hleka han pekte pawh a awm a ni, an trade thlan azirin. Tin, Industry bikah kan sawi ang khan thenkhatah chuan installment tih tehchiam loh deuhva kalpui tulna pawh a awm a, hei hi chu kan Line Department-a kan mithiamten mipui lam kan hlawhtlinna tur ngaihtuah chungin tunah hian an kalpui a. Agarbati te khawpui leh thingtlang khaw thenkhat tan remchang dawna hriat avang leh Taiwan lam atanga khawl te kan chah mek avangin tlemin kan hmalakna a tlai hret a, khawpuih pawh kan survey neih kha University-a Economic Department te puihnain survey te pawh kan la tha leh a, khawpui amite hi an tlai phah ta deuh a ni. Beneficiary te Bank Account hawn sak mek a ni a, peih veleh an pass book kha pek chhuah a ni ang a. Member zahawm takin a sawi kha thil dik a ni a, kan Calendar of Works hi umpha lo deuh mah ila, Department ten tan an la sauh sauh a ni tih kha ka chhan thiam dan ni mai sela.

Pathum naah chuan Pu Lalthansanga sawi ang khan ACA baka NLUP sum kan hmuhah hian crore 70 lai a awm a, an tih kha a dik a. Hei hi Central Sponsored Scheme NLUP nen converge tura remchang, Planning Commission pawhin min pawm sak te kha an ni a, chu chu Department tin khan NLUP umbrella hnuaiah a guideline ang siam remin an kalpui dawn a ni. Tin, Puanthui trade thlang si, Hmunphiah trade pek tih kha, khi laia an tih sual nge kan hre lova, talent an lo neih sa te eizawna atan sawi hovin, siam rem theih a nih ka ring. Midangah pawh tiang hi a awm nual a ni. Entirnan, Hmunphiah trade atan hian chhungkaw tam tak rawn duh leh ta an awm avangin trade thenkhata an hnawhkhah zawh sen loh tur a awm laiin Hmunphiah lamah pawh hian sang chuang fein an tam/pung dawn an tih avangin NLUP Board atangin hei hi an thlir mek a ni. Sapthei ah pawh thlan tawh sa beidawna te a lo awm vangin trade dang an duh leh ta zawk a, hengte pawh hi la adjust ngai tur a ni a. Hei hi NLUP Implementing Board District Level Committee hnenah sawiin chinfel theih mai tur a ni e. CSS guideline kha chu kan kawl bik lova, Department lam atangin lo ngaihtuah kan tum ang e.

**S P E A K E R** : Duh duh trade an thlan avanga hlawhchhamna lian pui awm tawh hriat a nih avangin kan ram mamawh leh a tih ralna pawh

awm ngei tura hriatah khan huaisen taka tih tum tih ri te kha awmin ka hria a. Kha kha clarify a va tha e.

**Pu H. LIANSILOVA, MINISTER:** Pu Speaker i sawi chhuah kha han cover vek hi a har a, activity thlan turah khan option 2 vel siam sak an ni; mahse mipuite hi NLUP ah hian an bengvar viau tawh emaw tih laiin, a tak taka han kal hian an buai leh thin a. Chuvangin option 2 an thlan turah khan an thlak leh hian min tibuai a, District thenkhat chu launching kan neih tawh hnuah pawh khan la inpeih thei lote an awm phah a ni. Chutiang chu kan khawtlaina chhan a ni a. Tuna i rawn sawi chhuah lai taka kha NLUP Implementing Board atangin market tide-up sa leh market harsa lo kan ramin potential a neih thatna leh kan kal natna tur activities te area wise-a tarlan a ni a. Kan sawi tak ang khan option 1 emaw 2 pek theuh an ni. A sum nuai 1 hi tum khata pek chhuah tur angin kan hotute zingah pawh sawi rik a awm thin a ni mai thei e. Kan Calendar of Works ah hian hetiang taka kan kal pawhin a then chu kum hnih kum thum chhunga activities an lak azira pek chhuah chauh tur a ni a, sum hi lo dawn ngawt tur a ni lova, tha tam tak seng leh a dawng tuten tha leh sum lo sen belh ve a ngaih anga insen belh a, hlawhtlinna kawng zawh theih chauh kan nih dawn avang hian kan Member te pawh hian mirethei te khai chhuahna tur kan ngaih pawimawh theuh a nih avang hian tan la tlangin inpui tlang ila. Tin, in advise leh in support-na pawh englai pawhin kan mamawh reng a ni tih ka'n sawi duh a ni. Ka lawm e.

**S P E A K E R** : Member zahawm tak, Vanlaiphai bialtuin a rawn tih kha, convergent pawh lo ni selangin sum kal vel turah khan a Approach Road compact area a lo ni a. Approach road atan kan hmang a ni emaw, khatianga sum kal vel dan kha chu kan Hon'ble Member zawng zawngte hi chu ram pumpui kan thei lo a nih pawn kan awmna bial chhung theuh tal hi chu sorkarin min hriattir ve thei sela a lawmawm khawp ang.

Tunah zawhna 42 naah kan kal ang a. A zawt turin Pu Lalthansanga i lo sawm ang.

**Pu LALTHANSANGA** : Pu Speaker, ka lawm e. Ka zawhna starred Question 42 na Power & Electricity Department changtu zahawm tak min chhan atan. (a) Mizoramah hian Energy Potential Survey hi neih a ni tawh em? Data kan neih mek hi engtika siam nge a nih? tih ka zawt e.

**S P E A K E R** : A chhang turin a changu Minister zahawm tak, Pu Lal Thanhawla I lo sawm ang.

**Pu LAL THANHAWLA, CHIEF MINISTER** : Pu Speaker, Member zahawm tak zawhna (a) Mizoramah hian Potential Survey hi neih a ni tawh em? tih kha, Power & Electricity Department in Mizoram Hydro Power Potential Survey a nei a. He Survey-a chhut dan chuan Mizoram hian Hydro Power Potential a neih chu megawatt 4500 a ni.

(b) Data kan neih mek hi engtika siam nge a nih? tih a ni a. Tuna Data kan neih mek hi kum 2009-a siam a ni, Pu Speaker.

**Pu LALTHANSANGA** : Pu Speaker, tunah hian kan Energy Potential Survey kha megawatt 4500 tih a ni a. Medium-ah leh Large-ah te pawh hian megawatt 2810, Small Hydro Power ah hian megawatt 90. Khatiang khan a hrang hrangah thli atang te, Bio-gas atang te, solar atangte khan a ni a. Tuna kan neih khan Scientific data a ni em? A rintlak tak tak em? tih lai kha ka'n zawt chiang duh bawk a. Hemi hi Scientific Data ni lova keimahnin mithiam leh enggemaw bik te ina an tih a nih loh kha chuan a rintlak loh in a rinawm a. Enggemaw rinthu leh tih vel te hian kan ti a. Thli atanga power generate tur kan tih te pawh hian a thli awmdan leh an tih danah khan a khawl han set-up te kha a fuh loh avangin kan fail tak hlawm nual avang khan. Scientific Data hi nei thei tur hian sorkar hian hma lak a tum em? tih kha ka zawh belh a ni.

**Pu LALDUHOMA** : Pu Speaker, tuna kan ngaihthlak kha Hydro chauh niin a lang a. Windmill lampang, thli chakna hmanga potentiality kan neih hi eng ang chiahin nge data collect fel ve a ni tawh em? Heta tang pawh hian enggemaw zat hi kan nei thei dawn lawm ni? Helam pang hi sorkarin a ngaihtuah em? tih leh nakin lamah chuan Thermal lamah pawh Gas te kan han neih chuan thui tak kan kal thei ang a, kha lamah te khan eng angte nge potentiality kan neih? Mumal deuh hleka data rintlak a awm tawh em? tih ka zawt e.

**Pu LAL THANHAWLA, CHIEF MINISTER:** Pu Speaker, tunah megawatt 4500 vel hi a ni kan tih kha, a survey dan chu a scientific leh scientific loh chu ka hrethiam ve lova. Amaherawhchu, kan engineer ten on-the-spot survey an conduct atanga tih a ni a. Tin, a accurate leh accurate loh chu sawi a har viau ang a. A chhan chu heng survey hi a terrain avang te, engineer indaih loh avang

te, tin, fur, sik leh sa, ruahtui avang te pawhin duh ang thala tih theih loh chin a awm a. Mahse hemi hydro, a lui atang ringawta survey hi chu 4500 vel potential awma hriat a ni. Tin, hetah hian wind energy te, solar energy te leh Oil & Natural gas atanga awm thei ang chi kha a tel rih lova. Wind energy hi kan hun hmasa khan kan ti chhin a. Mahse, khatih laia technology kha a la hlui deuh hlek a. Holland vela an hman ang, a thla hlai pui pui chi kha a ni a, Sairep ah te leh hmun hrang hrangah. A tirah chuan a tha khawp a, mahse kan ram thlipui, thli constant lo lutuk hi a ngam lova, a chhe ta hlawm a. Tunah hian technology thar tha tak tak a awm a. Chungte chu hman ve dan a awm em ? tiin wind mapping tih tum mek a ni a. Tin, solar energy lam atang pawhin tih tumna a awm a. Ministry of Non-conventional sources of energy angte pawh hian Aizawl city pawh hi Solar City atan min puan sak a. DPR leh a concept paper buatsaihna ah khan tlemin hun kan duh deuh a. Tunah chuan an peih thawkhat tawh a. Chu chu a tlangpuiin Survey leh khatiang ang chungchangah chuan a ni.

Tin, tunah hian ADB kan han dawr leh Planning Commission te pawh hian sum kan neih loh avang leh anni pawn an duh thala min pek theih loh avangin, tin, kan mamawh a tam si a. PPP Mode-a kal turin min advise tlangpui a. Tin, a then te phei chu kan mamawh si avang leh a tul si avangin PPP deuha kan kal te pawh a la ngai mai thei a. Chutiang chuan tunah hian hma lak mek a ni. Kan hriat theuh tawh angin megawatt 460 pe chhuak thei tur, Chhimtuipui, Kawlchaw chhakah khuah tur saw NTPC hnena pek a ni a. Chu chu thawk tan tawh tura beisei an ni a. A tira an han tih tan dawn khan DPR buatsaihna kha a lo rei deuh tawh a, revise a ngai a. Tin, eng eng emaw, technical mistake te a lo awm a. Chuvang chuan hun a duh rei deuh a. Tin, Tuirial kha kan hriat theuh angin tunah hian NEEPCO in an luhchilh leh mek a, an tan tha leh dawn a. Tin, Tuivawl megawatt 42 pe chhuak thei tur leh Tuirini megawatt 37 pe chhuak thei tur hi PPP Mode in pek a ni tawh a. Tin, Bairabi megawatt 80 pe chhuak thei tur pawh hi Kolkata Company te nen MoU signed a ni tawh a, tender koh mek tur a ni. Chu chu a hnaivai deuh a ni a, tin, hla deuhah chuan Lungreng megawatt 815 pe chhuak thei tur te, Mat Lui megawatt 76 pe chhuak thei tur te, Tlawng, megawatt 54, Tut lui megawatt 27, Chhimtuipui, megawatt 635; Ngengpui, megawatt 25; heng hi pipe line a awm mek a. Heng zinga pathum phei hi chu NEEPCO te nen MoU signed in a tul ang apiang ti tha leh tura ruahmanna siam a ni. Tin, power generation wind power-a hman ve tha a kan hriat avangin wind mapping tih mek a ni a. Tunah hian tuialhthei leh natural gas hi a tam thei ang ber tih chhuah tum a ni a. Hun remchang hmasa berah Bairabi kawng velah ONGC te hian zu hmuhpui turin min sawm mek a. Chulai chu an tan theihna hmasa ber tura an ngaih a ni a. Chutiang chuan helam atang hian engzatnge kan la hmuh theih ang ? tih hi chu Survey a la awm lo, Pu Speaker.

**S P E A K E R** : Zawhna 43 naah kan kal ang a. A zawt turin Pu Lalthansanga i lo ko ang.

**Pu LALTHANSANGA** : Pu Speaker, ka lawm e. Hei vawiin chu ka zawhna a chhuak reng mai a. A lawmawm khawp mai. Starred Question No.43 na PHE Department changtu Minister zahawm tak chhan atan – (a) Aizawl Greater Water Supply Scheme Phase II pipeline hi Rangvamual leh Phunchawng thleng chhunzawm a ni tawh em? (b) Ni se, eng hunah nge zawh a nih ang? (c) Zonal Tanky hi Sakawrtuichhunah dah a ni tawh em? tih ka zawt e.

**S P E A K E R** : Chhang turin a changtu Minister zahawm tak, Pu S. Hiato i lo sawm ang.

**Pu S. HIATO, MINISTER** : Pu Speaker, Pu Lalthansanga, Member zahawm tak zawhna (a) na chhanna chu Aizawl Greater Water Supply Scheme Phase II hi Rangvamual thleng phum zawh tawh a ni a. Ama'rawhchu, he pipeline hi a bo deuh vek tawh a ni. Phunchawng erawh hi chu Greater Aizawl Water Supply Scheme Phase II in a huam loh avangin hmalakna a la awm rih lo.

(b) na chhanna chu – a hnathawh leh dan tur hi rel fel a la ni lova. Chuvangin zawh hun tur hi a la hriat theih loh a ni.

(c) na chhanna chu – Zonal Tank hi Sakawrtuichhunah Greater Aizawl Water Supply Scheme Phase II hnuai ah chuan dah a ni lova. Mahse, a pawimawha kan hriat avangin State Plan hnuai atangin Aizawl Water Distribution Division in Sakawrtuichhun ah hian Reservoir a siam mek a. He reservoir hi 1,50,000 litres dawng thei tura ruahman a ni a. Kum 2010-2011 ah zawh tum a ni.

**S P E A K E R** : Zawh belhna, Pu Lalthansanga dawtah Pu Lalduhoma i lo sawm ang.

**Pu LALTHANSANGA** : Pu Speaker, Phunchawng kha a thleng lo dawn phawt chu a ni a. Hei hi a tir estimate ah a tel lo nge, tunah indaih loh vanga tel lo ta? tih te kha hriat a chakawm a. Phunchawngah khuan Pilot Project in kan kal a ni a. Pilot Project hnuai tui hi mi pakhatin tin hnih/khat chang turin insual deuh thaw a ngai a ni. Chuti khawp chuan khu veng khu a buaithlak a ni. Chutiang ang chu a nih avangin kan sorkar hian khu lamah khuan hma min lak sak nasa se, tih kha ka ngen duh a. Tin, hemi Zonal Tank hi tih tur ang deuh khan Unstarred Question, April 20<sup>th</sup> 2010 ah khan min chhang kha a ni a. Sakawrtuichhuna Zonal Tank dah hi 2010-2011 chhungin dah a ni ang, tih kha min chhanna a ni a. Hei, tunah khan dah tumna awm lovin reservoir, Department hran atanga dah tum ang khan UD&PA lam pang atang khan emaw an ti leh ta kha a ni a. Hei hi dah chhunzawm tumna a awm ta lo nge, pawisa awm hunah la dah tum tho a ni em? tih kha ka'n zawh belh a ni.



**Pu LALDUHOMA** : Pu Speaker, Member zahawm takin ka bial chhung min rawn vei pui a, ka lawm khawp mai. Phunchawng hi ka sawi zing tawh a. Hei, helai bial hi a thlang lam zawng khu Rural area a ni a. Phunchawng chin chhak lampang hi Municipal area a ni a. Chumi inkara Phunchawng, khu lamah scheme a tel silo, helam scheme a tel si lova, tuma ngaihsak si lohva khua ve lem dah ringawt hi dik lo ka ti, chuvangin ka sawi zing tawh a. Rangvamual atanga Phunchawng pipe a extend phehi a awl lutuk. Session hmasa lamah te pawh ka sawi tawh a. Kan Minister zahawm tak hian, “A tih dan kan ngaihtuah ang”, a ti tawh thin khan ka hria a. Tunah khan a tlan chhe leh deuh a. Hei hi chu min tih sak hram turin kan ngen nawn leh duh a.

Tin, Sakawrtuichhun-a Reservior siam khu hman zanah ka zuk en a, an lo ti nual tawh a, a rei lutuk tawh a ni, hei pawh hi kan sawina a rei tawh lutuk. Engatinge an thawh muan em em? Chuvangin tuna hun tiam kan han ngaihthlak tak chhungah khan zo ngei turin hma min lak sak thei ang em? tih ka zawt a.

Tin, chutiang bawkin Zonal Tank Seventhday tlangah a awm a. A thawktuin a thawk muang lutuk a, mi an phun nasa khawp mai. Hei pawh hi kan Minister zahawm takin min hriatpui sela, min han nawr hmanhmawh sak thei ang em? tih ka'n zawt bawk a.

Tin, tuna Tanhril leh Central Jail chawmtu Tanhrila Tanky awm sa khu a hlui kha hman a ni a. Phase II pipe a rawn lut a, Setlak atangin a rawn lut bawk a. Tun ang hunah chuan kan harsa ziah a. Setlak tui pump chhohna tur diesel pipe lines 30 lai mai nikuma an ruk kha tun thleingin siam that lohvin a la awm kum tluan a ni, tunah kan mamawh tawh. Hei pawh hi kan Minister zahawm takin min han en sak thei ang em? tih ka zawt duh nghal a. Chuti a nih loh chuan motor-in diesel phurh thlak a ngai a, motor kal theih loh chinah head load a ngai leh a. A Department tan riah chilh a an beih pawhin a hautak lutuk a ni. Khatiang kha a nih avangin Phase-II tui a lo kal tlem si a, a lo kal khat si a. Chumi belhchhah atan chuan Setlak lui khu kan duh a, University te nen kan ei tlang vek, Sakawrtuichhun thleng in. Kha kha kan Minister zahawm tak hian tun thal chhunga kan hman theih ngei turin Setlak lui pump-na pawh khu min han tih sak thei ang em? tih ka zawt e.

**S P E A K E R** : Chhang turin Minister lo sawm ang.

**Pu S. HIATO, MINISTER** : Pu Speaker, tui harsatna hi tlang hriat a ni a. Theihtawpin tan han la thin mah ilangin, tuihnar te in a daih loh chang leh khawl chhiat chang te, pipe chhiat chang te a awm thin avangin, a khaihlak nasa hle thin a, pawh kan ti viau a. Mahse Department hi chuan theihtawp chhuahin tan a la a, pipe te a changin a puak a, chhun leh zan zawmin kan nauten an

thawk thin a. Chutiang chuan theihtawp kan chhuah a ni tih kha a hmasain ka sawi duh a.

Vantlang thil leh Sorkar thil dimna chang hrelo hi kan ni tlangpuiin a lang a. Rangvamual thlenga pipe an phum pawh 2000 leh 2002 meter daih a ni a, tunah hian hmuh tur reng reng a awm tawh lo tluk a ni a, a bo vek a, chu chu khawi atangin nge a thar kan hmuh chhuah leh ang tih hi dap a ngai dawn a ni. Tin, Pu Lalduhoma hian a bial a ngaihsak a, phone te pawn min phone thin. Session hmasa lamah pawh ngaihtuah theih tura kan in ngai kha kan sum dinhmunin a daih loh avangin tun thlengin Phunchawng kha a la pek theih loh a ni. Tin, Phase-II ah khan Phunchawng hi an lo telh lova, chu chu engpawhnise Phunchawng tui lakna tur chuan kawng hrang hranga dah chu a ngai hrim hrim a. Aizawl town chhung a ni a, Municipal area te a ni bawk a, chuvang chuan theih tawpa tan lak chu kan tih turah ka ngai a ni.

Tin, Tanhril-a Setlaklui atanga tui lakna tur hi Setlaklui hi tui a tlema han pump hian reiloteah a kang zo mai a, hman deuh khan a chhia a, VC leh Unit ten an rawn report avangin kan zuk entir tawh a, a chhiatna lai pawh siamthat tawh niin ka ring a, ka zu hmu ve chiah lova. Hemi hi, helai a line kal thla tur supplement-na atan hian theih tawpa siam rem chu kan tum a ni.

Pu Speaker, a tlangpuiin tui kan harsatna chhan pakhat chu, Tlawng atanga tui kan pump chhuah, tunah hian 24 mld pump chhuak thei turin kan inruahman vek tawh a. Theihtawp chhuaha kan pump hian 24 mld pump tur chuan kan sem chhuah lam kha a chak theih loh avangin khilai Tuikhuahtlang leh Laipuitlangah hian a leng lova, a liam zel a. A chhan chu distribution system kan lo siam kha a lo tlem a, tunah hian ADB atangin SIGMU kaltlangin theihtawp chhuahin siamthat tum mek a ni a. Hemi kan siamthat hi chuan tui, tun aain hnianghnarin kan hmuh theih ka ring a. Tin, University lam a sawi pawh kha kan pek theih kan ring a. Tunah hian Durtlang te pawh.....(interruption)

**PU LALDUHOMA** : Pu Speaker, khawngaihin khatah khan Transformer dah a ni tawh a. A hman phalna Power & Electricity lam hian tun thleng hian an la pe duh lova, pe se chuan Diesel a ngai lo mai tur a ni a. Kan Minister zahawm tak hian Electric lamah khan min pe thuai teh u, han ti zauh se an pe mai awm si a.

**PU S. HIATO, MINISTER** : P & E lampang a nih chuan a Minister pawh a awm a, min hriatpui turah kan ngai a, theih tawpin kha lam kha chu tan kan lo la ang a. Tin, Pu Speaker, sawi ang khan Durtlang te, Sihphir te pawh pek tum a ni a. Tunah Pump House Bawngkawnah kan siam mek a, reiloteah khilai pek theih turin kan in ruahman a. Tin, Phase II Contractor an tawp tak hnuah khan Falkawn Referral thleng pawh tui pe thei turin pipe phum vek a ni

a, tui pawh kan pe thei tawh a ni, tih hi House ah hian ka sawi duh a ni. Ka lawm e.

**S P E A K E R** : Tunah zawhna 44 naah kan kal ang a, a zawt turin Pu K. Liantlinga i lo ko ang.

**Pu K. LIANTLINGA** : Pu Speaker, ka lawm e. School Education Minister zahawm tak ka zawhna chu hei hi a ni – (a) Education Reformed Commission Report atang hian tihhlawhtlin turin eng engachte nge hmalak a nih? (b) Voluntary Retirement Scheme ah hian zirtirtu engzatnge pension in chhuak tawh?

**S P E A K E R** : A chhang turin a changtu Minister zahawm tak Pu Lalsawta i lo ko ang.

**Pu LALSAWTA, MINISTER** : Pu Speaker, Member zahawm tak Pu K. Liantlinga zawhna (a) chhanna chu hetiang hi a ni. Education Reform Commission Report ti hlawhtling tur hian sorkar chuan chak takin hma a la mek a. Cabinet Meeting 3<sup>rd</sup> August 2010-a a neih chuan a thu phungin (in principle-in) he Reform Commission Report hi a pawm tawh a. Chubakah Education Reform Commission zir chianga tih hmasak tur leh tih hmasak ngai thliar hrang turin Group of Expert din a ni a. He Group of Expert hian kumin January 28<sup>th</sup> 2011 khan Mizoram sorkar hnenah an zir chianna Report a theh lut a, hei hi Department lamin an bawhzui mek a ni, tih a ni a. (b) chhanna chu - Voluntary Retirement Scheme ah hian zirtirtu 193 pension phalsak an ni tih a ni.

**Pu K. LIANTLINGA** : Pu Speaker, ka lawm e. Ka han zawhbelh duhna chu tunah hian School hrang hrangah (Plus + 2) teacher ten hlawh an la lo niin a lang a, ka hriat sual loh chuan, engchen nge hlawh an lak loh tih leh engtikah nge pek an nih ang? tih kha ka zawhbelhna ni sela.

Tin, a pahnihnaah chuan Central atanga Polytechnic Institution din tura hmalakna kha engchen nge hmalak a nih tawh? tih a ni a.

Tin, pakhat lehah chuan Zoram College te hi Semester System-a kal tumna a awm em ? A awm a nih chuan engangin nge hmalak a nih tawh ? tih te kha a ni e.

**Pu B. LALTHLENGLIANA** : Pu Speaker, Minister zahawm takin Cabinet meeting-in 'Education Reform Commission Report hi in principle-in a pawm' a tih lai kha, in principle a pawm kha ka hrethiam lo a, Commission Report a kha a pumpuiin an pawm nge ni, a pawimawh lai kha an pawm nge ? Cabinet meeting-in a principle-in a pawm, tih hi ka hriat ngai loh a ni a. Chuvangin a principle a pawm tih lai tak kha min han hrilhfiah se ka duh a.

Tin, pahnihnaah chuan Voluntary Retirement Scheme tih kha, nimin-a ka zawhna nen khan thuhmun turah ka ngai a. Niminah khan application kha a vaiin za sawmkua leh tih kha tihfel tawh a ni, tih kan hmu a, chuta tang chuan za sawmruk leh tih kha tihfel tawh a ni, tih a ni a. A tawp ber naah khan za leh sawmriat leh tih in a rawn pung leh a, vawiinah, a tukah zawhna a lo kal leh a, za sawmkua pathum tihfel tawh a ni, tih a ni leh a. Nimin leh vawiin inkarah khan applicants zawng zawng kha tihfel tawh a ni em ? Tin, nimina ka zawhna leh vawiina ka zawhna hi a danglam em ni ? tih kha ka zawt duh a.

**S P E A K E R** : Chhang turin Minister i lo ko ang.

**Pu LALSAWTA, MINISTER:** Pu Speaker, zawhna neitu, MLA zahawm tak, Pu K. Liantlinga zawhbelhna kha, Plus-2 zirtirtu hlawh lalo chungchang hi, an lak theih ngeina turin hma kan la a. Tunah hian an lak loh nachhan hi kan hre vek a, sum harsat vang a ni a, ama'rawhchu, tun Financial year, hemi chung hi chuan kan pek hman loh pawhin April thla te chuan pek theih ngei kan in beisei a ni. Chu chu ka chhanna a ni.

Tin, Polytechnic pali kan neih tur, Mamit, Champhai, Kolasib leh Lawngtlaiah, hemi pali kan neih tur chungchangah hian tunah sanction te pawh a awm tawh a, tender te kan ko ve mek a, a hmun tur a hi chu kan tihfel vek tawh a, a sak hi kan tan thei tawh mai dawn a ni, tun atanga rei vak loah hian.

Tin, a pathumna Semester System hi College ah hian tih tum a ni em ? Engtikah nge in tih ang ? tih chungchang hi tih tum a ni a. Hei hi UGC in a rawn ken tlat a nih avangin keinin in peih lo deuh chung a tih talh kan duh a ni. Tin, a System a hi a tha bawk a, chuvang chuan tih talh kan tum a, kan la peih

lohna leh kan harsatna ang zawng zawngte hre chung hian tih hram chu kan tum a, July thla hian College ah hian Semester System hi chu tih kan tum a ni.

Tin, Member zahawm tak Pu Lalthlengliana'n a rawn zawhbelhna, 'in-principle' tih hi Cabinet hian 3.8.2010 a in pawm tawh hi in-principle tih awmzia hi a awm ngai emaw ni le, a ti a. Khalai tak kha chutiang tak chuan ka zuk hre bik miah lova, mahse han pawm duak dawn khan a vaia a nih ang anga han pawm duak dawn khan kum 5, kum 10 chhung pawha kan tih sen loh tur, a sum lam pawh lo awm teh reng se langin a hun hrim hrim hi en ila, a daih lo tur kha a nih avang khan a tha kan ti vek si a, kan pawm vek phawt a. Chu chu 'principle' ti hian kan ko ve phawt a, chumi chhung a mi chu kan sawi tawh ang khan zir chiang leh tute, expert te dinin kan tih hmasak tur pawimawh hmasa te an han chhawp chhuak a, chung chu tunah hian Department in a bawhzui char char a ni mai a. Tin, 'principle' kan han tih chu thlauhthlak nei chuang lovin kan han ti vek a, ama'rawhchu, kan tih theih tur chin leh kan phak tawk chin, a tah tawla tih dan tur atan khan a vaia tih nghal vek kan theih dawn loh avangin, 'in-principle' kan ti mai tlang niin ka hria.

**Pu B. LALTHLENGLIANA** : Pu Speaker, chuti a nih chuan in tih chawp zel kha pawm angin a kal dawn a ni maw? ka lo ngaihdanah chuan khang ang Commission Report tha takte kha chu in pawm phawt ang a, vawikhata thawh zawh theih tur a ni lo tih chu han en khan a chiang mai a, pawm tawh sa kha eng Ministry pawh lo kal sela, thawh theih chin zel kha an thawk tur nia a lan lai a, in thawh chin zel kha pawm chauh zel anga a lan chuan khatianga Education Commission Report han tih atan chuan a pamhmai deuh lawm ni? engatinge a pumpuia in pawm nghal mai loh? tih lai kha ka ngaihdanah a lo awm a.

**Pu LALSAWTA, MINISTER** : Pu Speaker, khalai kha ni e, khatianga a ngaihdan kha a awm thei tho mai a. Amaherawhchu, India ramah pawh hian 1964 a Kothari Commission an tih kha kum 2011 hian Mizoram te chu a rawn thleng ve det det a ni chauh a, a hun hi a rei a, anni pawh khan chutiang chu thlirin hun rei tak chhungte a nih avangin kan fimkhur vangte pawh a ni ang a, kan Chief Minister ina min han hruai danah, kan phak tawk ang, chu bak baka va tih chiam ang kha kan ti lo niin ka hria a. Chuvangin 'in principle' in pawm phawt ila, implementation hi chu a tul ang zelin kan ti chho ang a, a khawimah hi thlauh thlak tur a awm lo ve, tih kha kan hriatthiam ve dan tawk chuan kan han ti mai chu a ni. A pawm hi chu kan pawm hrim hrim tawh a ni, August thla ni 3 khan.

Tin, a zawhna pahnihna VRS a chhuak 193 tih kha heng in zawhna te hi a chhanna kan han buatsaih lai hian kan dinhmun kha kan hriattir lo thei lova.

Mahse thawk mek kan nih avangin nimin ah pawh kan chhanna ah kha chuan 169 tih kha 181 a lo ni leh tawh a, chuvangin 12 chauh an bang a ni tiin kan in chhang a. Vawiin ah hi chuan pahnih, pathum chu an lo ching fel leh tawh mai thei a, mahse he House zahawm tak hriatthiamna pawh kan ngen duh a, khalai tak kha, a darkar nena han in monitor kha kan tlin bik em em lova, tuna kan tlin tawkah chuan nimina kan chhannaah khan 12 tih loh hi chu 181 hi 193 atang hi chuan kan ching fel tawh a ni, tih kha ka han hriattir theih a ni.

**Pu B. LALTHLEGLIANA** : Hetiang zawhna hi Session ni tur puan atanga ni 15 hma lamah zawh tur tih kha a ni a, chumi chhungah chuan Member ten zawhna kan zawt deuh vek a, Department-in zawhna an lo chhang a, hetiang em em a figure inang lo lutuk a chhanna hi chu nimina ka zawh lai la la pawh khan a inang lova, kha kha chu an rawn pek belh che a, i chhang a, ka hrethiam a. A tukah zawhna dang a lo awm a, a chhan hun period within 15 days tih a ni a, khami chhunga khati em ema inthlau ang chi kha chu Department lam hi tlemin Member te zawhna chhannaah hian fimkhur deuh sela a thain ka hria a. Minister thiam loh pawh niin a lang lova, Department lam hi tlem chuan zawhna chhanah hian an fimkhur tawh lo niin a lang, hun kal tawh han thlir pawh hian Pu Speaker.

**Pu LALTHANSANGA** : Pu Speaker, kan Minister zahawm tak din lai hian VRS hnuai chhuak tate hi nikum October, September emaw velah khan Supreme Court khan gazette rawn chhuahin a rawn condone leh ta a, khatiang khanin anni pawh under matric leh matriculate te pawh khatiang khan a rawn ti chho leh ta a. Hetianga an rawn awm leh tak hian an rilru pawh hi a hnualin a na leh ta angreng hle mai a. Chutih lai keinin golden handshake a nihna ang khanin pawisa pawh pek nghal zel tura tih leh nawr luihna angreng Lunglei District ah te phei kha chuan an lehkha chhuah kha a na angreng hle mai a, in duh emaw duh lo emaw in chhuak dawn tho tho tih ang deuh khan leh in hmuh tur ang leh in dawn tur angte pawh in dawng lovang tih ang te; chutiang khawp chuan lehkhaah khan vauna ti mai ang, nawr luihna a na a ni a. Chu chu vawiin ni thleng hian pawisa an la hmu thei lo hi an mangang em em mai a, nu buai tak takte an ni a, mi pawisa ba ten tunah te hian an awm niin ka hria a. Nizanahte pawh hengho hi kan hnenachte pawh lo lengin an harsatna an rawn thlen a, hei hi a rang lampang deuha chinfel a, hemi scheme kan kalpui zelna turah hian midang tan pawh a he scheme hnuai han chhuah zel hi a chakawm thei awm mang e, kan ti a ni.

**S P E A K E R** : Speaker hnenah te, Minister hnenah te pawh hian sawi ve tawh thin ni sela, intanpui theih dante pawh an lo zawng ve ang chu maw le.

**Pu LALTHANSANGA** : Ni e, a that chu an rawn sawi tawh ang chu. Hei waviin hian kan sawina eng atang pawh hian an rawn thlen ang a, kan Chief Minister zahawm tak pawh hi lehkha te an pe a, kan Minister te pawh hi an hmu tawh a ni. Hemi ah hian an mangan zia an rawn thlenna hi lo chinfel sak hma theih se, tih kha kan ngen a ni.

**PU LALDUHOMA** : Pu Speaker, Driver te Golden hand-shake-in kan chhuah tir tawh a, tunah anni hi an ni leh ta a. A pawimawhna chu chhuak leh zel tur ten chhuah an chak na emaw chak loh na emaw a hril dawn avangin kan Minister zahawm tak hian a la chinfel bang a pawh hi a rang thei ang berin ‘kan rawn chingfel ang’ tiin min assure mai sela ka duh a ni. Sorkar hnaa an fate thun te pawh a tel a ni. Tin, tih luihna a chhuak tam tak an awm, vau avanga chhuak tam tak an awm. An thiante a hnuah condone an rawn ni leh si, an rilru pawh a na ani. Chuvang chuan, tuna mite tan ai mah hian a hnuah kal zel turten phur taka an chhuah zel theihna turin min assure tawp mai sela tih kha kan phut duh a ni.

**PU LALSAWTA, MINISTER** : Pu Speaker, a zawhna kha kan han sawi chhilh tak avang khan kan theihngihl tawh pawh ani maithei a. A zawhna hi Voluntary Retirement Scheme ah hian zirtirtu eng zat nge pension in chhuak tawh? tih ani a. Ka chhanna kha 193 ani a, chutah chuan chinfel tawh zat nimirah khan min zawh ah khan a hunlai a kan buatsaih in 169 ani a, mahse tunah hian an lo chingfel belh leh hlek a 181 alo ni ta a, 12 chauh hi chinfel loh a awm tawh ani tiin ka chhang a. Chu chu tukin zing a kan sawi nawn leh khan a chhuak tawh zat, pension phal sak zat a kha a ngai reng ani a, 193 kha ani reng a. Kha lampang kha kan member zahawm tak te khan an lo hriat pawlh deuh hlek pawh ani maithei a, kan chhanna hi a ngai reng a, a chinfel tawh zat lai ah khan ka han sawi belhna zat a pawh kha nimirah a 12 kha tunah phei chuan 12 ai pawhin a tlem tawh maithei mahse hei hi waviin ah chuan he House zahawm tak hi ka hriattir thei love ka ti mai a ni.

Tin, Member zahawm tak Pu Thansanga zawhna chungchang ah khan thil hi kan hria a, kan theih ang tawkin hma kan la a, harsa em em chu zirtirtu te hi sorkar hnathawk dangte ang a service book chungchangah te emaw an hnathawk chungchangah te emaw a monitoring te hi duh ang tawkin alo tha lova, ACR te alo mumal lova. Tin, a Department te pawh kan fel tawk lo a ni chek anga, chung avang chuan han chinfel zung zung te alo har a. Tin, an pension ni te, engemaw ni alo

inang lo hlek hlek a, Accounts and Treasuries te an han zawhfiah a, han in tih chian ngaih chang te a lo awm a. Chung avang chuan kan tum ang hian kan ti chak thei lova. A pawisa lamah chuan kan in ralring reng tawh a, mahse fel thlapa kan inchhuah tir loh chuan tha in kan hriat loh avangin tihian in kan han muanpui lo thei lova.

Tin, Member zahawm tak, Pu Lalduhoma sawi ang khan, tun hnu zelah hetiang (VRS) Voluntary Retirement Scheme, hnuai an chhuahna tur atan hian keini chuan theihtawp chhuah hi kan tum hrim hrim a, kan chhuah mek bawk a. Tuna mi hi first phase ani a, second phase ah hian Primary zirtirtu an la ni leh hrih ang a, third phase lam atang phei chuan Middle school zirtirtu te pawh kan ti chho zel ang a.

Tin, kan hriat ve chin leh Opposition MLA zahawm tak tena an hriat ve chin te hi a inang lo in ka hria a, pakhat naah chuan 'an chhuah hnuah an condone leh si a' tih kha, an chhuah hnuah an condone a, ni hnih khat lek chhungin kan sut leh nghal a, kan condone leh lova ni, hei hi House Member ten min hriat sak se ka duh a. Kan condone leh lova, chu chu sawichian ka duh a. Tin, pahnihna ah chuan tihluhna angrenga tih chhuah tih chungchang hi a hming hrim hrim hi Voluntary Retirement Scheme a ni a. Voluntary a ni a, chuvangin in tihluh chungchang a ri thin hi mak ka ti a. Officer thenkhatten an fimkhur loh vang emaw an tawng tlahawlh vanga an lo sawi palh anih pawhin a Department chuan chu chu kan endorse lo. Kan pawmpui lo, intihluhna thil hi a tello reng reng. Hei hi Voluntary a ni, tih kha Pu Speaker, a Scheme awm dan pawh a ni . Ka lawm e.

**S P E A K E R** : Awle, zawhna 45 na zawt turin Pu R.L.Pianmawia i lo sawm ang.

**PU R.L. PIANMAWIA** : Pu Speaker, ka lawm e. Ka zawhna Minister, Health and Family Welfare Department chhan atan 45 na (a) Mizoram ah P.H.C hawn thar tumna a awm em ? (b) Awm se khawi khua ah te nge ? (c) Mizoram ah Private Hospital hawn dawn hian Sorkar atanga phalna emaw hriatpuina pek a ni em ? (d) Staff Nurse hnarauk hnawhkhah dawnin Department lak tur nge ? MPSC ?

**S P E A K E R** : A chhang turin a changtu Minister zahawm tak, Pu Lalrinliana Sailo i lo sawm ang.

**PU LALRINLIANA SAILO, MINISTER:** Pu Speaker, member zahawm tak Pu Lalpianmawia zawhna chhannate chu hengte hi an ni.

(a) Mizoram-ah PHC pali (4) hawn thar tura hmalak mek a ni



(b) Thingsai, Zobawk, Ratu leh Tuipuibari, hei hi Rajiv Nagar tia lam thin bawk a ni.

(c) Mizoramah Private Hospital (Deputy Speaker : Pu Speaker tilai kha a rawn sawi sual, Tuipuibari hi Rajiv Nagar tia lam thin a ni lova. Tuipuibari a ni, Rajiv Nagar kha chu Tuipuibari-II kha Rajiv Nagar tia thlak mai a ni a, hetah hian Rajiv Nagar a tel lo, Tuipuibari tih tur a ni a, khaw khat a ni a, an then hrang a ni a. ( Speaker) or kha a dik lo a ni maw ?) (Deputy Speaker : aw, khaw khat a ni lo, hei hi, 'or' hi a dik lo a ni, Tuipuibari tih tur. Tuipuibari-II kha Rajiv Nagar an tih avangin ngaihfin palh mai a nih ka ring.) A khawi zawkah nge kan dah dawn tih kha, Tuipuibari – I a ni maw ? Kan Deputy Speaker zahawm tak rawn sawi hi a ni a, tin, khulai khu a pawimawh kan ti bawk a, Pu Speaker ©-na chu - Mizoramah Private Hospital (Speaker - zawhna leh chhanna hun a tawp a, mahse han chhang zo rawh se aw, han chhang zo rawh le)©-na chhanna chu Mizoram-ah Private Hospital hawn dawn hian Sorkar atangin phalna emaw hriatpuina pek a ni em? tih chhanna chu Private Hospital hawn dawn hian Sorkar atangin phalna emaw hriatpuina pek a ni ngai lo a. Amaherawhchu, recognized tura an dil chuan endik a nih hnuah recognized tlakah Sorkarin a ngaih chuan recognized a ni thin a ni.

(d) MPSC lak tur a ni e.

**S P E A K E R** : Zawhna leh chhanna hun a lo tawp ta a, han kal chak hi a har khawp mai a. Tun tumah pawh zawhna panga (5) zawhbelhna pahnih bak awm thei miah lovin kan han kal a, kan tui tlang deuh thin a, a lawmawm e, kan satisfied thoah ngai ila. Vawiin niah Member lo kal thei lo 4 an awm a, Brig T. Sailo Pu P.C. Zoram Sangliana Pu K.S. Thanga leh Pu Hmingdailova Khiangte an nia. Tin, Dr R. Lalthangliana hi tih tur pawimawh a neih avangin chhuah zawk min rawn dil a, a chhuak zawk a ni.

Thu han puan tur kan Office lam atangin a awm a, Hon'ble Member te leh official te lo hriat atan Mizoram Legislative Assembly hian Website kan nei a. Hetah hian a tuka kan tih leh tur, List of Business leh List of Question te dah vek thin a ni a. He Website hi a hmang tangkai duhtu te tan tlawh theih reng a ni a, tlawh ngei tur pawhin kan han in ngen a ni. Hetah hian nichina kan han sawi mai bakah hian Form chi hrang hrang Member ten in mamawh tur down load theih reng a ni a. Chubakah Assembly in tunhmaa a thil lo tih tawh pawh tam tak hmuh theihin a awm a ni. He Website hi tha taka up date reng a ni. Tin, hemi rual hian tunah chuan hetia kan hotuten in thusawi hi kutziaka han ziaka in sawi a dik leh dik loh in hnena correction ti lo khan tunah hi chuan kan lo chhu nghal zung zung ta a. Tichuan khawl chhutsa kha correction turin kan rawn thawn thei ta a, kan Secretariat pawh kan changlung ve zel a ni. Kan Dan 27 na (1) angin vawiin chu Private Member Business tih ni a ni a, private resolution 9 kan hmuh te chu 22.3.2011 thawhlehi tlailam dar 2 : 00 ah ballot a ni a, chu chu Buletin Part-II No. 124 ni 23.3.2011 hmang khan kan inhriattir tawh a. Chuta indawt ang chuanin vawiinniah hian kan la dawn a. A hmasa ber kha Pu K.

Liantlinga Resolution a nih kha. Kha kha tunah kan lo la dawn a ni. Pu K. Liantlinga, Member zahawm takin a Resolution “Kan ram luipui kam engemawzat hi eizawn nana ram tha lai Assam Sorkar-in 1965-a Riverine Reserve Forest Area-a a lo rin lut hi Highland Area-ah sawn turin Mizoram Sorkarin hma la rawh se” tih hi move turin ilo sawm ang le.

**PU K. LIANTLINGA** : Pu Speaker, ka lawm e. Hei vawiiinah Private Resolution te move tura hun kan nei hi a lawmawm hlein ka hria a. Tin, he ka Resolution hi thil pakhat mai pawh ni lo hian, kil thum kil liah nghawng nei thei tur te anih avangin Member tepawhin thahnemngaia kan sawiho te pawh thain ka hria a.

Ka resolution rawn putluh chu kan chhiarchhuak leh phawt ang a. “Kan ram lupui kam engemawzat hi eizawn nana ram tha lai Assam Sorkar-in 1965-a Riverine Reserve Forest Area-a a lo rin lut hi, Highland Area-ah sawn turin Mizoram Sorkarin hma la rawh se” tih a ni a. Khawvel ram thang zel leh hmasawn zel te kan han thir chuan ramngaw te a lo chereuin kan nei tha lova. Sik leh sa leh khaw lum a danglam chhoh dante kan hre theuh a. Global warming chungchangah te, khaw lum te, khaw kheng te, ram kangte kan ramah chuan kan nei a. Tin, India ram mai pawh ni lova, North East State ah te pawh kan tawng chho zel a. India rama ramngaw thatna hmunte lo ni mahsela, kan tawng chho ve zel a ni. Mizoramah ngei pawh harsatna kan tawkin, kan luipui leh luite tui te pawh a lo tlem ve tial tial a. Hengte avang hian tuna ka Resolution pawh hi ngun taka kan ngaihtuah tlan a thain ka hria a.

Tin, eizawwna, lo neih lampang leh ramvah te kan lo tih nasat avangin, thingtlang eizawwna te pawhin harsatna a tawk tan a. Forest Department lampangte tana tha lo tur anga ngaihtuahna ni lovin, a Forest that zawkna tur atan te, tui leh sik leh sa chungchangte thlengin, he thil hian a khawih avangin ngun taka kan ngaihtuah tlan a ngai a. Tin, thingtlang lo nei mite leh huan nei mite thlengin a nghawng chho thei a ni. Hei hi (Riverine Reserve Forest) luipui kam Forest tena an humhalhna Dan (Act) a ni mai a. Mizo District Council hun lai khan an lo ruahman anih avangin, Assam sorkarin a lo remti a, luipui dungte hi mimal hnena pek theih loh leh mimal te tana huan leh leilet a neih theih lohin, a tawn kam mel chanve ve ve (meters 800 vel) Riverine Reserve Forest ah hian an lo rin lut a. Chu chu Assam Gazette May 19, 1965 ah khan a ni a. Khatia Assam in Gazette a lo chhuah takah chuan Central lamah pawh dan (Act)-a neih a lo ni chho ta a. Tichuan luipui kam ram thate leh huan leh lo ramte chu Forest Department-in neih remti tawh lovin, Forest Department kutah khan kan luipui dungte hi a lo tlulut ta a ni. Chunga kan luipui kam leh dung lo tlulut tate chu Pu Speaker, i phalna in ka'n chhiar chhuak ang a.

Assam Gazette Dt 19.May, 1965 ah hian ‘Forest within half a mile or either side of the following rivers’ a ti a. Tlawng (b) Tut (c) Teirei (d) Langkaih (e) Chem

Lui (f) Serlui (g) Tuivai (h) Tuivawl (i) Tuirini (j) Tuirial (k) Tuiruang (l) Khawthlang Tuipui (m) Tuichawng (n) Kau (o) Be (p) Phairuang, heng luipui dung pawimawh tak tak mai Potential area 16 ah hian Forest in Riverine reserved forest alo nih tak avang khan, kan kut hnathawktute'n leilet neih duh leh huan leh thlai, thei ching duhte khan harsatna tawkin, a ruka neih hial ngai khawpin helai ram hi a lo lut ta a. Amaherawh chu hetah hian, ngun taka kan ngaihtuah ngai erawh chu, hemi Riverine Reserved Forest a lo nihna chhan a hi Assam Sorkar hnuai Mizo District Council kha, Autonomous District Council nei kan ni a, mahse kan thing leh mau leh thildangte kha Assam sorkar hnuai awm kan nih avang khan DFO te kan nei ve lova. Silcharah te, Karimganj lama awmte khan pass pe in royalty te an chung a, permit te pe in kan ram luipui dung leh hmun dang, Tlabung lam te pawh a ni ang chu, khangah khan an tawlh chhuak huau huau mai a ni, kan mau leh thing te hi a uihawm em em a ni.

Hei tuna Supreme Court in thing lak khapna dan te pawh hi, hemi North-east a, abik taka a lo intanna chu, North-east a Arunachal ramngaw hi kan Maruari ten an thiat nasa lutuk a, hemi danna atana tih a ni. Inter-State transit a ni a phalloh chu. Khangah te khan mumal taka dan siam a ni a. chutianga dan theihna dan kan la neihloh avangin Mizo District Council hunlaia contractor te leh maua sumdawnge'n kan ram hausakna an tawlh thlak nasat lutuk avangin District Council hotute'n harsatna an tawh a.

Tin, Mizoram tan pawh a uihawm a, a hlawkna kan tel si lova. Chung avang chuan Mizo District Council hotute khan thiam taka ngaihtuahin engtinge kan tih ang an ti a. Kan ram thing leh maute ramdang contractor/sumdangin an lak lohna atan leh an tih chereu lohna atan he dan hi an lo rawt a. Hetah pawh hian Mizo District Council a Chief Executive Member, CEM in a sign a ni. Chuvang chuan Assam khan khatianga lo Gazette ta kha an ni a. Tichuan kan luipui dungte kha an lo reserve ve theihna tur atana dan (Act) siam chu a ni. District Council hunlai atan chuan a tha a ni. Amaherawhchu, kum a lo kal zel a, Mizoram U.T. kan nih a, State puitling kan lo nih hnu khan kan ramte han enkawl a, kan kuthnathawk tute leh kan farmer tena hna thawk tak tak tura ruahmanna, ei leh bara intodelh tur khan, lo leh ram leh huante kan han neih dawn khan harsatna kan tawh ta a. Forest Department in an phal si lova, 'Riverine Reserve Forest a ni', an ti a, an dang ta a. Chutiang chuan harsatna kan tawh ta a. Chu chu tunah hian he House zahawm tak hian a passed a, kan kal a nih chuan kha dan a kha sut a lo ni ang a. Kan ram sorkar kutah awm sela, kuthnathawka eizawngtu tena Leilet leh thildang chin nana tha taka an neih a, zalen taka a ruka ti lova an kal theihna turte pawh kha a pawimawh a ni.

India ram hmun hrang hrang luipui kam kan thlir theuhin ka ring a. Luipui kam chu eizawna atana tha, potential area a ni a. Khangah khan khua te an din a, engkim an cheibawl a, an reserve sak ngai lo. Amaherawhchu, Mizoramah engatinge kan reserve kan tih chuan kan sawi tawh ang khan kan District Council tena harsatna an tawh a, kan ram hnam dangin an tih chereu dawn avangin khami humna atan khan an lo ti mai kha a ni a. Vawiin niah chuan a neitute kan ni tawh a, kan veng him zo tawh a. Chuvang chuan he Riverine Forest Reserve hi thil tul a ni tawh lo a, kan sorkar leh Revenue

Department kutah awm sela, chu chuanin kan kuthnathawktu leh thildang tan khan thil tha a siam thei ang a. Heng hi de-reserve thuai hi kan tih makmawh turah kei chuan ka ngai a. Phai lamah te chuan tlangram hmun zawkte kha reserve a lo ni tawh thin a. Tin, heng luipui phaite hi Agriculture land ah te, Horticulture leh Sericulture land ah te siam chhoh lo ni sela. Tin, a chung leh deuh, ram rai tho si leh khami chunglamah kha chuan ft 3000 emaw ft 2000 area emaw, a ram azir zel khan, khang chunglam kha Forest Reserve ah dah zawkin, ruahmanna siam ni sela, a tha awm mang e, tih te tuna kan Resolution ah pawh hian ngaihtuahna hman a ni a.

Tin, heng ram tha chin chunglam hi Highland Reserve Forest anga kal tlangpang chhip te, vel kawlh tawh lovin kan lo nei thei tawh turah ngai ta ila. Tin, khami tlang lampang kha, Reserve Forest te a lo nih chuan soil erosion te a lo tlem ang a, ruahtui a lo tam ang a, malsawmna kan nei thei zawk dawn a. Hei tlang lian tak tak leh a chhehvel te hi Reserve Forest lo ni ta sela chuan, kan luipui leh luite tui kam mek leh kang zel te hi a lo siam tha ang a. Tin, ecological balance te a siam tha ang a, kan thlai thar leh kan buh tharte siam that theih tur a ni. Tuna kan Riverine Reserve Forest Potential Area hi lo neih nana kan hman chuan thil tam tak, kan ram tana thil tha a hril chhuah a rinawm a ni.

Tin, tlangram lam Reserve Forest tur zawk hi, kan vel filh a, kan hal a, kha khan kan tui a ti kang a ni. Tunah hian hengte avang hian Mizoram hian temperature Rainfall ah pawh hian harsatna kan tawh chho mek a, khangte pawh kha a solve theihna tur kil khat chu a ni.

Tunah hian 2000 atanga 2010, a tlangpuiin kum sawm(10) inkar vel hi teh nana hman a ni a. Kum 2000 khan minimum temperature hi Mizoramah hian 12.6 a ni a. Tin, maximum temperature hi 29.9 a ni a. Tunah hian kum sawm (10) chhung hian minimum hi 16.0 ah a chho a ni, 3.4 difference a ni tawh a ni. Tin, leh lamah maximum temperature ah pawh hian 30.8 nikum khan a ni tawh a ni. Heng hi International level-a an teh na ah chuan in 1.5 to 2.5, chu chu 100 years atana tih a ni. Temperature kal sang chho zel ah hian global warming a an tehna ah pawh hian in, chutiang ang a nih avang chuan in tuna kan ram lum chak dan te ngaihtuah chuan in heng hi kan tih makmawh a ni a, kha kha Forest Department te leh kan Sorkar te, Central Forest lampang te leh kan Sorkar te pawh an in biak a ngai a.

Tin, ruahtui tla te pawh hi kan thlir tel a ngai. Nikum khan Serlui an khuah kha kan zuk en a, kumtluanin kum 2008 khan in an lo khuap tling tawh a, mahse a spillway a la thleng pha lo reng reng, engtinngge tui in pek chhuah ang kan ti a ni. A chhan chu ruahtui a tlem a ni. Amaherawh chu, kha kha a tlem kum an ti a, a tam kum nikum khan in a tam leh em em si a ni. Kum 2000 khan 1509 millimeters a tla a, a kum leh chiah ah 2214 millimeters a tla leh si a ni, 800 mm deuhthaw a difference a awm a, 2003 ah 2538 mm a tla a, 2004 ah chuan 1551mm chauh a tla leh si a ni. Khatiang khan in a fluctuate nasa em em

a ni. Kum 2009 khan 1628 millimeters a tla a, nikum 2010 khan 2557 mm a tla a ni. Khatianga a fluctuate nachhan kha eng dang vang mah ni lovin, kan ramngawte a awm tawh loh avangin khang khan harsatna a siam a. Thil zawng zawng kha a her danglam vek ani tih kha han tarlan ka'n duhna a ni. Chung ang veng tur chuan, tunah hian Riverine Reserve Forest hi tlang lamah sawn ila, luidungah dah lovin, kan luidung potential area hi mipui tan dah zawk ila, tlangram chhengchhia deuh leh tlang chhip te hi Forest Reserve a tan kan dah zawk ang a. Entirnan han sawi ta ila, Reiek tlang ang te pawh khu lo ni dawn ta sela, Reiek tlang zawng zawng te khu entirnan Reiek Community Reserve Forest te lo ni ta sela, a khawtlang leh khulai chhehvel te khuan an veng him ang a, tan a la ang a. Tin, chutiang baw in Tawi tlangte pawh, khinglai Maite Reserve Forest, Lenchim tih emaw khan kal se, khing Chalfilh te leh a hnuai lam khaw hrang hrangte pawh, khatianga anga kal thei kha a ni a, khang ang atan khan central lamah pawh hian sum tam tak lak luh theih central sponsor scheme te pawh tam tak a awm zawk avangin khang kha kan develop that zawk hi a tul a. Chuvangin kan Luipui phai erawh hi chu mipui tan pek hi a thain ka hria, chu chu waviin niah ka'n move chhan pawh a ni a.

Tin, Luipui phaite pawh kha kan sorkarin flagship programme a ti a, Congress policy a ni a, mahse tunah chuan Mizoram flagship programme a ni a, mi zawng zawng ta a ni, an ta bik pawh a ni tawh lova, kan intawm vek tawh a ni. Entirnan, khang potential area-ah te pawh khan Luipui phaite develop turin kawngpui te, ram rai tha te cheibawl tur khan tuna infrastructure component tia kan House Leader-ina an sawi fo mai te pawh hi, heng ang develop nan hian hmang ta ila, zuk occupy ila tha takin awm ila, khatianga ang khan tan lakte pawh a thain ka hria. Chutianga kan Reserve Forest hi kan sawn chhoh a, Luipui phai ruama dah lovin, tlang tha zawng zawngte hi kan bawh a ngai. Han sawi ta ila, ram changkang deuh ka hmuh ve nel nual tawhah chuan a tlangpui thuin phaizawlah hian mihring an cheng a, tlang chin hi chu a level area an siam a, khami chin chungah khan kawng an siam a, khami chin chunglam kha chu forest area vek a ni, hei hi ram changkangte pawn an tih dan a ni a.

Tin, kan ram hi Forest ram tha kan in ti nain kan sawi duh chu remote sensing satellite atanga kan han thlir naah pawh hian 91.27% forest ang vekin an tarlang a. Amaherawhchu, fur lai te a ni a, kan ramngaw kha a hring dup a ni mai a, satellite atanga lakah hi chuan a dik tawh lova, a tak takah chuan dense forest hi 0.64% chauh a ni a, chu chu square Km.134 chauh a ni. Tin, moderate dense forest hi 29.65% a ni a, khang kha chu ngaw ve dih diah a ni a, chu chu Km.6251 vel a ni a, open forest an tih chu 60.98% a ni a. kha kha chu phul kan tih hi a ni ringawt a ni. Chuvang chuan sq.km. 12855 hi chei that dan zawngin hma kan lak chhoh hi a tulin ka hria a.

Kan ramah hian eizawna ngelnghet tak tak leh thiltih tak tak kan tum a nih chuan mi taima bik ten an ti emaw a nih pawhin ram rai tha leh ram hniamte a ngai a, Riverine Forest Reserve hi kan tih tawp a highland area ah hian reserve forest hi kan siam zawk hi a pawimawh em em a ni. Tin, chungah

chuan heng Agriculture te, Horticulture te kan sawi tawh ang khan Agriculture leh Fisheries, allied agriculture leh thil dang zawng zawngte pawh kha tha takin, hlawhtling takin a kal theih a rinawm a. Tin, he thil hi ka'n sawi duh chhan chu, nakinah pawh kan member zahawm tak tak ten a harsa, a theih loh te pawh an ti mai thei a, a theih dan kawngte pawh kan zawn a tha a. Mi thenkhatte pawhin an lo sawi fo tawh a, 'Central Act a ni tawh a, Central dan a ni tawh a, Central thuneihna a ni tawh, tih danglam theih a ni tawh lo,' an ti mai a ni. Amaherawhchu, chutiang lam ni lovin, kan ram chhungah hian a ram neitute leh a chhunga chengte roreltu ten tha kan tih chuan, Central dan pawh nise tha kan tih dan ngina a tihdanglam theih ang a, Official Resolution te pawh 'Pawi kha Lai ni tawh rawh se' 'Lakher kha Mara ni tawh rawh se,' tih te, tin, 'Lushai kha I delete ang u,' tih te, Central lamah pawh ti turin kan ti a ni. A ram mi chengte leh rorelna sangin a duh phawt chuan tih danglam theih loh hi a awm lova, a harsat pawh ka ring lova, kan sorkar ten theihtawpa an zuk nawr chuan, a nih dan dik tak kan tih chian chuan thil harsa a nih ka ring lo a ni.

Tin, MLA te, MP te chu ram chung inrelbawlina tura dan siamtu an ni a, kan House hi kan ramah chuan dan siamna hmunpui ber a ni. He dan kan lo tih thin District Council hun lai a mi kha a tha love, Riverine Reserve Forest hi highland area ah I dah zawk ang, tih te, ngaihtuahna hmanga tih chu nisela chu a hlawhtlin mai kha a rinawm a, thil dang ka sawi leh duh chu, duhthusam te pawh ani ang a, min lo pass sak a nih chuan kan hotute leh kan member zahawm tak ten, central sorkar leh state sorkar hian joint team expert tha takin siam sela, Riverine Reserve Forest ah hian hecter engzat nge a cover tih te leh tin, Highland Area ah hian sawn chho dawn ta ang ila engzatnge a cover ang tih kha ruahmanna fel tak siamin a tih theih a ni. Joint team siam a nih chuan Central pawhin lawm takin an thlir ang tih ka ring a ni. Riverine Reserve Forest hi chu a tlem zawk a, tlangram chhengchhia leh hmun tam tak hi Forest Reserve a kan siam dawn chuan a let li let nga hi pek tur a awm zawk ang, amaherawhchu, nichina kan sawi tawh ang khan kan ram ecological balance tha tawh lo leh fel tawh lo zawng zawng hi a siam fel theih a ni. Forest develop na tur atan pawh hian sum leh pai min pek hi an hreh lo hial zawkin ka ring a ni. Chuvangin May 1965 a Assam Gazette avanga Central sorkar ah Dan alo ni ta hi tih danglam a, Riverine Reserve Forest hi tih tawpin, Highland Area ah hian Reserve Forest siam ni zawk ta se tih kha ka sawi duh a. Tichuan, member zawng zawngte pawhin ngun taka ngaihtuah chiangin, wawiin ah hian Opposition leh Ruling lam sawi lovin kan Ram tan a thil tha tur leh thil dik ni a kan hriat te, kan ram ecological balance leh tun atanga kum 40-50 a lo piang tur te tana thil tha tur te kan ngaihtuah anih chuan tuna Highland Area a Reserve Forest kan dah a, heng luipui dung potential area te hi kan cheibawl hi a pawimawh em em a ni. Hemi ti tur hian tuna ka Resolution "kan ram luipui kam engnge maw zat eizawnnan a ram thalai Assam sorkar in kum 1965 Riverine Reserve Forest a alo rinluh hi, Highland Area ah sawn turin Mizoram Sorkar hian hma la rawh se" tih hi Member zahawm tak ten thahnemngai a min tihhlawtlin pui turin kan sawm che u ani e. Pu Speaker ka lawm e.

**S P E A K E R** : Aw le, Resolution neitu Member zahawm tak in a Resolution a rawn move ta a, kan sawiho dawn anga, a copy kan neih vek tawh kha. Member tin te minute 5 em ni kan han in pek leh diat diat ang le ? Enge tha kan tih dan te ? Minute 5 tawh kan ti em ? A ni maw, anih leh Minute 10 diat diat inpe ang aw.

Tichuan kan han sawiho anga, thluak han thawh tlang leh hlawm ilangin, harsatna awm thei te, tin, tunah hian Riverine Reserve ah hian Sq km chuti zat a awm a, highland reserve ah kan lo siam dawn anih chuan chuti zat ram chu pek a tul anga, kan highland hi compensation atchilh hnam kan ni si a. Mimal ramah kan lo pe vek tawh mai sia tih te kan sawi kai dawn em ? tih te, ngaihnam takin in sawiho teh ang. Pu H.Rohluna i sawm hmasa teh ang.

**PU H.ROHLUNA, MINISTER** : Pu Speaker, ka lawm e. Member zahawm tak, Pu K.Liantlingan a resolution a rawn put luh, “Kan ram luipui kam engemawzat eizawn nana ram thalai, Assam sorkar in kum 1965 a Riverine Reserve Forest Area a alo rin lut hi Highland Area ah sawn turin, Mizoram Sorkar in hma la rawh se,” tih a ni a, a move tuin a move thiam hle a, hun pawh kan in pe rei deuh bawh, i duhsak deuh bawh niin ka hria a, Pu Speaker, a move rei bawh a, a sawi chipchiar bawh a.

Ni e, thui tak han sawi tur pawh a awm vakin ka hre lova. Amaherawhchu hei hi kan Party in inthlan hma atang pawhin Pu Speaker, kan ngai pawimawh a ni tih i hriat kha. Tlangram te hi ramngaw tha zawka kan neih theih nana tan kan lak dan tur te, kan Election Manifesto ah te pawh khan kan tarlanga. Chuvangin, kan sorkar hlimah pawh khan a concerned department nihna angin theih ang tawkin Department pawh hian tan kan la a ni. Amaherawhchu kan rin aiin hei hi alo awl ai chiah lova. Hetiang zela kan kal hi chuan rambua zau tak hi kan ni mai ang a, nakin lawkah phei chuan thlaler ramah te kan siam palh ang tih kan hotuten an hlau a ni. Chuvangin ramngaw tha zawkte kan neih theihna atan heng kan luipui kam te hi chu eizawna, kuthnathawktu tena an eizawna, lo leh thlawhhma Buh tharna hmun tha zawka an hman theihna atan hman nise. Chutiang tho chuan a riverine reserve chang pawh ni lovin reserve area dang kan neih pawh hi rem siam dan kawng zawn nise tiin mumal takin kan manifesto ah pawh an lo dah a ni a.

Hei Land Use hrim hrim hi tangkai zawka kan ram leilung hi kan hman theihna atan te, tlangram tlangchhip lampang te, a aia hmun hniam zawk te leh kan luipui kam te hi tangkai zawka kan hman theihna atan ruahmanna neiin kan manifesto ah te pawh an lo dah a ni.

Tin, kan flagship programme, NLUP hian a tum ber chu eizawna ngelnghet neilo te tana eizawna ngelnghet siam sak a nih rualin kan ramah ramngaw zau zawk kan neih theihna atana he policy hi siamchhuah a ni tih hi ka sawilang tel duh a. Chumi ang chuan land use a ramngaw siam belh tum dan te, pawh hi ruahmanna siam a ni a. Chumi ang chuan 60% Zongaw ramchhia leh reserve awmsa te rain forest atana siamte, tin, 10% luhnar safety reserve YMA

park etc. Community forest atan te. Tin, 10% supply reserve atan tih te, a total reserve chu 80% hi Forest ah kan ram hi siam a, chutiang chuan community reserve ang zawngte leh mipui tena tha zawka kan kalpui theihna atan te leh thuneihna pawh kan va neih theihna atana ruahmanna mumal taka siam hi he NLUP pawhin a tum a ni. Chumi ang zulzui chuan kan ramngaw te mumal taka kan kalpui theihna turin kan Sorkar ang leh a Department ang pawhin tan kan la a. Chu kan tan lakna chu he kan Resolution move-tu Member zahawm tak hianin a hre sa pawh a ni mai thei a, a hre chiah lo pawh a ni thei a. Helaiah a thlawp zawnga rawn tih hi a department hmalakna kawngah pawh hian min tichaktu tha tak a ni ang tih pawh ka beisei a.

Tin, 2009 August ni 18 ah khan Union Environment & Forest Minister hovin Forest Minister Conference-ah kan lo thlen tawh a. Chunga kan thusawi naah te pawh chuan kan ram Reserve Area te hi tunah hi chuan mumal taka kan enkawl theih zawkna atan leh reserve zau zawk kan neih theihna atan hian re-locate a, a ram ri te hi siam that a, tih that ni zawk sela tih hi kan zuk dil tawh a ni. Chutiang chuan hei keima thusawi ve na ngeiah pawh kan zuk point out tawh a, a copy te pawh tunah kan la kawl a. Hetah hian a theih ang anga Ministry pawhin hma min lak pui a, min tih sak turin kan zuk ngen tawh a. Chutiang chuan hei kan safety reserve, kan riverine reserve chauh ni lovin, safety reserve te supply reserve te, thleng pawha tuai hnum that leh a, chutianga siamthat te pawh hi kan duh dan te kan zuk thlen vek tawh a ni a.

Tin, kan Riverine Reserve te hi awlsam taka keinin hei hi kan duh e tia kan Mizoram Forest Act, 1955 te a amendment heta han siam mai a, tihdanglam mai theih a ni tawh lova. Vawiin niah chuan Supreme Court thleng pawhin an thuneihna ban an rawn rawlh tawh a. Chuvangin, Forest Conservation Act, 1980 hmang te, siamthat te, Forest Conservation Act, 2003 zul zui te a heng hi kalpui ngai a ni a. Chuvangin, kan State thuneihna piah lam a ni a. Amaherawhchu, he House zahawm takina he Resolution hi kan pass chuan Department leh a sorkar anga kan hmalakna angah hian min tichak theitu atan pawh kan beisei a, chutiang chuan kan ramin a mamawh a nih hi chuan theih tawp kan chhuah anga, tun maiah tihfel theih loh mahse a ram mipui that zawkna tur a nih chuan kan hlawhtlin hun pawh awm turah kan ngai a; chutiang chuan a Department ringawtin hma han lak pawh a ni chiah lova. A chhan chu hetiang a kan thlak thleng dawn chuan riverine reserve te tlangchhip lamah te kan sawn dawn chuan Land Revenue and Settlement lamte pawhin a ram thlak thengna tur lam te tihfel kha a lo ngai ang a. Chutiang chuan Ministry thuneihna piah lamte pawh a ni thei ang a, vawiinah chuan Supreme Court lam thleng pawhin thlen te pawh ngai thei thil a ni. Amaherawhchu, a ramin kan mamawh a nih chuan theih tawp kan chhuah chho zel turah kan ngai a. Heng kan manifesto leh thil tum leh hma lo lak mekna hi kan Member zahawm takin hetiang a ngai pawimawh a, hetiang Resolution a rawn pu lut hi pass mai Pu Speaker, tha ka ti a.

Tin, a dawt leh te pawh hi sawiho vak ngai pawhin ka hre lova, Department lamin hma kan lo lak tawhna te pawh a ni bawka a. Resolution No.2



hi a pawimawh khawp mai a. Ram hmasawna power-a kan intodelhna tura sorkar hmalakna hi lawmawm kan ti tih pawh hi hun tam zawk he laiah hian sawi lo mai ila, a tha mai lawm ni ? Pu Speaker, rem i tih chuan, tih kha ka sawi duh a ni. Ka lawm e.

**S P E A K E R** : Nia, kan han sawiho nak nak ang a, Minister pawh la koh tur kha a ni a. Han sawi kha a ni khan a chak a, a han ding hmasa a, a soal chuang lo a. Nakinah sawi nawn a duh a nih pawhin kan ko nawn leh thei tho a ni. Lo inkhek khawl se, sawi hmaih te pawh a lo nei mai thei a. Tunah chuan Pu Lalduhom i lo sawm ang le.

**Pu LALDUHOMA** : Pu Speaker, a harsatna lampang han sawi a, mi han fuihpawrh kha i tum viau na a, a Minister berin a thlawp tlat tawh mai a, lawmawm riauin ka hria a. Boruak nuam tak kan nei leh dawn niin ka hria a ni.

1953 ah District Council kan nei a, 1955 ah Forest Act hi an lo siam nghal a. Kha mi hma daih khan kan pipute hi forest management ah hian entawn tlak khawvelah hian an ni a, Department kan neih hma khan an ti tha daih zawk. Chutiang bawkin kan Judiciary system te hi Red Indian ho nen khuan kan pipute system kha khawvelah hian a tha ber a ni an ti a. Thangtharte hian thil hi kan tichhe zawk mah mah niin a lang a. Chu mi kan pipute rilru hre reng chuan kan hruaitu hmasate khan he Act hi 1955 ah khan an lo siam a. Chutih laia a siamtute zinga tel ve Pu C. Pahlira, Executive Member khan, “Riverine leh Road side Forest siam chungchanga District Council hotute rilru”, tih kha a bu-in a siam a. Vawinah hian kan hruaitu hmasate zinga min la dam pui awm chhun a ni a. Kan zingah tel ve tawh lo mahse, a rilru hre reng leh hruaitu hlui te rilru hre rengin han sawi ka tum a ni.

Kha an dan siam section 14-na read with section 21 tlawh chhanin 1956 April Ni 16 ah District Council khan Notification a ti chhuak a ni. Chutah chuan, nichina kan ngaihthlak tak luipui 16 te kam leh lam, either side, a leh lam chauh a ni, mel 1 chin leh kawngpui, Aizawl leh Silchar inkar via Sairang kawngpui atanga feet 100 atanga teh a, mel chanve chin Roadside Reserve ah an lo puang a. An puan chhan chu a Mover-in a sawi tawh ang khan, khatih lai khan Assam Forest hnuaiyah kan awm a, vaiin kan thing leh mau an tawlh ru reng a, chumi ven nan leh, an ti rau rau a nih chuan chhiah kan hmuh ve nan a ni. Chuvang chuan, vai thlen phak loh kan ram luilian te hi an reserve tel ve lo, kha khan kan hotu hmasate rilru chu a tichiang em em a ni. Kum engemawzat an hman hnuah khulama Forest Officer te khan kan District Council Act pass kha an hre ve mang si lova, an la rawn tawlh ru reng mai a. Assam Gazette ah hian zuk chhuah ve mai ila, an hre deuh mahna, tiin 1965 May 19 ah khan Assam Gazette

ah an zu chhuah tir ve mai chauh a ni. A Act siamtute chu kan District hotute kha an ni.

Section 13 ah hian khua te, village reserve te, supply reserve te, mimal inhmun lo ramte a huap lovang a ti thlap a ni, he Forest reserve hian a khawih buai lo.

Section 28 hian mimal insakna leh chakkhai atana thing leh mau an lakah permit a ngai lo, chhiah an chawi a ngai lo a ti thlap a, mimalin an ram chhunga thing leh mau an neihah District Council hotute kha an in rawlh ngai lo, sorkar a inrawlh ve ngai lo, a chuhpui ve ngai lo.

Section 39 ah chuan lui leh kawngkam reserve area chhunga thlawhhma kan lak dan pangngai kha a phalsak tho a ni, an nei reng tho a ni, a khap sak bur lo, mipui harsatna an siam lo, vai dan an tum ber zawk a ni.

Tin, Section 40 hian VC ten an recommend chuan khami area chhungah khan mimal ram pek phalsak a ni ang a ti a, an pe bawk a ni. Chuvangin, mimal eizawna potential area-a vantlang emaw, mimal eizawna dal tur zawng hian he dan siamtute hian thinlung an nei lova, an lekkawh ngai bawk lo a ni tih uar takin ka sawi duh a. Khatiang ang lo khan hun kal zelah kan hman dan a lo dik ta lova, 'either side' pawh 'both side' in kan sawi ta zawk a, nichina kan Minister zahawm takin a sawi ang khan. A zau zawng an sawi te pawh kha a kam tawn tawn an teh tel vang a nih ka ring, either side a nih kha chuan khati lutukin a zau thei lo a ni. Chuvangin, kha kha siamthat leh a, vawikhatah a vaiin kan ti thei lovang, re-allocation a ni mai a, phase manner te pawhin a tih theih a ni. Chutianga kan tih theihna tur Resolution a ni zawk a, pass mai kha a tha ka ti a ni.

Pu Speaker, hemi hrulah hian han sawi duh ka neih chu Supreme Court Order kan tih teivet awm hma daih hian kan ram Forest Department hian kan District Council hotute dan siam tha tak tlawhchhan chung si hian, a dan siamtute rilru kalh tlatin, mipuite tan harsatna an siam hnem em em mai a ni. An siam hmasakna ber chu Mizoram Private Forest (Regulation of Felling) Rules, 1994 a ni. District Council Forest Act, Section 42 na tlawhchhana an siam chu a ni ve a. Chuta tang chuan mimal huan ramah Department a rawn inrawlh ta a. Mahni chin ngei thing pawh mahni thuin kan kit thei ta lova, kan dek ral thei ta hauh lo mai a. Supreme Court Order awm hma thil daih a ni. Supreme Court-in min tihbuai hma daih khan Forest hian mipui min tibuai daih tawh. Chu chu Pu C. Pahlira ngei hian, "A dan siamtu tena kan siam dan principle kalh a ni, either side-in kan siam a, both side-in an rawn kalpui a, tin, khawtlang phallo chung kan ti lui ngai lo," a ti a ni. Tun hnuah Forest Department-in khawtlang hotu pahnih/pathum, eng buk emaw sak a, an thlem hmin tawh chuan mipui phallo chung chung pawh an ram an rin luh sak duh tawh a ni. Khati zawng khan kan kal ta a. Chuvangin, Pu C. Pahlira'n a sawi dan tak chuan, "Bible-a titiautu tenawm a tihte kha Forest Department hi an ni ber e," a ti hial a nih kha.

Tichuan, Supreme Court judgement hi ka sawi leh duh a Pu Speaker, he House ah ngei pawh inhnialna a awm fo tawh a. He Supreme Court Order kan tih fo hi Writ Petition © No.202 of 1995 a ni a. T.N. Godavarmana leh Union of India inkhinna a ni a. 15<sup>th</sup> January, 1998 ah final judgement siam a ni. Chu final judgement chu hei ka rawn keng nghe nghe a.

Para 10 naah chuan hetiang hian i phalnain ka'n chhiar ang a – “Existing inventorised stock of timber, originating from plantation in private and community holdings in the state of Meghalaya, Mizoram, Tripura, Manipur and Nagaland may be disposed of by their owners under the relevant state laws and rules, in states where such laws do not exist, the necessary laws may be framed within six months,” a ti a, ‘stock lo awm tawh sa hemi states a mite hi a neitu ten an dekal thei ang, a deh ralna dan chu an state in Dan a siamna hnuaiah a ni ang,’ a ti mai a ni. Min rawn khap awzawng lo.

Para 24 hian district leh regional leh village council hnuaia forest working plan siam dan chungchang a sawi a, para 25 na hian tihian a ti leh ta a “The plantation scheme raised on private and community holdings shall be excluded from these requirements but shall be regulated under respective rules and regulations,” a ti leh mai a ni. Khatianga Dan leh hrai a rawn zam te khan private ho hi chu a huam ve lo ang, exclude an ni ang, anmahni state dan hnuaiah an awm ang, a ti mawlh mawlh a ni, Supreme Court hian.

Tichuan a order para 28 na hian “Timber extraction in forest, irrespective of ownership, except in private plantations, shall be carried out by the state agency only,” a ti bawka, private ta a nih loh chuan a ti leh a ni tah pawh hian, private plantation hi a khawih ngai lo reng reng, Supreme Court hian. Chuvangin, private leh community land holding chu, kan Lal lal lai atangin kan lo nei sa tawh a, chumi kan dehral dan tur chu kan state-in Dan min siam sak thei a, khirh deuh min siam sak kher kher hi, waviin ni thlenga mahni huan, mahni enkawl, mahni phun thing pawh kit thei lo a, kih phalna pawh lak ngaia kan insiam em em hi chum mahni leh mahni inhrem kan ni ringawt. Forest plantation hnuaia mi atana hman tur working plan erawhchu state-in a approve thei lo, central ah thlen a ngai, chu chauh chu a ni, tih hi ka han sawi duh a. Hemi chungchangah hian Advocate, Supreme Court ami, Mrs. Hemantika Wahi hian kan Conservator of Forest hnenah hian ni 17.1.1998 ah lehkha a rawn thawn a, tahchuan ‘a general band hian private leh community forest te a huap lo e aw’ a rawn ti tawka tawka a ni, min hrilh Chiang a ni, kan advocate hian. Chumi hnuaia Secretary, Environment and Forest hnenah lehkha a rawn thawn leh a, a copy Pu Thangzuala, Vice Chairman, Planning Board a rawn pe bawka, chu a lehkha thawnah chuan “Tualchhung chanchinbu ah, Conservator of Forest, Northern Circle, Mizoram thuchhuah a siam chungchanga ka ngaihdan i rawn zawhna chu hetiang hian ka rawn chhang a che - Para 31-na hi a hresual let der a ni, hei hi Arunachal chungchang sawina a ni a, Mizoram thil a ni love,” a rawn ti a. Para 10 te, 25 te 28 te nichina ka rawn tarlan tak te kha rawn sawifiahin “mimal hnena Licence pek te, thinning tih te, kih leh dehral te hi khap ani lo

reng reng a, hetiang khap anga in chanchinbuah an lo chhuah hi a dik lo hul hual a ni, chuvangin heng tan hian in State in Dan in siam ang a, chu chu in zawm mai tur a ni. Chanchinbuah a tihfiahna in lo chhuah leh dawn nia,” a rawn ti a, kan Advocate ai chuan kan Department te hian Dan thiam zawk ah an inngai ta tlat nge ni ? Supreme Court-in harsatna min siam lo chung chuan vawiin ni thleng hian kan insiam lui tlat mai a ni. Chu chu a ni, term hmasa khan kan sawiho tawh a. He Supreme Court Judgement hi ka lek chhuak a, “A khawi laiah hian nge Private Plantation Supreme Court-in a khap na lai chu min han hrilh teh u,” ka ti a ni. “Khawi lai tak hi nge in tan chhan ?” ka ti a, chutih lai chuan Dr. Thangtea hi Minister zahawmtak a ni a, “Kan sawiho ang a, Pu Duha hi kan sawm ve dawn nia,” min ti ta a. Vawikhat chu sawiho naah chuan min telh ve ta nghe nghe a. Hei hi thudik ani a, Supreme Court hian harsatna min siam lo hrim hrim a. Keimahni leh keimahni harsatna kan insiam a, kan District Council hotute Dan siam tha tak mimal nek hlau ngawih ngawiha an siam pawh mimal nek nan kan hmang duh zel a, a siamtute ngei la dam te pawh an rilru na ngawih ngawihin kan siam a, chuvang chuan kan kal dan hi a huatthlala ka ti tlat. Mahni leh mahni kan in awp a, Mizo leh Mizo te hetiang harsatna insiam turah ka ngai lo a ni. Lal hunlai atangin mimal leh Community Forest kan nei a, Mizo district (Agricultural Land) Act, 1963 te kan nei a, vawiin ni thlengin kan la nei a. Mimal pass tam tak pek a ni a. NLUP tih hmasak tum khan chhungkua 8000 in Teak Plantation hi an thlang a ni. Chung hnen ah chuan Revenue atangin Official Order a chhuak a, provisional pass pek theih an ni ang, kumkhat hnu ah pass puitling pek theih an ni ang tih thlap a ni. Chutiang chu a ni a, 1981 leh 1998 inkar ah Kolasib, Kawnpui, Vairengte leh Zawlnuam bawr vel a LSC awm zat Pu Zodintluanga, MLA zahawm takin a zawhna chhanna chu khung lai area ah khuan LSC 2028 a awm tih a ni. Chutiang chuan kan sorkar ngeiin pass a pe a, dan bawhchhia an ni lova, sorkar phalnain In hmun te, huan te an nei a ni. Khatiang kha a ni a, Conservator of Forest Act kan sawi fo hi 1980 a lo piang chauh a ni, heng kan sawi zawng zawngte hi a hma hian kan nei vek tawh a, kan ti vek tawh a ni. Conservation of Forest Act lo pian chhuah hun hi chu a tlai em em a ni.

Tin, National policy, Package and Guidelines for re-settlement and rehabilitation 1998 para 5 na kan en chuan, forest area chhunga mi chengte kan evic dawn a nih reng reng chuan compensation pek emaw, an ram aia ram dang pek tur a ni tih thlap a ni. A za tel tel eviction order kan ramah hian kan inpe zing lutuk tawh.

Tunah chuan Tribal te tan Forest Right Acts te kha a lo awm ta a, helaiah kan sawiho tawh a. Kan Ministry hmasaah Pu K. Vanlalauva, Minister-in Official Resolution a pu lut a, kan pass tawh a, a hnuah an withdraw leh a. Tun term ah hian Pu P.C. Lalthanliana, Minister zahawm takin a rawn pulut leh a, kan pass leh tawh a. Khang zawng zawng kha vawiin nia resolution hian tihhlawhtlin a tum a ni, hma lak mekna vek a ni. Chumi a nih avang chuan, Supreme Court-in heng mite hi lo ti zalen rawh u min ti ngawih ngawih a, India ram pum huapa hman tur Act leh Rule te a siam tawh hnu leh keini pawhina

kan adopt tawh hnu hian, vawiina kan resolution hian khang zawng zawng kha a rawn tanpui a, a dodal lova, chuvangin hei hi kan pass dawna ka hriat avangin lawmawm ka ti a, mahse hun rei tak chhung mipui dip zawnga kan lo kal tawh thu hi ka'n sawi lang ve duh hrim hrim a ni. Ka lawm e.

**DEPUTY SPEAKER** : Tunge sawi tur awm leh le, Pu John Siamkunga i lo sawm ang.

**Pu JOHN SIAMKUNGA** : Pu Deputy Speaker, ka lawm e. Kan motion tuna kan resolution sawiho mek hi kan hotuten an sawi nual tawh a, bakah a mover pawhin a rawn move thiam hle a, a rawn sawi thiam hle a, tam ka sawi dawn lova, ka sawi duh laite chu he resolution hi kan Election Manifesto ah khan chiang takin Congress khan kan nei a, helam pana hma lak tum khan kan sorkar hma pawhin kan lo tum tawh a ni. Pu Deputy Speaker, i phalnain helai hi ka'n chhiar lawk ang e, kan Election Manifesto ah chuan hetiang hian kan dah a "Kan luipui kam zawng zawng mai riverine reserve anga awmte hi mu leh mal awm lovin mipui tana harsatna siamtu mai a nih avangin kan sorkar hunah chuan mipuite tana hamthatna awm thei tur zawngin Mizoram Forest Act 1955 hi kan amend ang a, Central Act, Forest Conservation Act 1980 in a phut angina compensated afforestation hmangin kan forest reserve te hi ennawnin kan siam tha ang," tih chiang takin kan lo dah tawh a. Tin, hetiang anga dan siam a nih lai hian Bairabi te, Hortoki, Sairang, Kanhmun, Lokichherra, Marpara, Tlabungte hi hemi chhungah hian an lo awm tawh a. Kan sawitu hmasa ten an lo sawi dan ang khan VC te leh Council hotuten leiletah te, huan ram leh thil dang dangachte an lo pe tawh thin a; chungte pawh chu a har em em lo a ni tih kan hria a.

Tin, kan Election Manifesto-in tuna kan resolution a lo sawi lawk deuh ang hian NLUP ah pawh hian hetiang anga hmalakna tur chiang takin kan siam a. Ramngaw, ram chhia leh reserve awm sa te rain forest-a siam tur hian ram zau zawng 60% hi NLUP hnuaiah hian dah kan tum a ni. Tin, chutiangin lui hnar, tuikhur hnar, safety reserve leh YMA park, etc. te community forest atana siam tur hian 10% siam kan tum bawk a ni. Tin, a dang leh chu supply reserve forest atan hian 10% dang siam kan tum bawk a.

Khang atang te khan kan sorkarin hmalak tumna nasa tak alo nei tawh tih a hriat a. Kan sorkar hma hauh pawh khan he Resolution hi kan election manifesto ah chiang takin alo awm a, chuvangin khangte sawi lan pah khan he Resolution hi ka thlawp ani tih tawite in kan sawi duh ani e. Ka lawm e.

**DEPUTY SPEAKER** : Awle, sawi duh dang kan la awm em le. Kan la sawi dawn nge ni a, kan adopt turin kan ti tawh mai dawn. Aw, Pu H. Liansailova, Minister i lo ko ang.

**Pu H. LIANSILOVA, MINISTER:** Pu Deputy Speaker, hei vawiin a kan Resolution kan ngaihtuah mek ah hian in, a chung khung deuh si a, a move tuin a han sawi lan thenkhat te nen han sawi ve lawk ka duh a. Tin, a Resolution chung changah kan ram Forest enthat a pawimawh leh a tulna thu party ang pawhin keini party chuan Manifesto ah te pawh kan lo tarlan tawh thute pawh kan hotuten an han tarlang tawh a. Tin, kan Forest Minister khan hetia Pathian leh mipui te duhsakna zara kan lo sorkar takah chuan kan Policy ti mai ila kan Manifesto-a mipui hnena kan sawi tawh tihlawhtling zawnga hma engemaw chen an lo lak tawhte pawh kha a rawn sawi chhuak a. Tin, a harsatna turte pawh min rawn hrilhfiawh tawh a, chuti chung chuan kan ram tana pawimawhna leh a tulna a bo chuang lova. Vawiin nia hetia Resolution alo lut hi kan ngaihtlak tak ang khan kan ram tana tha tur, thahnem ngaihna ani a, a lawmawm a. Tin, chutih rual chuan ram tana tha tur anih chuan party party tih leh sorkar lam emaw opposition emaw ngaihtuahna awm lova hetia puitling tak maia kan Member ten sorkar policy thlawp zawng leh tichak tura private resolution an rawn pu lut pawh hi a lawmawm khawpin ka hria a. Kan ngaihtlak tawh ang khanin tuna kan resolution neitu leh kan member dangte pawhin kan sorkarin programme an kalpui mek NLUP kan tih ah te pawh Party programme anih anga min ngaihsak lo leh sorkar programme a niha, kan ta theuh a ni tia thahnemngaihna an han sawi chhuak te kha lawmawm hle in ka hria a.

Chulaiah chuan tlem han kal pen hret kan duha, min lo ngaithiam turin kan beisei a, NLUP ah hian kan ngaihtlak tak ang khan Party mal programme ang deuhva pawn lam ah emaw, engemaw lai chuan sawi thin mah ila, tunah chuan sorkar programme tak tak anih takah hian kan zavaia kan tanho na tur ani tih kan House Leader pawhin a sawi tawh kha han sawi nawn kan duh pahin, tunah hian hetia kan han kalpui tan ah hianin kan mi te hi a thu pawha kan kaihhruai a pawimawh hle in ka hria a.

A sum hi kan tarlang lianin kan tarlang tam lutuk a, hei chiah hi kan inchuh emaw kan inkhelh emaw, a sum ringawt mai hi a NLUP ina a tinzawn emaw tih tur hianin Mipui rilru hi kan buatsaih palh ang tih hi a hlauhawm hle in ka hria a, Thlasik leh Favang khaw nawm laiin hnathawh tur kan sawi a. Hei Nipui alo thaw tan a, an fehchhuah hun a lo ni a, sum kan pai tir tan tawh bawk a. Chuvang chuan thlan tui luang zawih zawiha anmahni activity lak theuha kha, thawk tura kan hotute leh kan Media lam pawh hian min tanpuia kan tanho hle angai dawn a ni. Chuti chung pawh chuan engchen nge kan hlawhtlinna ni ang ? tih a ni a. Tin, chutih rual chuanin a monitoring kan tih, hengte pawh hi Committee District level ah te, tin, village level ah te, a state level ah pawh buatsaih vek a ni tawh a. Chung ah chuan kan bialtu MLA te pawhin mahni bial theuhah khanin min bengvarpui chak leh zualte pawh a ngai dawnin ka hria a.

Heng bakah hian Planning Commission-ina min ulukpui em avangin Third Pary monitoring te pawh kan buatsaih dawn mek a ni tih kha kan sawilang kher kher duh a. Vawiin niah hian kan ram Forest kan ngaih pawimawh rualin Agriculture land tur atana kan ram mamawh zel hi kan ngaihtuah tel a ngai a, kan ram zaa sawmruk hi Forest-ah kan dah ang kan tih rual hian, Agriculture land reserve tur, nakina agriculture atana kan

mamawh zel tura hi kan ngaihtuahnaa a tel hi a ngai a ni. Chuvang chuan Forest Conservancy Act-ina min phuarluh vekna tur laiah hianin kan ram kan tlukluh tir tam lutuk ang tihte pawh hi ngaihtuahnaah kan hman tel chu a tha khawpin ka hriaa. Tunah hian khaw thenkhatah chuanin heng thil avang hianin ram theh tur nei lote pawh an awm a, buaipui ngai turte pawh an awm a ni tih kan hotuten kan Appex Board Meeting-ahte, tin, kan Meeting pawimawhah te an sawilang a ni. Chuvang chuan Forest a pawimawh kan tih rual hian a Forest a pawimawhna chhana chu a mi cheng mihringte vang a ni. A mihringte dip tur zawng leh mihringte nek chep tur zawnga kan ngaihthlak tak ang khan, a Forest Policy hi kan kalpui emaw a mihring, a forest mamawhtute mihring awm avanga forest kha mamawh kan nih avangin mihringte aiin forest kan dah pawimawh zawk emaw tih tur khawpa kan dan hman laite pawh a inrapbet zawnga ngaih theih emaw harsatna insiam lutuka ngaih theiha kan kal a that ka ring lo va. Chuvang chuan heng kawngah pawh hian sawrkarin kan forest humhalhna kawnga hma a lakna tur kawngah hian kan fimkhur chhoha forest tha nei ila kan tihna chhan mihring hi kan dah pawimawh zawk a, forest aiin mihring kan dah pawimawh lo zawk a nih kha chuan a tha hauhin ka ring lo va. Chu chu ka'n sawi lang duh a.

Tin, tunah hian he resolution Sorkar ang pawha kan policy kalpui zelna tur kawngah a harsatna kha kan Forest Minister in a sawi a. Harsa mahselangin kan ram leh mipuite mamawh a nih avangin kan kalpui zel ang a, a harsatna lai apianga tang hovin kan ram thatna tur ber leh mipuite eizawna kawng leh nitin khawsak thilah pawh kan mamawh kan hmuh theihna tur atanah siamrem hna kan thawk zel tur a ni. Tunah hian kan party policy ah khan kan tuikhur leh kan luhnar tuite humhalhna tur hian tlangsang lama reserve emaw kan ram forest te emaw hi kan tih zauh leh kan humhalh a tul a ni tih kan hotuten an lo sawi lawk tawh a. Chuvang chuan kan forest kan re-allocate theih tam tak hi chu tlangsang lama kan sawn chhoh hian kan water resource pawh hi kan conserve thei dawn tihna a ni ang. Chuvang chuan hei hi resolution tha tak, tin, Sorkar pawhin policy tha taka lo kalpui a ni a. Chuvang chuan vawiinnia kan han sawiho naah hian Sorkarin policy-a lo neih mek hi chak zawkin kalpui selangin, kan sawihona hi a tawk e, pawh ti ilangin a tha tawk thoin ka hria a. Amaherawhchu, kan lungruala kan pass a nih pawhin Sorkarin hma a lo la mek tawh a, tin, he policy tihlawhtling tur hian kan forest Minister pawhin thui tak a lo kal tawh a, hmanhmawh rum ruma hetia kan pass avanga tihlawhtlin nghal mai theih pawh a ni lova, inngaichang rih ang u hmiang ti zawngte pawhin a ngaihtuah theih thovin ka hria a. Chuvang chuan a engtizawng zawng pawh chuan kan thahnemngaihna hi khawi zawk zawkah pawh khan sirtlu ila inpaihna emaw a awm chuang lova, tanrualna leh tanhona kawng a ni vekin ka hria a. Pu Dy. Speaker kan resolution rawn putluh chungchangah hian a tha hlein ka hria a. A thu ai mahin kan tanhona leh ram tana tha tur nia kan hriatah kan House Leader-in kan session tannia a rawn react tawh ang khanin kan rilru leh kan ngaihtuahna ram tan tak taka kan hman danah hian a Sorkar lam te leh Opposition lam te pawh kan tanho thain ka hria a. Chuvang chuan he resolution hi engti zawng pawhin sir tluk ila, Sorkarin policy kal pui mek a nei a. Hei hi duh tawh mai ila, kan sawihona hi a tha viau a lawm mawle te pawh a tih theih a. Tin,

Resolution ang ngei hian i kal ang u kan tih pawn, a eng zawk zawk pawh kha a tha vekin ka hria a. Chu chu kan dinpui mai a ni e. Ka lawm e.

**DEPUTY SPEAKER** : Pu R.L. Pianmawia i lo ko ang.

**PU R.L. PIANMAWIA** : Pu Deputy Speaker, ka lawm e. Kan ngaihthlak tawh ang khan he Resolution hi Congress Party tena inthlan hma a manifesto-a kan lo hman tawh a ni a. Kan chhul chhuak te an ni tih kha a rawn inpuang ang tih chu kan hlau viau a. Congress manifesto ngei a kha anin a rawn thur chhuak a kha zem khat lo zen tawh te kan lo nih tawhnaah khan engemaw ngaihtuahna Pu Thlenga te, Pu Rama te khan an lo nei ang tih ka hlau deuh hlek a. Amaherawhchu, mihrang kan la ni lo tih erawh chu kan la hre thei maiin kan ring a. A lawmawm hlein ka hria a, hetiang rawn tihchhuah nachang an hria te hi. Lehlahmah chuan Fapa tlanbo te pawh kha kan hrechhuak rum rum a. Lo kir leh te pawh a hnai emawni tih ngaihtuahna te pawh min neih tir rum rum a ni.

Tin, NLUP chungchang han sawibelh hlek kan duh a chu, he thil avang hian mirethei dinhmun khaichhuah ngai te, rahbi tuk sakna tur atana kawng pawimawh tak a ni a kan Resolution hi. Chuvangin NLUP tihlawhtling tur pawh hian heng hi kan chhawr hle dawn a ni tih a hriat bawh a. Tin, thahnem min ngaihpuai bawh a, thian te Pu Lalthansanga te pawh khan an rawn sawi a, NLUP hlawhtlin min duh pui a. Amaherawhchu, in tih dan chuti khati an rawn ti thin a, hemi laiah hian kan Sorkar rilru tak tak hi he House hi hriattir thain ka hria a. Miretheite, dinhmun chhe tawpkhawka kan awm tawh khaichhuahna turin rahbi tuk sak kan ngai a. Chumi tuk sak nan chuan NLUP in hma lak a ni a. Tah chuan kan Sorkar hian miretheite a khawngaih tak tak avang hian, fapa tlanbo anga an ro chanai vawilehkhata pek a, fapa tlanboa siam teuh hi a tum lo a ni tih hi vawiin niah hian kan hriat tlan a thain ka hria a. Chuvangin, he thil hi thahnemngai taka kan ngaihtuahna te hmanga kan pawm tlan theih vek a thain ka hria a. He Resolution hi kan Manifesto a ni a, min rawn phur pui a, an rawn rawt ang hian, keini pawhin hlim takin kan support a ni tih kha ka sawi duh a ni. Ka lawm e.

**DEPUTY SPEAKER** : Sawi duh dang kan la awm em le ? Pu Lalthansanga i lo sawm ang.



**Pu LALTHANSANGA** : Pu Deputy Speaker, ka'n sawi ve ang a. Sawi thui vak tur pawh a awm lova. Hei kan adopt dawn te pawhin a lang a, a lawmawm hlein ka hria a.

Ka sawi tawh ang khan kan hruaitu hmasaten an lo kalpui dan te, hemi Bill an lo kalpui dante ngaihtuahin vawiin nia kan hman dante leh kan rilru nena han enkawp hian high land area kha reserve area-a kan dah leh chuan, a low land area kha kan han inneih siak leh dawn chu a ni mai a. Chumi ven nan chuan kan Sorkar pawh hian khati laiah khan dan Supreme Court-in a lo tih tawh thin angte pawh lehlam pangah hi chuan tlem a lo modified tih pawh kha awm ni te pawhin a lang thei a ni. A chhan chu khami an tihna, a motive zawk a kha kan House Leader zahawm tak hian 'compensation lamah kan lut zo mai dawn a,' a tih lai a kha a ni a. A dawt leh chiaha kan resolution nen hian vawiin nia kan resolution hi a inkalh em? tih te pawh hi ngaihtuah tham a awm dawn ta chu a ni mai a. A chhan chu khatiang ang zawng khan thil pahnih kha ngaihtuah kawp ngai laite a awm duh hian ka hre lek lek a. Keini phei chu power lampang hi kan atchilh a, tunhma phei kha chuan Congress khan PC te chu 'Hydel Project alawm, kan khuaplo alawm' han ti ila, mi a ang deuhah kan chhuah mai a. 'An bula mite an kal sawn pawh hian a hnai hnai hi an pan a, an la sawi tang tang e,' min ti a. Chutiang khawpa kan lo atchilh thin Power te kan lo tih thin avangin hetiang chungchangah te hian rilru ngaihtuahna kan nei nasa a.

Tin, kan pu ber Brig. T. Sailoa hian thingtlanga tunhmaa a chak laia P.C. Party an din a, a vung chhoh lai pawha a sawi tam ber a chu low land area zawng zawng, hetiang riverine area vel a hi kan develop ang a. Agriculture land develop kan ti ang a, chumiah chuan thlai kan thar ang, a chung lampang hi kan ti ngaw ang a, chumiah chuan engkim thlai mamawh kha a awm dawn a ni, tih kha a sawi nasa hle a. Chuvang chuan kan chak lakna kan Granary of Mizoram ang tura hetiang lai riverine ang tura kan lo treat thin tawh te, kan lo sawi thin a ni a. Chu chu vawiin niah pawh hian he dan kan tih 1965 Assam Gazette-a kan han chhuah pawh kha, lehlam pangah chuan 1955-a lo awm tawh zawk, vaihoin kan ram minrawn tih chereu nasat lutuk avanga kan invenna leh royalty te kan lo hmuh ve theihna atana a rawn tihrawn leh te pawh kha a ni, tihte pawh kha kan hria a.

Chuvang chuan hetilalah pawh hian ngaihtuahna hman ngun hi a ngai hle mai a. Land ceiling te kan kalpui dawn a ni a. Nimin khan ka zawhnaah pawh khan a lo chhuak hman lo a. Kan Revenue changtu Minister zahawm tak pawh khan a ti a, Land ceiling ti turte pawh hian Expert Committee te kan ti mek a, chutiangte pawh chuan a hman dan turte pawh duangin, tiang chuan kan la ti ang, tih te, he House ah te pawh la putlulh a ni ang, tiin min chhang a.

Chutiang atanga zuk ngaihtuah chuan vawiin niah pawh hian hemi Resolution kan han pawm rualte pawh hian khatiangte nen pawh khan a inzawm deuh vek mai hian ka hre thin a. A chhan chu kan duhamna, kan mihring mihrinna hi he khawvelah hian engkimah tihlan kan tum ta ni te pawh hian a

lang a. Keimahni bak hi kan in ngaihtuah ta lova; Aizawl khawpui pawh kum 100 chuang a nih hnuah hi chuan keimahni chauh, engnge ni materialism ah kan kal tawh a. Tunah phei chuan vested interest ah, selfness ah hian keimahni mimalah hian kan tlan nasat tawh lutuk avang hian kan ram hi kan ngaihtuah meuh tawh lova. Kan chhungkua bakah hian keimahni chauh hi kan in ngaihtuah emaw ni chu aw, tih mai turin AIDS pun chak ziate atanga han ngaihtuah pawh hian midang pawh kan ngaihtuah tawh lo, kan nupui fanau pawh, keimahni hi kan in ngaihtuah tawh avang hian kan ram hian vawiin niah chhiat lampang hi a pan zel emaw ni chu a, tih ngaihtuahna chu a rawn piang a.

Chutianga zuk chhut chuan vawiin nia kan resolution hi, hetiang high land area kan lo hmang dawn a nih pawhin chu high land area pawh chu a neitute hian he ram hmangaihna, he rama mipui chengte hmangaihna avanga surrender ngam tura compensation te pawh ti lo a, Sorkar dan anga engemaw compensation claim te pawh hi tih loh a, chutiang thinlung nen pawha he kan sawihona te pawh hi lo dawngsawng se, tih te pawh kha ka'n ngen duh a ni. Chutiang ang tak maia kan kal loh chuan, khatiang ang zawnga kan kal kha chuan kan intlansiak leh ang a, nei zaua te, nei hnema te kha kan tam ang tih hi ka ring a. Chuvang chuan hei hi kan hotupa ber, kan pu ber Brig. T. Sailo pawhin a lo sawi thin a nih avang khan, river area te hi hetiang mimal, mitinten an hlawkna leh a chhawr tangkai theihnaa chhawr tura hetiang rawtna a lo awm hi, he motion hi kan thlawp a ni tih kha Pu Deputy Speaker, ka'n sawi duh a ni. Ka lawm e.

**Pu B. LALTHLEGLIANA** : Pu Deputy Speaker, ka'n sawi ve lawk, (Dy. Speaker: kan resolution hi a tha aniang, kan inchuh chu a ni deuh ber tawh mai a, engpawh nisela han sawi rawh le) Pu Deputy Speaker, sawi loh ka'n tum zet na a kan mover khan a rawn move thiam a, chutah Pu Duha, MLA zahawm tak khan a rawn sawilang Chiang viau a. Helai Riverine Reserve chungchang hi tunhma pawha ka lo ngaihtuah ve thin, Sateek ka bial ve lai pawhin Mat kam vela lo neitute LSC siam sak kan tum a, kan ti thei lo a, chulai atang chuan ka lo vei ve em em a, MLA zahawm tak Pu Duha khan, siam tute rilru thleng khan a rawn phawrh chhuak a, a dik ngei ang tih ka ring a, kan Politician hmasate ram rawngbawla ram tak tak ngaihtuah tute an ni a. Kum 1955-a he Dan an siam either side an tih hi ka interpretation ah chuan kam lehlam chauh hi a niin ka hre thin si a, amaherawh chu Forest-in an han hman hian both side-in an hmang si a, kha lai kha ka lo buai ve em em a, Dictionary ah a meaning te ka'n en thin a, ka tan lam kha a dikin ka hre bawk si a. Nimin ah kan member zahawmtak Pu Rama hi 'either side tih ani si a, a lehlam lehlam in hmang hi kan buaina ber a nih hi,' ka ti a, ani pawhin 'hrilhfiah chianna a awm silova,' a ti a, kha kha Forest pawhin an lo kalpui dan niin ka hria a. Forest Officer ho pawh hi ka hnial fo na a ni a, 'either side' tih hi chu a kam lehlam chauh tur nia a lan lain, a bothside-a in hman avang hian kan rama kuthnathawktu, luipui dung bela eizawn tum tuten harsatna an tawh thin a, helai hi chu a fuh lo a ni te ka lo ti ve thin a. A siamtute rilruah pawh kha chiah kha a lo ni a.

Vawiina kan Resolution hi tha ka ti a, amaherawh chu highland area-a han sawn leh tur khan kan in phihhnawk nasa awm mange aw ka ti a, kan House Leader zahawm takin 'compensation hnam kan ni,' ti hiala a sawi ang deuh kha kan ni a. Highland ah ramsang lamah kan lo cheng nasa a, Huan leh Lo ram kan lo nei nasa a, khata Forest Reserve han siam leh tur kha chuan kan tlin ang em aw? Tuna a thu ngau ngau nilo hian insiam rem dante a awm em? tih kha Congress Election Manifesto ah khan eng ang chiah in nge in ziak ka hre lova, helai hi chu ngaihtuah chian a tha a. Tunah hian Mizoram ah eizawna kawng hrang hrang kan dap zel a, luipui base-a eizawna hi a kal chak viau tawh, chutih laiin helai 1955-a Dan an lo siam either side tih both side-a kan han hmang tlat lai hian harsatna min siam a. Tin, Central Act ah hian Schedule Tribe and other Traditional Forest Dweller Acts 2006 ah khan ka hriat sual loh chuan, 'forest ram chhunga chengte an nih chuan hectare 4 ram pek theih an ni ang,' tih ang deuh kha a awm a. Chungte a nih chuan khangte nen khan han suih rem a, engemaw tia helai hi chu han siam rem hi a ngai tho tho mai a, chuvangin ka support lo han ti dawn ila, a tha ka ti a. Amaherawhchu, Highland-a han sawn tur chuan kan buai dan tur ka ngaihtuah hian zawh loh nghawngkawlah kan in barh ang a, kan buai pherh zo ang tih ka hlau va, chuvangin a thu heti laia hi kan Member zahawm tak pawh khan siam rem a hreh lem loh chuan kan zavai hian a siam rem dan hi ngaihtuah ila. 'Highland Area-ah sawn' tih laite kha han pass chiah mah ila, harsatna kan tawh tur a ni a, he House zahawm taka resolution kan pass a, bawhzuina keimahni ram chhunga harsatna kan tawh tur, tin, central forest thuneihna a ni a. Khalaiyah khan nasa taka nawr a lo ngai bawk a, lo hlawhtling pawh ni ila, Highland-a kan in sawna turah khan harsatna nasa tak kan la tawh leh tur a nih avang khan khalai kha a thu siam rem dan kei chuan ka thiam chiah lova. Hmalam huna kan harsat dan tur thlir chung khan helai hi chu pass mai lo hian a siam rem dan chu thiam thei ila a tha awm mang e aw ka ti a. Chu chu Pu Deputy Speaker, tawitein ka rawn zep ve zawk a nih chu. Ka lawm e.

**DEPUTY SPEAKER** : Minute 5 emaw chauh a awm tawh a. Engpawhnisela, kan House Leader khan han sawi leh sela, nichin atang khan a phar tawh a, hun chu ka'n pe belh zawk mai ang chu.

**Pu LAL THANHAWLA, CHIEF MINISTER:** Pu Deputy Speaker, tam tak sawi tur ka nei lova, a chhan chu kan Forest Minister ber khan motion neitu kha a rawn support a, pass a rawn dil pui tawh a, anni kalh zawng kha chuan keini kha chuan kan sawi ngam dawn tawh lova. Chuvangin a kalh zawng khan sawi ka tum lova, 'either side' tih hi a kalphungah chuan saptawng ka thiam vang nilovin 'both side tihna a ni' an ti a, a lehlam chauh a nih chuan either emaw or tiha zawm tur a ni an ti a. Chu chu dik maw dik lo maw ka hre lova, a saptawnga a awmdana an ziah a ni an ti a, hei hi kan pass dawn niin a lang a.

Amaherawhchu, Member zahawm tak Pu Thlenga han sawi ang khan nakina a implement dawn loh chuan, implement theih pawh ni ta se, siam rem tur awmin ka ring a.

Tin, ka sawi ang khan Assam Supplementary Gazetted 1965 ah khan 'either' a tih kha anni pawhin an pawm dan chu 'both sides of the bank' tih ang khan an pawm a ni an ti a an kal danah chuan, chu chu nilo ta se chuan or in a zui tur a ni an ti a. Tin, Central Act ah Forest Conservation Act 1980 ah a lo chuan tawh avangin lungrual takin kan lo pass a nih pawhin kan tih theih chin a awm, mahse Central Sorkar chu kan approach chu a tul hmelin a lang a. Tin, kan lo puitlin hnuah pawh tuna kan resolution hi a tul em em rual hian keini pawhin mimal tak leh party angte pawhin kan vei viau a, a chhan chu kan ram underground water level hi a tlahniam sawt khawp a. Tin, kan luite hi keimahnin kan hmuh ve phak ringawtah pawh hian a kam nasa tawh a, a tlem tawh a. Hman deuh khan Chawngte thlengin ka zin a, ka haw kawngah khan khaw tin deuh thaw ka tlawh a, chutah chuan khaw pahnih velah chuan, 'hun hmasaa tui lak kha a that tehlul nen, hei a kangchat ti tih tawh a, kan khawpkham lo hle mai a, kan khaw pun vang nilovin a tui kangchat avang hian siamthat leh kan ngai a ni', ti an lo awm a ni. Chutiang deuh chuan kan hmuh ve phak chin Pu Liantlinga ten an hre ve phak ang emaw chu ka hre lova, Member zahawm takin Chitelui te khu sorkar huan thlang maiah khuan li a awm a, kan tet deuh lai chuan chutah chuan pa hote hian lenkhang kan zar thin a ni. Chutiang han zarna tur awm ang hi a awm tawhin a lang lova tunah chuan chutiang khawp chuan a kangchat tih kan hria a. A hnar lampang a chereu tawh a, chuvangin hei hi thil veiwam a ni a, hun hmasa lamah hruaitu hmasate pawhin an lo vei a. Tin, District Council hun laia hetiang an lo tih pawh hi a finthlak hle a, a lawmawm ka ti a, lawmthu ka'n hrilh pah rualin a la dam chhuna te pawh keini pawh hian kan kalpui chhoh zel hi a tul a ni tih hi chu a lang a ni.

Amaherawhchu, ka'n sawi duh tak zawk leh kan din chhan zawk taka chu kan NLUP programme ah hian mau hi kan hmang tam hle mai dawn in a lang a. Tin, NLUP piahlahmah pawh Bamboo hian rural economy hi kan revolutionize thei dawnin ka in beisei ani. Kan mau te hi a tlangpuiin Riverine Reserve kan tih velah hian a tam ber a, chuvangin hei hi lo kaltlang pui dawn pawh ni ilangin kan Riverine Reserve te hi duat taka enkawl dan chin kan neih a tul dawn a. Tunah hian dik tak chuan Aizawl milian leh mi thil ti thei deuh te hian an neih zawng zawng, an loh neihsa te pawh an lei sak a, Ram hmangaihna tak tak pawh tel lovin tuna member zahawm tak Pu Lalthansanga sawi ang khan mahni hmasial deuh hian an hmang chho tlangpui ani. Chuvangin hetiangte pawh hi en chian bik a ngai ang a. Tin, maua thingtlang mi te economy revolutionize tumna kawngah hian a tamna lai ber chu Riverine Reserve kan tih ho ah hian a nih avangin chumi en renga kan kal chu a ngai mai awm mang e aw, chu chu helaia thu Member zahawm takte hi chuan NLUP tih hlawhtlin kan tumna kawngah leh NLUP pawn lamah pawh khulai Venus Bamboo Plant te pawh hmanni ah te pawh kan sawi tawh ang khan thing nilova mau lama tihchangtlun, keimahnin pawh intodelh chhohna kawnga kan raw material ber tur a nih avang khan duatna

thinlung nen hei hi kan pass a nih pawhin telh ila, tih ka sawi duh a ni. Ka lawm e.

**DEPUTY SPEAKER** : Awle, a lawmawm e. Dar 1:00 a ni a, kan hun a tawp chiah a, chuvang chuan chawhma kan hun a tawp a; chawhnu dar 2:00 ah chawhnu hun kan tan leh dawn nia.

**Pu LAL THANHAWLA, CHIEF MINISTER:** Pu Deputy Speaker, a pahnih na hi lo la ta ila, a pathum naah hian a ngai chiah hi a la awm a, hei hi kan la kawpah kan ngai dawn em ni? Engtinng e kan kalphung hi?

**DEPUTY SPEAKER** : A in an chuan a theih tawh loh a nih chu. Chuvangin a dawta mi kha chu kan la leh hman turah ngai ila. Chawhma lamah kan pass thei dawn emaw ka ti a, kan han sawi neuh neuh a, hun a tawp a ni ta der a. Chawhnu lamah kan luh leh hunah a dawt leh chu kan la thei ang a. Mahse a dawt leh, a pathumna kha chu a in an avang khan a lak nawn theih tawh dawn loh a nih chu. Le, kan chawl ang a dar 2:00 ah kan lut khawm leh dawn nia.

**S P E A K E R** : Kan resolution kan tui tlang baw a, Mi 9 in kan sawi tawh a, sawi leh zel tul kan la ti em? Pu Chawnga nge Pu Nirupama sawi hmasa dawn? sawi zel phawt ang u, kan tui tlang a ni.

**PU CHAWNGTINTHANGA** : Pu Speaker, ka lawm e. Kan resolution sawi lai mek hi a ngaihnaawmin a tulin a tha hle a, kan tui tlang a, Member zahawm tak Pu Liantlinga khan a rawn sawi ngaihnaawm em em a. Side busy deuh hlek Member zahawm tak, Pu Duhoma'n a rawn sawi te kha a ropuiin a tha hle in ka hria a. Supreme Court Judgement a rawn sawi chungchang pheih kha chu ka thlawp ngawih ngawih a. Sorkar-a ka awm lai khan vawi duai lo kha judgement kha ka lo chhiar ve tawh thin a. Kan Forest hotute kan ngam lo deuh a, ti mai teh ang. Dan min rawn siamsak danah khan kan tumloh angin a kal leh thin niin ka hria a.

Thil tamtak ka sawi lem lovang a, he kan resolution hi a tha em em a, kan Party Manifesto pawh hlawhtling turin thui tak min tanpui thei tur nia kan ngaih lai hian, sawi hmasaten an sawi tawh angin kan District Council hotute khan fing tak leh remhre takin kan ramin-a revenue a lo neih theih nan leh mipuite thlavang hauh ranin Riverine Reserve Area hi an lo siam a ni tih te pawh kan ngaitla tawh a.

Khatih lai khan Bairabi te, Hortoki te, Sairang te, Kanhmun te, Lokichera te, Zawlnuamte leh Marpara, Tlabungte kha khaw awm sa tawh, Riverine Reserve hnuaiia puan hnan an ni tih kan hmu a. Amaherawhchu, khang mitena an eizawna turin thiam takin dan kha an siam a. Eizawna an neihsa leh chhonzawm zelna turin harsatna siam miah lovin, District Council ho khan Pass te an lo pe a. Tin, chumai bakah chumi chu chhonzawmin UT leh State kan nih hnu te pawh in Pass pek zel an ni nghe nghe a ni. Tuna kan Resolution hian, 'Riverine Reserve hi Highland Reserve-ah sawn chho ila' tih kha a tum ber a ni a. Ka ngaihtuahna lo lang chu Highland lamah hian Riverine Reserve ang chi hi a let hnih lai ang kan pek ngai awmin a lang a Compensatory Allowance-te nen phei chuan. Chutiang a nih phei chuan Zofate hi Sakei ang mai kan ni a, a tlang sang chuh mi kan ni a, a sang lamah hian kan inbengbel rei tawh laklawh a, ram tha zawng zawng hi mi thiltitheh leh mi chakten tlang ramah pawh hian an nei zo vek tawh a ni mai a.

Compensation chungchangah khan kan member zahawm takten an sawi ang khan harsatna kan tawh mai awm mang e, compensation chungchangah harsatna tawh lem lo mah ila, khatiang em em ram alternative land han pe tur khan harsatna kan va tawh nasa mai awm ve tih te a ngaihtuah theihin ka hria a. Chutiang dinhmuna kan din lai chuan tuna kan problem lian ber ni anga lang chu Riverine Reserve Area-ah hian Forests Department nge ni ang a Revenue Department hi thunei zawk tih hi a ni fo thin a, thubuui tam tak hi he Department pahnihah hian a awm tawh thin a, chung chu chingfel hleih theih lohvin rei tak a awm tawh thin a. Amaherawhchu kan hriat theuh angin The Scheduled Tribes and Others Traditional Forest Dwellers as Recognition of Forest Right Act, 2006 a lo piang tawh a. Hei hi he House-ah ngei pawh kan sawiho tawh a, hman turin kan titlu a, Sorkarin a bawhzui mek zel a. Kum 75 vel lo awm, a aia tlem lo, lo awm tawhte chu Acre 4 lai permanent-a nei thei turin eizawnaah tihte a lo nih avangin. Chuvangin kan buaina lai tak hi he Act hianin a chingfel chho mai lo maw tih ngaihtuahnaah hian a lut a. Tuna Riverine Reserve zawng zawng hi Highland lamah lo suanchho dawn ta ang ila, ngaihtuahnaah chuan Mizoramina kan innghahna leh kan ngaihtuahna tam tak a awmna, nakinah chuan Bamboo Industry te tunaia changtlung zawkin kan siam ang a. Tin, Paper Mill te pawh kan la buatsaih ang chu tih ngaihtuahna te hi kan ti puitling thei dawn hauh lo a ni mai thei a. Leilung awmziaah hian Bamboo reng reng hi low lying area ah lo chuan a tha hlei thei si lo tihte pawh hi kan hriat tlan theuh a ni a.

Tin, kan NLUP programme ah khawpui hrang hrangah hian an han duang mek a, kan hotuten Agarbati stick siam te hi thil tha tak tur nia kan hriat laiin a raw material ber kha Bamboo a ni lo thei lova. Chuvang chuan kan Riverine Reserve area ah kan Mau ngahna hmun hi Highland lama kan sawn mai chuan heng Industry kan buaipui mekah te pawh hian kan tan harsatna min siamtu a ni mai thei lo maw tih kha ngaihtuahna lian tak a awm a, he resolution hi thain kan ram tana duhtusam a nihna chin awm mahse. Thenkhatah hian ngaihtuah chian ngai a awm lawm ni tiin ngaihtuahna ka nei a. Chuvangin tuna a resolution ang ngau ngau lo hian kan sirtluk thei mai lawm ni tih karawn sawi duh a ni e. Pu Speaker ka lawm e.

**S P E A K E R** : Tunah Pu Nirupam Chakma, chumi hnuah  
Pu John Rotluangliana.

**Pu NIRUPAM CHAKMA** : Pu Speaker ka lawm e, hei Pu K.Liantlinga resolution 'kan ram luipui kam thalaia Assam Sorkarin 1965 Riverine Reserve Forest area-a a lo rin lut hi Highland Area ah sawn turin, Mizoram Sorkarin hma la rawh se' He Resolution hi kan pass anga 'Mizoram Sorkarin hma la rawh se' a ti a. Hma an la ang a, a implement theih loh ang a, nakinah min dem ang tih kha a hlauhawm. A chhan tam tak a awm a, a negative leh positive zawngin ka sawi hmasa dawn a ni, Pu Speaker.

Pu Speaker, a resolution-in a tum chu Riverine Reserve hi titawp ila, tihtawp ringawt nilovin reserve ila highland ah sawn ni rawh se an ti a. Highland-a sawn tur chuan ram khawiah nge a awm? Road site reserve kan nei si a 100 meters emaw ni. NLUP tan pawh ram pek theih loh laia Riverine Reserve Highland-a sawn vek tur chuan a theih loh reng reng. Practical-in ngaihtuah ila, kei chu practical-a ngaihtuah mi ka ni a. Chuvang chuan, kan pass ang a, Department-in hma lak theih chin chinah hma kan la ang a Nakinah a implement theih chuan Sorkar chu dem suh se. Mizoram mipui pawh dem suh se, a chhan chu harsatna tam tak a awm dawn, practical-a ngaihtuah chuan pass ringawt hi a tawk lo a nia Pu Speaker. Kan hriat tawh angin khaw tam takah vawkvulh te an thlang a, engatinge vawkvulh an thlan? Ram kan nei lo alawm an ti. Chuti a nih chuan 1032 Sq.Km. Riverine Reserve Highland-a dah tur a nih chuan 'Where is the land' khawiah nge? Kha kha hisap tel lova kan pass ringawt kha awmzia a awm lo.

Hei, Riverine Reserve te chu Tlawng te, Tut te, Langkaih, Teirei, Serlui, Tuivai, Tuivawl, Tuirini, Tuirial, Tuiruang, Khawthlang Tuipui, Tuichawng, Kau, Phairuang. 1832 Sq.km chanve pawh an tling lova, we cannot see. Where is the land? Forest Department hian a sawi thei em? Revenue Department hian a sawi thei em? Practical kha ngaihtuah a ngai.

Amaherawhchu, Pu Speaker, a thatna awm chu tuna Forest Reserve hi de-reserve ila, forest siamsa kha kih emaw hralh emaw a ngai dawn a, mimal hnena pek tur a nih chuan. Sorkar tan revenue tam tak a lo lut dawn a ni. Tin, mipui hnenah emaw pek a nih chuan mau awmna hmun te chu Bamboo Plantation atan tam tak a tha ang. Sorkar chu a hlawk ang. The Government will be very rich. Tuivai implement a nih chuan. Road Tax tam tak an la lut ang. Amaherawhchu, forest replace-na tur highland kan pe thei lo a nih chuan India Sorkar pawhin min dem ang. Tin, keimahni Sorkar tan pawh a harsa ang. I shall be very very happy to implement this. Practical ah pawh tunah pawisa harsat laiin chaw pawh ngaihtuahin pawisa tam tak lakluh theihna a ni dawn a.

Pu Speaker, he resolution hian District Council hi a huam em? Practical-a harsatna pakhat ka'n sawi duh chu, hei Chawngte Tuichawng tlangdung Lai leh Mara

leh Chakma area, either side of the bank of river Tuichawng riverine plantation hi kum tin hian soil erosion hi a tam thei hle a. CADC area a te tulh tulh a, Lai Council a lian tulh tulh a, Lai kha Lai Council ah a bet a. Kan Member zahawm tak Pu Ramhluna hian a hrechiang ang a, Spead boat-a zin thin chuan. Chuvangin, Reserve Forest pawh ni se, nakina environmental effect awm tur chu soil erosion a ni, a hlauhawm hle mai, mak pawh in ti mai thei a. I request all of you to go once by boat. Boat-a kal ringawt pawh khan soil erosion a awm thei a, thing leh mau te a awm lo a. Riverine Forest awm loh vangin environmental effect tam tak Mizoram pumah a awm thei ang a, chutiang thleng chu kan ngaihtuah a ngai a ni. Chuvang chuan Pu Speaker, he Resolution hi mipui ngaihtuahna atang chuan a tha. Ram te kan nei ang a, ram te kan insem thei dawn a. Amaherawhchu, nakin zel atan ngaihtuahin tunhma kan District Council hotute ngaihtuahna hi a fing zawk emaw ni chu aw, ka ti a. Khang lai khan he Resolution hi move selang chuan an vaw hlum mai ang tih a hlauhawm a ni. Chuvang chuan Pu Speaker, enchhin ila ti zawngin ka support duh e.

**Pu JOHN ROTLUANGLIANA:** Pu Speaker, chawhma lamah khan a sawi apiang khan kan Resolution support zawng khan an sawi a. Mahse ka hmaah khan kan Member zahawm tak Pu Chawnginthanga khan ka ngaihtuahna a rawn chawk tho deuh hlek a, tawite han sawi ve ka duh a. Hei, 'lui dung reserve lam hi tlang ramah sawn ni rawh se' tih ang kha a ni a.

Tunah hian lui dung kan reserve hi tlang ramah sawn dawn ila, tlang ramah hian forest ho hian tlangram reserve ti ve leh thung se la, kan buai dan tur zia kha ka ngaihtuahna ah a awm a. Ram ruak reng reng awm tawh lo, kan ram hi tute emaw ram vek kha a ni tawh mai bawk si a. Tin, Riverine Reserve laia kha han chhuah zalen ta ila, wawiin nia kan Sorkarin revenue a neih ve sand mahal, bamboo mahal kan tih te kha a zo vek tawh ang a, mimalin an duh duhin an la ang a, khati khan kan zuk chilphul dawn kha a ni ber a.

Tin, a lehlamah, reserve kan chhuah zalen lamah harsatna a awm bawk, a chhak lamah forest reserve siam dawn ila harsatna awm bawk tur niin ka hria a. Chuvang chuan han sawi han sawi khan, kan pass mai dawna ka ngaih lain ka thinlungah heti lai hi a lo lang tlat mai a, engpawh nise, kan sawi avanga danglam vak tur phei chu a awm chuang lova. Chuvang chuan Highland lama reserve han sawn ringawt lai kha sawi aiin a harsa in ka ring. Kan Department pawhin hma han la dawnin tlang lamah reserve han siam dawn sela, an harsat ngawtin ka ring. Tin, sawi ang khan, a luidung lamah harsatna kan tawk dawn bawk si a, revenue kan chan dawn bawk si nen.

Engpawh nise, tawite a ka han sawi duh chu – heti laiah hian forest hrim hrim hi concurrent list a ni a, keini ina 'nise' tia kan duh duh dana kan tih kha a theih chuang lova. Vawiina resolution pawh hi lo pass ila, bial khawmpui ang duhin 'central lamah kal zel rawh se' kan ti a nih kha chuan a tha ka ti ve mai



a. Chuvang chuan kan ngaihtuah ngun deuh chu a tha lo maw? Resolution neitu khan a rawn moved a, a thiam ang reng a, a zawha han sawi tan kha chuan support vek awm pawh kha a ni ve reng a ni. Mahse, a dark-side lam han thlir ve hret khan, thil tha ber anga lang, practical-a tih har tak a ni a. Nichinah khan Pu Nirupum Chakma khan, “Kei chu practical-a ngaihtuah mi ka ni a”, a ti a. Chuvang chuan khatiang tan kha chuan a practical hi a har dawn hle mai a.

Mahse, niminah khan kan Member pakhatin a sawi kha, ‘resolution hi kan pass kan pass a, a hlamzuih leh mai thin a, bawhzui leh em em pawh hi a awm lova, eng angin nge a awm tak tih pawh kan ngaihtuah lem lova’ a tih ang deuh khan, ‘han pass ve hrim hrim ila, central lamah kal rawh se’ kan tih kha chuan a tha ka ti mai a. A nih loh chuan ngaihtuah chian deuh chu a tha tih thu tawite in ka han sawi ve a ni, Pu Speaker.

**Pu C. RAMHLUNA** : Pu Speaker, ka lawm e. Ka sawi dawn lo emaw ka’n ti deuh a, mahse tlem sawi tulin ka hre leh deuh. Vawiina kan Private Resolution hi a tha viau a. “Kan ram luipui kam engemaw zat eizawn nana ram tha lai Assam Sorkarin kum 1965-a Riverine Reserve Forest Area-a a lo rin luh hi Highland Area-ah sawn turin Mizoram Sorkarin hma la rawh se,” tih a ni a. Hetia han en mai hi chuan a tha viau in a hriat theih a. Tin, tih awm tak pawh a ni mai awm mang e, Mizoram condition atan chuan tih ngaihdan a siam theih a. Mahse ka hmaa mite lo sawi tawh ang khan ngunthluk taka en hi chu a ngaiin ka hria a.

Hei, Mizoramah hian kan hriat angin District Council hun lai atang khan kan hotu hmasate khan Reserve Forest hi ramdanga an tih loh ang hian an lo siam a, kha an tih chhan te pawh kha an sawi tawh a, sawi nawn kha a ngai lo turah ngai ta ila. Riverine Forest Reserve an lo siam a, tin, kawngpui dung reserve an lo siam bawk a. Hengte hi Department-a engemaw chen kan lo thawh ve avangin engemaw chin chu hriatna kan nei ve a. Enkaw! a har em em mai a ni. A chhan chu tunah pawh hian han en ta ang ila, kan Reserve Forest ho hi mimal ramin a khat emaw tih mai tawh tur a ni a. Hei tuna kan House Leader zahawm tak hi kum 1995-a Chief Minister a nih hmasak lai khan State Land Use Board siam a ni a. Chumi ah chuan a Board Member-ah te khan kan lo tel ve thin a, kan tum ber chu hemi kan Riverine Reserve Forest Area leh hmun danga ram tha ho hi Mizoram intodelhna tur atan Agriculture purpose atan identify ni sela, tiin zawnchhuahna hna kha a thawktute zingah kan telh a. A hmasa bera kan tawh chu Tut Reserve Forest khu a ni a. Khung lamah pawh kan zuk kal a, ka zuk hmuh chhuah chu kum 1995-66 velah pawh khan 10% vel reserve forest area kha mimal khan an encroach tawh a, ram nghet tak an nei a, hmun nghet tak an nei a, lak let leh harsa em em tawh deuh vek an ni. Khatiang khan encroachment kha a kal chho zel a, Riverine Forest Reserve Area hi lo de-reserve dawn ta ang pawh ni ila, mimal ram a kha kan de-reserve dawn angin a lang thei a ni. Ram tha hi chu tunah chuan bawh deuh vek a ni tawh a, chuvang

chuan Sorkar ang hian lo hmang leh dawn teh reng pawh nise, midang hnena han pek leh tur chuang awm tawh lo tur khawpin an encroach tawh a ni a, chu chu a dinhmun a ni.

Ministry hmasa ah pawh khan a hmanga PCCF kan nih lai khan tuna kan sawi ang hian tih tumna rilru kha kan nei tawh deuh hlek a, Central lama kan hotu te, kan thiante pawh vawi tam keimah pawhin ka sawipui tawh a. Mahse an huphurh tlang theuh a ni, chuvang chuan tihdan kha kan hre lem lo a, kan ngawihpui ta mai mai a ni. Kum 1995-a Public Interest Litigation Case lar tak Godvarman Case an tih kha, WP No.C-202/95 ah khan India ram pumpuia reserve forest hi identify ni sela, Government of India ah khan submit ni sela, chu chu Supreme Court ah khan affidavit-in pek ni sela tihah pawh khan Mizoram Forest Area pawh kha identified ve tawh kha a ni a. Heng Riverine Reserve Forest te pawh hi pek luh vek an ni a. Chumi submit tum ah pawh chuan PCCF kha ka accompany ve a, kan lo thawh ve lai a nih avang khan (ka) han tih khan sawi loh theih loh a ni a. Pu Speaker, min lo ngaithiam ula, hemi chungchangah hian kan reserve forest ho hi nasa taka encroach a nih avangin helai ram hi demarcate that a, kan ram chungchang thu hi min ngaihtuah sak ni sela, tiin Supreme Court ah pawh khan kan submit nghe nghe a ni.

Sawi hrehawm tak a ni a, nichinah khan kan Member pakhat khan a sawi a. He public interest litigation hi a kal chho zel a, kum 1996-a order hmasa ber a rawn chhuah phei chuan an han strict em em khawp a, 'forest' a rawn tih reng reng a pawh kha dictionary meaning-a forest a ni tur a ni, tih tawp mai kha a ni. Chuvangin reserve forest a ni emaw nilo emaw, ngaw a lo awm tawh phawt kha chuan forest a ni tawp mai, anni ngaihdanah kha chuan. Khami kha chu engti kawng maha tih chhiat thieng lo, working plan leh working scheme tello chuan khangho kha tih chhiat leh thil dang atana hman theih pawh a ni lo, a rawn ti tawp mai a kha a ni a, chu chu kan buaina a ni ta a. Mahse order thar a lo chhuak a lo chhuak a, 1998 ah te, 2000 ah te, 2001 ah te khan a lo chhuak chho zel a, mipui harsatna kha sawi chhoh ve zel kha a ni a. Tichuan 'felling of trees' te kha working plan leh working scheme tello chuan tih theih a nilo ve, an rawn ti a. Working plan chu reserve forest chhungah siam tur a ni a, working scheme kha reserve forest pawna siam tur kha a ni ta a, tichuan working plan han siam mai pawh kha a harsa em em mai a ni. Working plan siam hmasak ber chu Kawrthah Forest Division kha a ni a, chumi ah pawh chuan problem a tam em em nachhan chu encroachment vang kha a ni a, engzatnge min encroach a, engzatnge ram kan neih tak tih pawh kha, rin aiin thliar hran kha a lo har a. Mahse harsa tak chung khan working plan officer khan theih patawp chhuahin an bei a, the first working plan of Mizoram kha kan han nei thei ta kha a ni a. Khami basis khan tunah hian private plantation hote pawh khan an thiltih dan tur kha, an ngaihtuah a, kawng kha kan han dap sak ta kha a ni a. Mahse chumi ah pawh chuan private hovin plantation an lo siam pawh kha Government of India, Ministry of Environment & Forest chuan, an tih danah chuan a ram a kha chu an ta a ni thei lovang, a thing an lo neih sa kha chu kit rawh se, an ti leh tlat a ni. Khami a kha kan problem a ni zel a, chuvang chuan Pu Speaker, khang lai vela

harsatna Forest Department-in a tawh kha tunah hian tawh mek zel a ni a, rin aiin Ministry of Environment & Forest khu an strict em em mai a.

Nichina kan member pakhat in a rawn sawi ho zawng zawngte pawh kha kan hria a, Order ho kha Ministry of Environment & Forest-a officials hote nen khan sawiho hi a ngai zel a, kan sawi pui zel a, anmahni tello khan kan ti ngam si lova. Chuvang chuan hei hi in ti thei lo tih a ni zel a Mrs. Wahi kha a rawn quote a, Mrs. Wahi phei kha chuan he kan case hi vawikhat mah kha Supreme Court ah khan min sawi pui ngam lo reng reng, kan lawyer-a kan hman kha a ni a, a ding ngam lo reng reng a, lawyer pakhat senior deuh kha kan ruai a, khami khan min han sawisak a, chu pawh chuan kan duh ang khan min tihsak thei lo kha a ni a, chu chu kan dinhmun chu a ni. Chuvangin Pu Speaker, vawiin ah hian han sawi chian deuh hlek tul in ka hria a. Forest Department hian mipuite harsatna hi siam an tum ngai reng reng lova, Order hi a strict em avang hian, Order kha eng angin nge mipuite tana tha thei ang bera kenkawh tur ni ang tih kha an ngaihtuah reng zawk a ni. Mahse Order a khauh em avang hian duh angin hma an sawn thei lova, chu chu a thawktute pawh lehlamah chuan mipuiin an demna kha a ni a, a pawh ang reng viau in ka hria a ni.

Tin, kan Reserve Forest, a bik takin Riverine Forest hi Pu Speaker, sawi tak ang khan tunah hian lo exchange dawn ta ang ni ilang chuan khawi lai nge ram awm ang aw, tih kha kei pawh ka ngaihtuah a, tlangram hi rin aiin Forest Reserve ah hian an lo dah tam tawh khawp mai a, hei Chalfilh tih te, Tawi tlang tih te, Thorang tlang tih te, Lengteng tih te, Blue Mountain tih te Reserve Forest ah khan dah a ni deuh vek tawh a, tunah hian lo exchange dawn ta ilang chuan khawilai hi nge reserve forest ah chuan kan han declare tak ang aw, tih te kha ngaihtuahnaah chuan a awm a.

Tin, chubakah problem kan neih tura ka rin chu Tlawng dung reserve forest hi entirnan lo la ta ang ni ilang, hei hian district 4 - Lunglei te, Serchhip te, Aizawl te, Kolasib te kha a kaltlang ta a. Tichuan khami district chin te te reserve forest area chhunga anmahni district chhung zela kan exchange a nih loh phei chuan entirnan – Tlawng dung reserve forest hi a len zawng hi lo en ta ilang, Sq.Km.369 a ni ta a, chumi chu a district te te ah kan exchange te a nih loh phei chuan district pakhat chhunga mi Tlawng dung reserve forest kha dah dawn ta ang ilang, kan va dahna tur ram kha lo awm ta teh reng pawh nise, V/C ho khan an lo phal bik lo mai thei a ni. A chhan chu Tlawng dung pumpui Riverine Reserve Forest kha anmahni district chhung bika an reserve-a an ramin a tuar dawn a nih chuan an V/C te khan problem an siam ang a, an complaint ngei ngei ang a, rin aiin harsatna kan tawh thei tlat a ni, chuvangin hei hi thil tih awlsam a ni hauh lovang tih kan hriat reng atan a tha in ka ring a. Chuvangin Pu Speaker, nichina an sawi tak ang khan vawiina kan sawihona hi duh tawh ila a tha in ka hria a. Kan Sorkar hian an manifesto ah khan an dah tho bawh si a, lo kalpui chho malh malh mai sela, resolution pass chiah lo hian khulam panga hotute leh Supreme Court lawyer tha te pawh kha a tul a nih chuan lo contact ta sela, chumia a tih theih dan kawng an lo dap fuh a nih

chuan a lawmawmah ngai ta ila. Hetia resolution pui pui han pass a, tihhlawhtlin leh theih si loh a lo nih khan Sorkar tan leh kan House tan pawh hian a mualphothlak dawnin ka ring a; kan Sorkarin rilrua an lo neih tawh reng si anih avang leh an kalpui chhoh lai mek a nih avang khan lo kalpui chho mai sela, khulaiah khuan contact tur leh consult turte pawh an hre mai thei a. Anni ina an lo tih pui theih dan tur ang kha lo dap ta ang sela, tih kha Pu Speaker, ka rawt duhin ka thlawp a ni e, ka lawm e.

**S P E A K E R** : Kan dinhmun a chiang dawn emaw tih kha a chiang leh ta tlat lo mai, la sawi leh a ngai dawn ta tlat mai, Pu Zothangliana i lo ko ang.

**Pu H. ZOTHANGLIANA** : Pu Speaker, ka lawm e. Sawi ka tum lova mahse la sawi leh deuh a ngai ta a ni awm e, i tih avangin tawite tak tak chauha han sawi ve ka duh a, ka rawn ding chhuak a ni. Kan resolution wording a kha a pawimawhin ka hria a, han chhiar nawn ta ila – ‘Kan ram luipui kam engemaw zat, eizawn nana ram tha lai, Assam Sorkarin kum 1965-a Riverine Reserve Forest Area-a a lo rin lut hi Highland Area-ah sawn turin Mizoram Sorkarin hma la rawh se,’ tih a ni a. Kan party manifesto ah pawh heti lam hawi hi kan dah tho bawk a, tin, kan Minister te leh a Sorkar hrim hrim pawhin heti hawi zawng hian hmalakna engemaw chen a nei tawh a ni, tih kha chawhma lamah te pawh khan kan ngaithla nual bawk a. Chuvangin nichina kan han chhiar chhuah taka ‘engemaw zat’ tih lai leh ‘eizawn naa ram tha lai’ tih te kha rilrua hre ran chungin ngaihtuah zui ta ila a tha mai lawm ni, tih ka rilruah chuan kawng khatin a awm a. Chumi rual chuan resolution puluttu pawh hian tlawm a ngaih theih chuan Sorkar hmalakna kal mek zel a ni a. ‘Vawiinah zau zawkin, thawl hek hawkin kan sawiho thei bawk a, a lawmawm tawk khawp mai’ a tih theih phei chuan, khami china kan duh tawk theih kha chuan a tha ber turah kei pawhin ka ngai ve deuh a. Chu chu ngaihndan ka’n thawh ve a ni e. Pu Speaker, ka lawm e.

**S P E A K E R** : Sawi leh tur kan awm em, Pu P.C. Lalthanliana i lo ko ang.

**Pu PC. LALTHANLIANA, MINISTER:** Pu Speaker, tawi tea han sawi ve ka duh deuh a. Kan Resolution hi a tha khawp mai a, tin keini Sorkar lai pawhin kan Manifesto ah te Forest Reservation ina mipui tana harsatna tam tak a siam avanga hengte hi la enzui kan tum thute pawh kan tarlang a ni. Chumi atana Dan ang pawha kan theih tur leh Dan hmanga heng harsatna tam tak kan chinfel theihna

tur hian tun kan Sorkarin the Scheduled Tribe and Other Traditional Forest Dwellers Act, he House ngeia kan lo pass ve tawh ani a. Forest Reservation-in a tih buai hi Mizoram mai nilovin India ramah hian an tam em em a, chumi avanga heng Dan te pawh hi siam ani a. Vawiin nia India rama Naxalite tam lutuk ang chite pawh hi mi thiltithezawk tena ram an neih zau lutuk avang te, chenna hial pawh nei lova, eizawna pawh nei lova mipui tam tak an awm avanga Naxalite tam tak pawh hi piang a ni an ti hial a. Chuvang chuan he Dan an siam lai pawh hian Scheduled Tribe mai nilo te pawhin harsatna tam tak an tawh avangin Other Traditional Forest Dwellers tih kha a lo ni a. He Dan hmang hian mipui tam takina harsatna kan neih hi chu chingfel theih tur anga ngaih ani a. Chuvangin kan Manifesto, kan party pawhin alo tihhlawhtlin theih nan hei hi kan Sorkarin kan House Leader kaihhraina hnuai hma a la chho mek a, chak takin. Chutah chuan tunah hian Village Committee te, Sub-division level-a Committee ang te leh district level-a Committee te pawh tunah hian kan Sorkarin a din chho mek a ni a. Tin, hemi atana sum pawh hi tunah hian Central Sorkarin cheng nuai 38 min lo pek tawh kha vawiin niah hian kan han re-validate leh a, Tribal Welfare Ministry atangin pek kan ni a.

Tin, tun kum thar chho turah hian cheng nuai 10 min pe leh baw a. Tin, kan Sorkarin plan fund atangin cheng nuai 20 min han pe leh baw a, keini Department angah pawh hian. Tunah hian State level Committee te pawh engkim dinfel a ni tawh a. Hemi hnuai hian kan ram, ramngaw Forest Reservation ina engang pawha Forest Reservation Act 1980 ina a lo puan hnan tawh pawh ni mahsela, he dan hnuai hian mi ina harsatna a tawh chuan chhanchhuahna kawng a awm a ni. Chumi hria chuan kan Sorkarin huaisen takin he dan hi he House ah a lo hmang tawh baw a. Chuvangin vawiin nia tuna kan private resolution-a kan Member zahawm takina arawn tihah hian khawilai area bikah emaw han sawn ang zawnga kan han ti hi harsatna tam tak lo awm tur a ni baw si a. Chuvang chuan henge hi he kan dan lo neih tawh, he House ngeia kan lo adopt tawh hmang hian tamtak hi chu kan chingfel chho thei mai dawn lawm ni? a tul zual a hi chu tihte pawh rilru ah a awm a. Tha tak ni mahsela, a practical-a a harsat tur zia hi a langin ka hria a. Chulai hian chuan he House ina a lo pass tawh, dan kan neih te he House ah hian ka'n sawi chhuak ve a ni. Ka lawm e.

**Dr. R. LALTHANGLIANA** : Pu Speaker, tawite in, a hmasa berin kan Member zahawm tak, Pu K.Liantlinga'n hetiang resolution tha deuh mai arawn pulut hi a ngaihtuahna thinlung leh a thahnemngaihna hi kan tawmpui khawp mai a. A chhan chu, eizawn nana ram tha leh mumal tak mai kan kut hnathawktute leh a bikin land base-a eizawn naa inngat ho tana a thahnemngaih puina te hi a ropui ka ti hrim hrim mai a. Chuvang chuan he resolution hi uluk taka ngaihtuahin arawn pu lut a nia, chu chu kan House pawh hian kan hriatpui kha thain ka hria a, a chhan chu hei Lonei mi tam ber kan nia. Mizoramah chuan 70% chuang Agriculturist kan nih laia anni ina harsatna tawh lova thahnemngai taka hetiang ngaihtuahna nei thei tura arawn pu lut hi a tha hrim hrimin ka hria a.

Chutih lai chuan ngun deuh hleka thil kan ngaihtuah erawh chu a tul a ni tih hei kan House Member ten Pu Speaker, kan sawi chho mek a. Hun kal tawhah te a hminga kan Department chan te a nih tawhna laiah kan Member zahawm tak, Pu C.Ramhluna han sawi ang deuh hlek khan Central Sorkarah pawh hian an luhai pui ber Department hi a Ministry ang pawhin Case tamna ber hi Environment & Forest Department hi a ni awm mang e aw, tih tur khawpin keini pawhin kan hriatpui vena lai a awm a. Kan ngaihtlak ang khan Supreme Case a tam em em mai a, PIL a lo ni a, Central Empowered Committee an ti a. Forest hi kan hriat angin concurrence list-a awm a nih avangin a pumhlum hian Mizoram Sorkar hi kan thu bawk si lova, churang chuan inawlh dan tur chin tawk thiam a har a. A chang chuan maimitchhing deuh hleka hna thawhte kha a ngai a ni, haider thiamte pawh kha a ngai khawp mai a, chutiang chuan a khirh zawnga ngaihtuah phei chuan khirh deuh mai a ni a. Tin, hmun tam takah kan IFS Officer, kan Indian Forest Officer Service te pawh heng avang hian eng eng emaw Forest chungchangah te, tin, Wildlife chungchangahte pawh case awrh te pawh an tam bik em ni chu aw, tih tur khawpin Central ina ama subject-a a lak vena lai hian min tibuai khawp mai tih hi kan Member zahawm tak takten kan hriat tawh sa pawh ni tawh mahse langin, heng thil kan sawi lai hian kan hriat nawn leh hi chu a tul hrim hrimin ka hria a.

Tin, Mizorama buaithlak em em mai heta 'a tlang sang lai' tih pawh hi, mimal hian ram hi an lo ngah tawh khawp mai a, khalai kha engtinge kan inbiakrem ang tih hi ngaihtuah tham fe mai a ni a. A phai lampangah khan lo interest loh a nih chuan thil chinfel tur hi a tam fe thei dawnin ka ring deuh a. Engpawh nisela, he lai hi chu a tha khawp pawhin ka hria a. Chutih karah chuan uluk deuha heng thil hi kan ngaihtuah hi a tha mange aw, tih ngaihtuahna ka nei a. Amaherawhchu, a puluttu ngaihtuahna lo irhchhuah danah erawh hi chuan ka appreciate-in tha ka ti khawp mai a, kan hun laite pawh khan hetiang ang chi rawtna hi a pawlho ang leh mimal thahnemngai tak takte pawhin an rawn nei tam a. Ama'rawhchu han kalpui dawn tak tak khan State Sorkar thuneihna pumhlum a nih lohna laiah hian kan Dy. Speaker zahawm tak sawi ang deuh hlek khan refer chhoh ngai a ni nen a buaithlak khawp mai a.

Kum 2006 January thla kha niin ka hria a, the Schedule Tribe and Other Traditional Forest Dwellers Act 2006 a lo chhuak a. Keini pawh khan kan LAD Minister zahawm tak sawi ang khan kan han exercise ve a, ngaihtuahna kan hmang a, a buaithlak ang reng khawp a, A tum ber kha chu Tribal Forest Dwellers kan tih kha, 'kum 75, kha ramah khan lo awm tawh an nih chuan hactre 4 chanpual an nei hlen thei ang tih kha' rin ai khan thlahchhawng leh engemaw han tih dawn khan a buaithlak ve ang reng khawp mai a, a harsa em a ni a practical khan, a thu chuan a tih theih mai. Amaherawhchu hengte pawh hi a lo chhuahna hi India ram State thenkhatah harsatna Mizoram nena inang lo tak tak a awm a ni. Harsatna han chinfel theihna mai ang chi India ram state thenkhatah chuan a awm a. Mahse Mizoram angah kan han tih dawn khan a lo inang lo em em a Pu Speaker, khatiang te te khan keimahni ram context azir hian ngaihtuahnate kan neih thiam a tul mange aw, tih ka ngaihtuah a. Churang

chuan darli thleng resolution tih huna darkar engemawzat kan han sawiho hrim hrim hi chu a hlu hle in ka hria a. Hei hian engemaw taka kan hotuten ngaihtuahna nei zui turah pawh ngai ta ila, tih kha ka'n sawi duh a ni. Engpawhnisela, a puluttuin ngaihtuahna a rawn neihna rilru hi chu ka appreciate khawp mai a, ama'rawhchu, kal zel dan tur laiah erawh hi chuan House-a pass kha helaia technical neuh neuh thil ngaihtuahna thui tak kan neih hmasak loh chuan engemaw kan awkai ti mai ila, harsatna kan nei thei ang em aw, tih kha ka rilru ah hian a awm deuh a. Chu chu tawite in ka'n sawi ve lawk a ni. Ka lawm e.

**S P E A K E R** : Nia, dan hi a kal a kal a, Inner Line Regulation kan tih te pawh hi British-in an ram awp mite savage ho laka an ram humhalhna atan, hemi bak hi va kal suh u, an tih lam kha ni awm a ni a. A kal a kal a, keimahni Mizo fate humhalhna danah khan a kal ta daih mai a, khu tilam an rawn luh mai theih loh nan. Chuvangin kan District Council hotuten kan ram thing leh mau humhalhna atana an dan siam kha a kal a kal a, tun tumah chuan kan lo buaipui ta daih mai a. Chutiang vel chuan ka rilruah a lo lang a. An Riverine Reserve kha an tih lai hunah kha chuan kan tana a thatna tur zawka an tih, mahse a kal a kal a, kan tana thatna lo ni ta lo niawm tak khan a kal ta mai kha kan buaipui mek chu a ni mai a. Chuvangin kan sawiho kha a bengvarthlak khawp a ni.

Member ten min lo ngaithiam ula, helai hi ka'n chhiar zawk mai ang e. Tun maiah khan News vanduaithlak kan lo hria a. New Latoh, Mara District ah Bus electric-in a man a, a hmunah hetiang hian an thi nghal. Lawngtlai khua 4, Maisa ah 3, Lawfe ah 1, Demari ah 1, Lawngban ah an thih thu Pu V. Vanhupa, EM Mara-in a rawn report a ni.

Hetia puan lai mek hian ka'n puang leh nghal ang a. Khu tilai khu Pu Nihar Kanti Chakma bial a ni a, mahse a V/C lam neitu chu Pu Dinga bial an ni a. Thanzama Sora khua a ni, mi an thih chhan hriat loh kha, an thi phawk phawk mai a, pariat an thi tawh a. Chuvang chuan a bial neitute pahnih an nih theihna a awm a, Thanzama Sora kha a V/C lamah khan Pu S. Dinga bial lam V/C huam a ni. Mahse MLA Vote lamah khan Pu Nihar Kanti-a bial a lo nia. An pahnih khan tlan phei vang vang an tum niin kan hria a. A chhan leh vang te engnge a la Chiang chiah lova, a vanduai thlak khawp mai.

Tichuan kan sawihona duhtawk dawn tawh ila. A Resolution neitu kan koh hmain Minister kha sawm leh ila. A tirah kha chuan Minister ang ni lovin Member angin a sawi nge ka hre lova. Minister-in Sorkar lam dinhmun te han sawichiang se a tha ang, i lo ko ang.

**Pu H.ROHLUNA, MINISTER:** Pu Speaker, ka lawm e. Ni e, hei Resolution hi tha tak tak mai kan ngah a. Chuvang chuan helai hi keini pawhin a party ang pawha kan ngaih pawimawh a nih avangin sawi thui vak ngai lovin ngaihdan kan siam thei mai lawm ni? tih ngaihtuahna avang khan thahnemngaih thilah a resolution dang te pawh kan kalpui theihna zawk tur ngaihtuahna rilru nei khan ka'n ding deuh thut kha a ni a; min hriatthiam pawh ka duh a. Ama'rawhchu, hei Member ten thahnem kan ngai a, ramngaw siam chungchangah te, tin, kan mipuite eizawna atana hma an lakna tur ram an neih theih dan tur chungchangah pawh thahnem an ngaihdan te Member tena kan han sawi dan atang khan a lang chiangin ka hria a. Vawiin nia kan thil sawi ho, kan Member zahawm takin a resolution arawn putluh kha a lawmawm khawpin ka hria a.

Hei, kan han sawi tak hlawm ang khan forest reserve awm sa, de-reserve leh tura han tih hi Concurrent List a nih avangin a harsat dan te kha chu kan hre tlang theuh ang a. A process hi thil namai a ni lova, chuvangin Riverine Reserve Forest kan han neih ho pawh hi de-reserve leh a tlangrama sawn leh tur chuan thil namai a ni dawn lo a ni, tih kha chu kan hre tlang vek a, sawi nawn ngai lovah ka ngai a. Chuvangin helaiah hian kan sawihona hi a tawk e, kan tih mai pawhin kan thahnemngaih dan a kha chu a lang vek tawh mai a. Tin, Department-in theih ang ang hma an lo lak tawhna leh an lak leh zelna tur pawh hi a tawk tawh viau e, kan ti a nih pawhin helaia kan sawiho tawhna eng atang kha chuan Department pawhin kal chhoh zel dan tur kha chu an hre turah ka ngai a. Engpawhnise, forest reserve lo awm tawh hi han de-reserve leh a hmun danga han sawn mai tur hi chuan tunah Supreme Court thu pek te kan hria a. Tin, Ministry-in Forest Conservation Act 1980 zul zuia an kalpui dan te kan hre vek tawh a. Hengte avang hian a kalphung pangngaiyah pheih chuan reserve forest hi Net Present Value te pek a lo ngai a. Tin, compensatory afforestation te pek a lo ngai a, chutiang chuan ram danga kan thlak thleng dawn a nih pawhin a procedure hi a khirh hle a ni. Chu chu a nih avangin tunah hian thil namai a ni dawn lo a ni, tih kha chu resolution kha kan pass a nih pawhin kan hriat lawk tha ka ti a. Ama'rawhchu, mipuite tana tha zawk tur leh nakin zel atana ram ngaw zau zawkte kan lo neih theihna tur a nih erawh chuan helaiah hi chuan theih tawp kan chhuah tur a ni a. Nakin lawkah, House ah kan pass a, chuti khati kan in tih a, hma la thei mang lo emaw zawnga han in tih leh mai palh te pawh thil awm thei a ni. A chhan chu keini thuneihna piah lam a ni, tih kha chawhma lama ka sawi pawh khan ka sawi tawh a. chu chu Central lamah Ministry ah te pawh a theih ang ang hi chuan kan lo thlen tawh tih thu pawh ka sawi tawh a.

Tin, tunah pawh hian House ina kan han pass chuan a procedure kha a ngai tho a ni dawn a ni. Concurrent list a ni a, Ministry ah kan han ti ang a, tin, Ministry pawhin thutlukna a siam ngam loh chin pawh kha awm thei a ni. A chhan chu kan reserve forest hi affidavit-in Supreme Court ah thehluh vek a ni a, kan Member zahawm tak Pu Ramhluna pawhin a sawi tawh a, khatiang khan lo thehluh vek tawh a nih vang khan khang ang kha Supreme Court phalna lak a ngai a ni. Chuvangin helaiah hian thil khirh tak a awm a, a chhan chu vawiina kan resolution hi State Sorkar ina kan thuneihna piah lam tho in nei ang tihna thinlung atanga lo chhuakah ka ngai a. Member zahawm takin he resolution a'n



tih dawn pawh khan thil awmzia tur zawng zawng chu hre vek turah ka ngai a. Vawiin nia kan ram mipuiten ram an mamawh a zirin kan eizawna kal zel avangte in hei hi chu siam rem dan a awm lawm ni, tih ngaihtuahna thinlung puin helaia resolution a rawn siam pawh kan luipui kam engemaw zat, a zawng zawng a ti lova, eizawna ram tha engemaw zat lai a tih te, a theih chin kan consider turah ka ngai mai a. Nakinah hma kan la thei a nih chuan chumi rilru pua helai hi kan neih a thain ka ring a, kan riverine reserve hi vawi leh khata tlangram lama sawn tur tih thinlung a resolution neitu pawhin a put ka ring lova. Tin, chutih rual chuan a ram thalai leh eizawnaa hmantlak lai chu siam rem dan a awm lawm ni, tih ngaihtuahna thinlung neia he resolution hi rawn pulut ni ah pawh ka ngai a ni. Chu chu a nih vangin he resolution hi he House-in tha a ti a nih erawh chuan, a Sorkar ang pawhin hma kan la zui turah pawh ka ngai a. Amaherawhchu, he House zahawm takin min hriatpui tura ka duh chu harsatna sut tur tam tak a awm a, theih tawp pawh han chhuah mah ila vawi leh khata thil kaltlang mai thei a ni dawn lo a ni. Chu harsatna awm mekte chu rilrua hre saa kan ram thatna tur zawk leh ramngawte kan neih thatna tur zawk kawng leh eizawna kawnga kan mipuite leh thalaiten an neih leh theih dan kawngte ngaihtuahna thinlung neia he resolution hi kan lo pass a nih pawhin chumi rilru nei chuan kan pass a thain ka ring a. Chu chu Pu Speaker, ka'n sawi theih dan tawk chu a ni mai e. Ka lawm e.

**S P E A K E R** : Tunah chuan Sorkar lam dinhmun te kan hre tawh a. Member hrang hrangin kan ngaihdan te zalen takin kan sawiin ka hria a. Kan resolution neitu kan lo sawm tawh ang a, kan sawihona han wind-up sela, adopt han dil nghal sela, Pu K. Liantlinga i lo sawm ang.

**Pu K. LIANTLINGA** : Pu Speaker, ka lawm e. Hei vawinah ka Private Resolution te kan han sawiho a, mi 15-in kei nen 16 laiin kan han sawiho hi a lawmawm hlein ka hria a. Tin, Member sawi zawng zawngte pawh khan an duh lohna a awm hran lem lova, fimkhur deuh a tul thute an sawi a. Tin, thil a harsat dan tur chungchang thute an han sawi a. Tin, kan Minister te, kan House Leader te, kan Group Leader te pawhin a support zawnga an sawi kha lawmawm hlein ka hria a. Tuna kan resolution hi Congress, tuna Sorkar lai mek manifesto ah te a lo awm a, a awm tih ka lo hre bik lova. Tin, keini pawhin kan Policy bung 3, Economic Policy ah khan clause 10 naah kan dah a. Khatiang khan ram tana thil tha duh leh ngaihtuahna hmang theuh kha chu lo in hre tawn miah lo mah ila, thil tha hi chu a tha a ni tih kha a chiang hlein ka hria a, lawmawm ka ti a ni. Thil tha, heng kan ram economy siam tha tak tak tura hlawhtlinna tur atana pawl hrang daih ve ve pawhin a Policy leh Manifesto-a kan lo dah kha a ropui hlein ka hria a.

Tin, helai thil hi tuna kan ram economy siam tha tak tak tura kan duh theuhna atanga thlir chuan kan tih hmasak ber turte zinga mi pawh niin a lang a.

Politics ah hian thil kan ngaihtuah ngun hle a ngai a, kan Member hrang hrang pawhin a harsat dan tur te pawh an sawi a, ama'rawhchu, ram leh hnam siam tur chuan thil harsa hi kan sut chhuah a ngai a, thil harsa hi kan tawn tlang a ngai a, chung ang tur chuan kan politician te hian ngaihtuahna hman theuh a ngai a ni. Hei hi ram ropuiaah te pawh ram ropui lo deuhah te pawh a ngai. Hemi kawngah hian a harsatna lam te, a thatna lam te, a that lohna lam te, harsatna awm thei te, hlawhtlinna awm thei te sawi tlan a, thil hlawhtling tura tan kan lak tlan a ngai a ni.

Sorkar hnathawkah han kai lawk ila, Sorkar hnathawk chuan dan siamtuten dan an siam hnuaiah hna an thawk a, a theih loh tih hi a awl em em a ni. Amaherawhchu, dan siamtu lam chuan dan chu a siam tha a, tunah pawh kan House chhungah te pawh dan siam that tur tun Session ah hian kan nei a, thil harsa chu kan siam that zel a, kan in support chhoh zel te kha a thain a lawmawm em em in ka hria a.

Tin, kan han debate te pawh a lawmawm ka tihna chu, a ruling lamte pawn a tha zawngin an sawi a, a thalo zawng sawi te pawh an awm a, tin, opposition lamah te pawh support lo leh harsatna sawi te pawh an awm a, tin a thatna lam zawnga sawi te pawh kan awm a. Hetiang anga kan ram rorelna hi a kal a nih chuan India ramah hian kan la lawr thuaiin ka ring hial a ni.

Kan House Leader pawh a fakawm ka ti a, opposition kan ni emaw, ruling kan ni emaw sawi lo a thil tha atana ke a penna chungchangah te, a thusawi nichina kan han hriat angah te pawh khan ngaihthlak kha a nuam em em in ka hria a. Tin, heng thil harsa ang te hi chu wawi leh khatah tih theih a ni lo. Amaherawhchu, ram tha lai lai tuna kan Minister zahawm takin a sawi ang khan, ram tha lai te kha a face manner-in kan la tifel chho ang a, hmalak hrim hrim kha thil awm niin ka hria a, wawi leh khata implement thut turin heng hi thil kal thei a ni lo. Kum 15, kum 20 ah nge kum 30 ah nge, thangthar thalai rualten an la rawn chhawm chhoh zel tur thil tha wawinah hian kan chhawp chhuak dawn ni te pawhin ka hria a, lawmawm ka ti a.

Tin, ram chungchanga a harsat tur thu te pawh kan Member thenkhat atangin sawi a awm a, low lying area ah te chuan kan sawi ang khan Schedule Tribe and Other Traditional Forest Dwellers recognition of Forest Right Acts 2006 te pawh kha kan han pass a, khangah te pawh khan tribal te tana right te pawh siamna a awm a ni. Zawi zawiin khung luipui kam te pawh kha an lo chen tawhna a nih chuan an neih tho tho a ngai mai thei a, an rawn claim a, an rawn tihbuai ai kha chuan. Wawiin niah in remsiam chhoh zel dan kha ruahmanna awm turah ngai ta ila, kan Minister zahawm takin a sawi ang khan. A harsat dan tur leh a kalphung kha chu kan hre lo a ni hauh lova, wawiin nia House Member zawng zawngte hian kan hre vek tho in a rin awm a, kan state a tawp a ni lova, ka move naah ka sawi ang khan thenkhat chuan a theih loh ti mai te pawhin an sawi thin a ni. Politics ah chuan thil theih loh a awm lova ni, chuvangin tih kan tum ang a, a then chuan independent te pawh an tum a, an thei lova, a thenin an thei a. Khatiang khan ram leh hnam tana thil tha turah

chuan Central ah te pawh kalin kan sawi ve ang chu, Jt. Committee emaw, Join Team te siamin thuhnuai rawlh taka kan tihte pawh a ngai ang, tan lak tlan zel a ngai a ni.

Tin, Forest Right Acts 2006 ah khan nichin khan Dr. Thangtea'n a sawiah khan kum 75 awm chin tan tih a ni a, amaherawhchu, other traditional dweller tan bik a ni a, tribal tan kha chuan a ni lova, other traditional dwellers ( Speaker : 1935 atanga lo awm tawh tih a ni lo maw, 75 ai mah khan ) ho kha an ni a, keini kha chu kan ni ve lo a ni tih kha kan hriat chian a thain ka hria a, kha kha ka sawifiah duh a. Hetianga hun tha tak mai kan nei tlang thei hi a lawmawm hlein ka hria a. Kan Speaker-in a lo sawi tawh ang khan kan ram hruaituten thil tha tur zawk nia an hriat kha kum 50/60 dawn a lo nih takah chuan thil remchang lo zawk a nihna lai a lo awm a, siamthat hna te tin, a thar siam hnate pawh kha he kan House hian a thawh zel a, kan ram tana thil dik leh tha tur nia a hriatah chuan huaisen taka kan sual chhuah zel kha a thain ka hria a, kha kha kan wound up na chu ni mai sela. Tunah ka resolution hi ka'n chhiar chhuak ang a, khawngaih taka adopt turin House Member te ka dil duh a – “Kan ram luipui kam engemaw zat, eizawn nana ram tha lai, Assam Sorkarin kum 1965-a Riverine Reserve Forest Area-a a lo rin lut hi Highland Area-ah sawn turin Mizoram Sorkarin hma la rawh se”, tih hi adopt turin ka rawn dil e, Pu Speaker, ka lawm e.

**S P E A K E R** : Awle, resolution neitu Pu K. Liantlinga'n a resolution – “Kan ram luipui kam engemaw zat, eizawn nana ram tha lai, Assam Sorkarin kum 1965-a Riverine Reserve Forest Area-a a lo rin lut hi Highland Area-ah sawn turin Mizoram Sorkarin hma la rawh se”, tih kha kan adopt thei dawn em tih buk a lo ngai ta a. Kan buk ang a, remti apiangin remti ti rawh u le... remti lo kan awm em, remti lo ti rawh u le... remti lo kan awm lo maw. Chair lam chuan ka sawi chiangin ka hria, Member lam khan duhthlan tur kha in chiang lovin ka hria, mahse duh lo awm lo, duh ah kan kal ang. Pu K. Liantlinga resolution – “Kan ram luipui kam engemaw zat, eizawn nana ram tha lai, Assam Sorkarin kum 1965-a Riverine Reserve Forest Area-a a lo rin lut hi Highland Area-ah sawn turin Mizoram Sorkarin hma la rawh se”, tih chu House-in lungrual takin a adopt ta a ni.

**Pu K. LIANTLINGA** : Pu Speaker, ka lawm e.

**S P E A K E R** : Lo adopt ta lo mahse pawh tih loh tur kha ka'n sawi duh a. Hnam chu a upa tawlh tawlh a, phai ruamah, chak lak sam, thingtui lak samah an insuan thla tho tho. Mizo hnam pawh hi tun atanga kum 200 ah chuan tlangchhipa awm peih kan awm tawh lovang. Luipui kamah kan insuan vek ang. Rel kawng a awm ang, tuikhuah a awm ang a, tuikhuah kawnga luipuiyah

kalpawhna a awm tha ang, tlangchhipah kan awm peih chuang lovang. Tin, indo thu hla ah te tlangchhip kha Jet fighter te tan beih a awl lutuk, phai ruam kha a him zawk daih. Chuvangin hnam upa reng reng tlangchhipah an awm peih tawh ngai lo. Kan hnam pawh power a tam anga luipui kamah freezer nen, fan nen engkimah luipui kamah kan la chhuk dawn tho tho a ni. Tlang ram chu a la ngaw dawn tho tho ka ti a nih chu. Awle, tichuan hun kan la nei a, resolution pahnihna ah kan kal ang a. Kan resolution no. 2 na chu Pu Joseph Lalhimpuia Resolution a ni a. A thu chu, “Ram hmasawna bul Power kan intodelh theihna tur atan Sorkar hmalakna te hi lawmawm kan ti” tih ani a, hei hi House-in kan adopt thei dawn emaw, a resolution neitu Pu Joseph Lalhimpuia move turin ilo sawm ang.

**Pu JOSEPH LALHIMPUA** : Pu Speaker ka lawm e. Tunah hian ka resolution rawn put luh “Ram hmasawna bul Power kan intodelh theihna tura kan Sorkar hmalakna te hi lawmawm kan ti” tih min ngaihtuahpui thei tura Member te in lo awm hi lawmawm hlein ka hria a. Tin, a sawina hun remchang tha tak mai ka nei thei hi Pu Speaker ka lawm hle a ni.

Chipchiar ang reng deuh, thui vak lova hun lak chu kan tum ang a, khawngaih takin ka lo la rei deuh a nih pawhin min lo hrethiam ula. Vawiiinah hian ka vannei hlein ka hria a. Mizoramah mipuite ti ti ah mi ngaihdan te, mi rin dan leh ti ti leng velah thu dik tawh lo tarlan leh chutianga mi pawhin ngaihdan an siamna boruak a awm a, chumi chungchangah chuan kan Sorkar neitute leh kan hruaitu abik takin kan Chief Minister zahawm takin Power lama kan intodelh theihna tur atana a hmalakna thenkhat erawh hi chu han tarlan tel a thain ka hria a. Chuvangin vawiin hi Zoram mipuite hnenah thudik kan puanchhuahna hun remchang tak a ni bawkin ka hria a, ka lawm takzet zet a ni. ‘A thutiama ding thin’, ram hruaitu han tih te, NLUP han tih te leh mi hnuaihngung zawk te, mirethei zawkte khaianna programme tih han tarlan te hian loh theih lohvin vawiiina kan House Leader zahawm tak, kan Chief Minister ni bawh Pu Lal Thanhawla hming leh a hmel hi Zofate thinlungah leh mitthlaah a langin ka ring a.

Chutih lai erawh chuan Power lama kan hmasawna te leh kan intodelhna chungchang te kan sawi hian kan Chief Minister zahawm tak leh Congress Party hi tlema sawi hnaawmna deuh leh a chang phei chuan mombati te nena tehkhin lek lek ang te in mipui hnenah tarlan a ni thin a. Chuvangin vawiiinah Power lama kan ram dinhmun han tarlan pahin a statistic te pawh tlemte han tarlan ka duh a. Chu chuan thil kal tawh leh kan thil neih meka Congress Party leh kan Chief Minister zahawm tak, tuna min kaihrui mektu hma lo lak tawh dante pawh hi mipui hnenah chiang lehzualin kan tarlang thei dawn niin ka hria a. ka lawm a ni.

A bul te ka'n sawi ang a, UT kan nih hma District Council kan nih hunlai atangin Power lamah hian Mizoram hi Assam State Electricity Board (SEB) kan tihin min enkawl thin a. 1962 ah Aizawlah hian kilo watt 75 DG set dah a ni a. Chu chu Mizorama power house hmasa ber a ni. 1975 March ni 20 atangin Assam State Electricity Board hnuai atangin Mizoram Sorkarin amahin electric chungchangah mawhphurhna a la ve ta a, hetih hunlai hian PWD hnuaiiah Electric hi a awm a ni.

Tin, wawiinah hian kan ram hruaitu hmasate pawh han tarlan tel a tha in ka ring a. District Council kan nih hunlaiin hun rei tak tawhah khan Tlabungah khuan Telegram a awm thin a. Chu chu Zofate leh Zoram leh ram pawn lampang India ram leh khawvel hmun dang inbiak pawhna awmchhun a ni. Tumkhat chu Tlabungah Telegram hi rei tak a chhia a, electric chungchang avangin, khatihlaia kan ram hruaitute khan complaint te pawh an lo siam tawh thin a, mahse a hlawhtling hlei thei lo va. Tum khat chu kan ram hruaitu hmasate zinga mi Pu CH.Saprawnga khan Parliament-ah he thil avang hian Cut Motion putluh tum a, amaherawhchu a changtu Minister zahawm takin, "Zoram i haw thlen hmian Tlabunga in telegram hi siam that a ni ang, chuvangin he i Cut Motion putluh tum hi hnukdawk leh mai rawh", a ti a. Chutiang chuan a lo inhnukdawk a, Zoram a thlen hmian siam that a ni ta a ni, chutiang chu kan hruaitu hmasate hma lo laknate pawh a ni a. Pu Speaker hmanni khan vanneihthlak takin wawiina ka Resolution putluh tur nena inmil tak mai hian Delhi-a ka zin naah lehkhabu tha tak mai pakhat ka hmu a, chu chu Unleasing India Powering the Nation tih, tuna Government of India Law Minister zahawm tak M.Veerappa Moily ziah a ni a. Ka chhiar ka chhiar thin a, chutah chuan wawiinah Power lama kan ram hmasawna turte leh kan hotute hma lo lakna hmasa te nen hian inmilna tur tam tak awmin ka hriaa. A zavaia sawi phei chu ka tum lova,amaherawhchu UPA Sorkar Congress kaihhruai, Sorkar ina hma a lakna Bharat Nirman hnuaiiah RGGVY hnuaiiah hian Power for All by 2012 tih mission ropui tak mai neiin tunah hian India ram pumpuiaiah Mizoram pawhin kan hriat angin chutiang chuan hmalak a ni a. Hengte pawh hi a ropui hlein ka hria a.

He lehkhabu tarlan thil pakhat ka han tarlan duh chu Pu Speaker, India ram hi khawvelah Power hmang tam 6-na lai a ni a, hun rei loteah chuan China dawttuah a awm thuai dawn a ni tihte tarlan a ni a. Kan power siam chhuahna te hi Hydel Power kan tih te, Natural gas leh coal lam atang te, Neuclear Energy lam atangin a ni tlangpui a. Chungah chuan North East India hi potential kan nei tha em em a. Nichinah kan Chief Minister zahawm tak pawhin a sawi tawh kha, India ram pumpuiaiah hian Hydel Project atangin Megha Watt 84044 awm thei tura beisei a ni a. Chung zingah chuan North East India-ah hian Megha Watt 34926 siam chhuak thei tura beisei a ni a, India ram pumpui atanga siam chhuah theih turin 41.50 % lai N.E India ah hian a awm a. Hemi Megawatt 34926 ah pawh chuan Mizoramah nichina kan Chief Minister zahawm takin a sawi ang khan Megawatt 4500 lai chu Mizoram lui atang pawhin siamchhuah theih beisei a nih thu a tarlan kha. Tin, Natural Gas reserve hi kan nei tha khawp mai a. Hei 151.68 billion, chu chuan power megawatt 7500 kum 10 chhung atan siam theihna hi N.E ah hian a awm a. Tin, coal reserve hi kan nei tam em em a, million 864.78 tone kan nei a. Chu chuan power megawatt 240 nitinin siamchhuak sela kum za chung chutianga daih tur chu N.E India ah hian kan nei a. Chungte chu Pu Speaker, i hriat angin Zoram hmun hrang

hrangah natural resources haichhuaktu tur Sorkarin chak takin hma a la a, theihtawpin hma a la a Bairabi bulah an hmuh beisei tih te chanchinbuah kan chhiar a. Hengah te hian kan ram hian nasa takin hausakna tam tak a nei a. Chungte chu nakin lawkah chuan hai chhuahin a la awm ang a, power lamah hian nasa takin kan intodelh ang tih ka ring a. Chungte chu tawitein ka han tarlang duh a.

Tin, statistic tawite ka han tarlan duh chu hei a department lam atangin ka la a Pu Speaker i remtihna in Mini hydel project kan tih hi tunah hian 18 lai hman mek a ni a. Chung chuan fur ruahtui tam deuh laiin megawatt 17.35 vel tharchhuak thei kan nia. Hei tak hi Pu Speaker pawimawh ka tih chu a ni. Mizoram in a tharchhuah te a tam vanglaiin megawatt 17 bawr vel Hydel project 18 atanga a tharchhuah hian Congress Sorkarin a bul tan leh a siam hi Hydel project 14 a awm a ni. Kan unaute P.C Sorkar hunlaia an tan kha project 2 a awm a, MNF Sorkar ina an bul tan hi project 2 a awm bawk a. Chutiang chu kan hruaitu hmasa te, a bik takin kan Chief Minister zahawm tak kaihhraina hnuai a Congress party-in Zoram power intodelh leh neihna tur atana a hmalakna a ni a. Chutih lai mek chuan thudik ziktluak lo hmangin Congress party chu power ngaihsak lo, power siam ngai lo, a tlachawp ring, mombati Sorkar tih te vawiin niah vantlang ti ti deuhah kan thiante opposition lam amite pawhin sawi nuam an tih a ni. Amaherawhchu, statistic-ah hian chiang takin kan hmu a. Mizoramah Mini Hydel Project 18 zinga 14 hi Congress Sorkar bultan leh siam a ni a. Tunah hian P.C. party-n pahnih an nei a, MNF party-in 2 an nei bawk a. Chung atangte chuan Congress Sorkarin hun hmasa lamah hma a lo lak tawhna te pawh chiang takin a langin ka hria a. Chu chu vawiin te hi tarlanna remchang a niin ka hria a, ka lawm em em a.

Tin, tun kum reilote, Sorkarna hei kum hnih emaw lek kan han neih ve leh chhunga kan hotute leh Sorkar hmalakna hi a ropui tak zet zet in ka hria a. Tunah hian Pu Speaker, tawite tein ka'n han tarlang ang a. Tuirial Hydel Project 60 Mw chhuak thei kha kan Sorkar hmasak 1988 ah bultan tawh a ni a. Amaherawhchu, compensation avangin harsatna tam tak a awm a, kum 2004 ah chawhlan tawh a ni. Mahse manifesto-ah Congress party-in a dah ang takin Pu Speaker, i remtihna in manifesto No.3 na (Economic Services ah chuan No.17 naah hmasawna ruhrel tih tarlan a ni a) ah chuan 'power' tih a ni a. Chutah chuan Hydel Project lian tham Congress Sorkar hmasa bul tan tawh, entirnan – Tuirial tih te, MNF Sorkarin a hluihlawn tawhte chu tipuitling turin hma a la ang tih te tarlan a ni a. Chung tarlan ang tak chuan 2011 January Ni 14 ah chuan Tuirial Hydel Project siam puitling turin Central Sorkar atangin pawmpuina hmuh tawh a ni.

Pu Speaker, hun bul lama ka sawi ang khan a thutiama ding thin tih nen hian a la inrem em em a ni. Chumi atang chuan 12% 7.2 Mw hi a thlawna kan dawn tur a ni a. Tin, Colodyne 460 Mw pe chhuak thei hi kum 2008 kan Sorkar hlim te ah khan MoU sign fel a ni a. Nichinah kan hotuten an sawi tawh a, tunah hian NTCP te a hmunah awmin bul an tan dawn mek a. Heta tang hian

13% hi Mizoram Sorkar ina a dawn tur a ni a. Tin, Hrawva 5 Mw pe chhuak thei tur hi tunah hian thawh mek a ni a. Chung Hydel Project pathum a thawh mek atang chuan a thlawnin megawatt 67.04 hi Mizoram Sorkarin a neih tur a ni. Tunah hian Sorkarin ruahman mek a nei a, Pu Speaker, Lungreng Mw 815 pe chhuak thei chu March Ni 23, 2010 khan MoU signed a ni a, hei NEEPCO te thawh tur a ni a, heta tang hian 13% mega watt 105.105 hi Mizoramin a thlawna a dawn tur a ni.

Tin, Chhimtuipui mega watt 640 pe chhuak thei hi March Ni 13, 2010 khan MoU signed fel a ni a, chuta tang chuan 13% megawatt 83.2 hi Mizoram Sorkarin a thlawna a dawn tur a ni a. Tin, Mat Lui megawatt 76 pe chhuak thei tur hi kum 2010 March Ni 23 tho khan MoU NEEPCO te nen signed a ni a, chutah pawh chuan a hmaa mite angina 13% power pek chhuah hi Mizoram Sorkarin a nei dawn a, megawatt 9.48 hi a thlawnin a hmu dawn a ni. Tichuan a la thawh tan chiah loh MoU singed tawh, thawh mai tur atang hian a thawh zawh hunah Mizoram Sorkarin a thlawnin megawatt 199.3 a nei dawn a, tunah hian hmalak mek engemaw zat Sorkarin a ni a. Tuivawl 42 Mw pe chhuak thei E. Phaileng bula awm chu tunah hian MS Subha Marketing Ltd. Kolkata te letter of intent pawh pek a ni tawh a, MoU pawh draft-in Mizoram Sorkarah an rawn theh lut a, ngaihtuah mek a ni. Tin, Tuirini 38 Mw pe chhuak thei Sesawng bul ami hi a hma mite ang tho khan SPML Kolkata tho te hnenah letter of intent pawh pek a ni tawh a, MoU draft pawh Mizoram Sorkarah an rawn pe tawh a, chu pawh chu ngaihtuah mek a ni a. Tin, Bairabi 80 Mw pe chhuak thei hi chutiang tho chuan. A tir takah chuan investigation hi National Hydrolic Power Corporation-in kum 1982 khan an thawk tan a. 1984 ah DPR siam peih a ni a. 1996 ah survey kim lo lai te siam tha a, DPR siam kim turin Brahmaputra Board rawih a ni a, DPR thar hi kum 2000 khan peih a ni a. Tunah hian clearance engkim tih fel tawh a ni . Hei pawh hi M/S AASU Project Pvt. Ltd, Kolkata te hnenah letter of intent pek tawh a ni a, draft MoU pawh Sorkarah an rawn theh lut tawh a. Kan sorkar hotuten tunah hian an ngaihtuah mek a. Tin, Tuichang megawatt 110 pe chhuak thei chu tunah hian Central Water Commission-in DPR an siam mek a. Hun reiloteah a peih kan beisei bawk a. Chungte chu Pu Speaker, vawiina Sorkar kum reilote, kum 2 erh awrh Sorkar chhunga bul a tan leh a thawh mek te, a tlangpuia ka'n han tarlan duh a ni a. Tarlan kim loh tam tak a awmin ka ring a.

Tichuan khang kan han tarlante kha ti hian a tawi zawngin ka'n sawi ang a. A vaiin Hydel Project kan thawh mek leh MoU kan signed tawh te, tunah hian MoU zirchian mekte nena Sorkarin hma a lak mekna zawng zawngah hian megawatt 2226 pe chhuak thei tur a ni a. Chutah chuan MoU kan signed tawh dangte nen, kan la signed loh te pawh hi 13% hi a thlawnin lo chang dawn ta ila, megawatt 300 aia tam hi Mizoram Sorkarin a thlawnin power a nei dawn a ni. Chutih lai chuan Pu Speaker, tunah chuan kan power demand forecast-ah chuan Central Electricity Authority-in a approve tawhah chuan 2021-2022 kum te pawh hian megawatt 180 hi Mizoramin tla tura min chhutpui dan a ni. Amaherawhchu, ram hmasawn zelah Industry te a lo thang ang a, hmanna a tam ang a, heng aia tam pawh hi a ni thei a. Vawiinah chuan Central Electricity Authority ina min approve dan, Power Survey Report-in a tarlan dan chuan kum 2021-2022 thleng

pawh hian megawatt 180 hi tla turin min ngai a. Chutih mek laiin a thlawn liau liaua kan neih tur pawh hi megawatt 300 aia tam a ni

Pu Speaker, hemi bakah hian tawite ka'n sawi belh leh duh chu Ministry of Renewable Energy atang hian nasa takin kan hotute hian hma an la a. Kan Chief Minister zahawm tak te, kan UD&PA Minister zahawm takte an hmalakna a ropui hlein ka hria a. India rama khawpui 12 State 9 zingah Solar city-a puan tura Sorkarin a tih zingah Central-ah duhsak, fachuam kan tih thin kha a takin a thleng a ni tih helai thilah pawh hian a langin ka hria a. Aizawl city chu tlemte zingah chuan Solar city ni tura thlan leh puan a lo ni tawh a. Tunah hian master plan pawh Ni 14 tun thla kan hman mekah hian master plan pawh theh luh tawh a ni a. Hetah hian kan mithiamten an chhut dan chuan solar energy atang hian Aizawl khawpui ina kan power hman 10% hi kan nei thei dawn nghe nghe a ni.

Pu Speaker, solar hi a pawimawh khawp mai a. Kum 2009 kumah khan kan Chief Minister zahawm tak zuiin Plan discussion-ah Delhi-ah ka zuk kal ve a. Chutah chuan kan Minister zahawm tak Pu Liansailova hovin Rastrapati Bhavan ah, Mizo officer te inah tuk khat chu breakfast eiin kan kal a. Chutah chuan Rastrapati Bhavan compound zawng zawng khu solar energy hmanga an lo tih en te, tui an lo lum te, choka-a eirawngbawlna te pawh chutianga an lo tih chu a ni a, a ropui hlein ka hria a. A hnuah Internet atangte in kan han en chhunzawm a. Nimin maiah khan kan LAD Minister zahawm takin street light atan ringawt pawh hian, "LAD chuan kum khatah vaibelchhe thum dawn lai a bill a chawi a ni", a ti a. Chungah chuan a chhe siamna te leh a thar thlakna te a tel em, ka hre lova, a bill a nih chuan tel lo turah ka ngai a. Engpawh nise, solar energy atanga power nasa tak siam chhuak tura kan Chief Minister te leh UD&PA Minister te hmalakna hi kan ramah a la tangkai dawn hle a. Tunah hian a lawmin ka hria a.

Tin, Pu Speaker, chubakah chuan wind energy chungchangte pawh kan han sawilang a. Kan Chief Minister zahawm tak khan a sawilang tawh bawk a. Hmuifang tlangah te, Lunglei bulah Sairep tlangah te pawh bul lo tan tawh a ni a, Sorkar-na an neih hmasakah khan. Chuvangin Pu Speaker, a tawp ber dawttuah chuan kan Chief Minister zahawm tak leh Congress Party hian Mizorama Power hnianghnar leh kan intodelhna tur atan hian hma a van lo la nasa em, tih hi, vawiina Department Statistic leh a taka awm atang hian a tarlan theihin ka hria a. Chuvangin lo Sorkar tlang zel pheii se chuan tunah hian Power lamah pawh kan intodelh ngeiin ka ring a. Amaherawh chu ruahmanna awmsa te pawh tihpamtul a ni thin te hi a pawii hlein ka hria a. Chu chu vawiinah hian ka han tarlan theih tlangpui a ni a.

Sawi tur tam tak a awm ang a, kan sawi seng lo ah ngai ta ila. Pu Speaker, ka Resolution Ram hmasawna bul Power kan intodelh theihna tura sorkar hmalakna te hi lawmawm tham, ropui tham niin ka hria a. Chuvangin he House zahawm tak hian a lawmawm zia te hi min pawmpui a, min pass pui turin memberte ka han sawm a ni. Ka lawm e.



**S P E A K E R** : A move tuin a move thiam bawk a, a ngaihnaawm hle mai a. Kan ban thlengin a sawi mai dawn emaw ka ti tawh a. Pu T.T. Zothansanga sawi turin i lo sawm ang, minute 10 sawi tum lo u la, dar 4 ah chuan ka tin pui dawn che u a nia. Vote la lovin kan tin mai ang.

**Pu T.T. ZOTHANSANGA** : Pu Speaker, ka lawm e. Hei, vawiin nia kan Resolution hi lawmna lam thil a ni a, lawmawm ka ti khawp mai a. Vawiina kan thil buaipui hi Pathian thilsiam hmasa berte zing a mi a ni a. Genesis Bung 1:3 ah chuan 'Pathian in ENG lo awm rawh se' a ti a. Kha eng kha vawiinah hian kan la buaipui a ni. Eng nei tur hian Mizoramin hma an la thin a. Amaherawh chu a lo chingpen thin karah vawiin niah hian lawmthu sawi nawn lehna remchang kan han nei a ni a, Eden parmawi chul hnu kan han tivul leh dawn a ni.

Pu Speaker, nimin chanchinbuah khan a chhuak a, i phalna in ka han chhiar ange, Ex-MLA pakhat Zotlang a miin a ziah a ni a, 'compensation uchuak vangin Hydro-electric Power hluihlawn' tih kha Zozam chanchinbuin niminah a rawn chhuah a. A chhanah chuan – pakhatnaah Miten an ngaihbel theih turin Chief Minister chhungkua te hi an rawn tilang a, a chhan dangah chuan Forest Department-in compensation nuai 28 an la a, ram neitute an pe leh duh si lova, chumi avang chuan an buai a, chumi avanga hluihlawn ang deuh chuan rawn tarlan a ni a.

Tin, a pahnihaah chuan a pumpui atang khan 2.87% kha compensation a ni a. Chuvangin hluihlawna chhan chhuanlam engmah a awm lo tiin helaiah hian a rawn sawi a. Chanchinbua a rawn sawi zui dan hi chuan 'a thawktute an corrupt vang a ni' a ti a. NEEPCO hotuten an eiru nasa angin chanchinbuah hian rawn chhuah a ni a. Tin, chumai bakah ram neitute aiin a thawktute an hlawk daih zawk a ni, ti ang zawngin helai chanchinbu nimin chhuakah hian a rawn chhuah a. Hei hi mipui hruaisual thei tak thil a nih avangin tlema rawn sawifiah ka duh a, nichin khan tha deuhin a rawn move a. Tuirial Hydel compensation chungchangah hian mitin maiin kan hriat tlanglawn a ni. Engemaw hun lai phei kha chuan nau pawtute thlengin kan hriat vek mai kha a ni a, engemaw hun lai phei kha chuan. Chuvangin helaia mi rilru hruai kawi thei ang deuh hlek zawnga thil a rawn awm takah chuan tlem han sawifel ka duh a.

Hei an inremna atangin kan sawi mai ang a. Ni 3.3.1997 khan Notification chhuah a ni a, tuikhuah a nih dawn avangin tumahin ram patta neih loh tur a ni an ti a. Ram patta nei sa kha an han verify a, chhungkaw 48 an ni. Tin, foundation 1998 a phun hian crore 368.72-a zawh tura ruahman kha a ni. Tichuan hun a lo kal a, kum 1998 ah Sorkar a inthlak a, Sorkar a lo inthlak khan bawhzui a ni ta lo a. Kum 2001 August Ni 20 thleng khan Sorkar kha a ngawi ta vang vang mai a, engmah a ti lo anga ngaih a ni. Hetah hian ka rilrua awm chu kan Home Minister hmasa khan, "1998-a kan han Sorkar zet kha chu kum 2 vel kha engmah hi kan hre lova, kan then mai mai a ni", a ti a ni. Amaherawhchu, a then kha an lo then mai mai miah lova, khalai kar chhungah

khan patta an lo siam deuh char char mai kha a lo ni a. August Ni 20 ah Notification an han chhuah nawn a, chutah chuan Tuirial rama compensation dawng thei chhungkua 1026 zet an lo awm tawh a ni, a then chu an thu mai mai lo a nih chu. Tichuan agreement siam laia compensation tur kha cheng nuai 431 a nih lain notification hnuhnung a lo chhuah meuh kha chuan cheng nuai 4747.43 kha compensation tur kha a lo ni ta daih mai a ni, 'en hmaih a la awm e' an ti a. Ka sawi thiam zawngin kan sawi ang a, cheng za note cheng nuaikhat hi kg 1 a ni tunah hian. Tichuan chutianga kan han chhut chuan a cheng za note-in helaiah hian han dah ta ruih mai ila, qtls. 43 vel kha compensation tur kha a ni ta a ni, a quintal zawngin ka'n sawi a, qtls. 43 leh kg 66 kha compensation turah khan a awm dawn ta a ni. Tichuan khatianga a lo tam takah khan han in pek mai te pawh a lo harsa ve a niang, August Ni 1-12, 2003 ah khan total band te kha an han buatsaih a, chutah chuan tlem chu an han nawr chhuak a. Amaherawhchu, an duh ang kha a lo ni chiah lo a niang, June ni 9, 2004 atangin August ni 13, 2004 thleng khan total band kha an han nei leh a, khalaiah khan a titute pawh an mangang deuh a niang, ni 12.8.2004 ah phei kha chuan no further expenditure to be incurred a rawn ti ta a ni, expenditure dang kha engmah vawm luh tawh loh tur an rawn ti ta a ni. Tichuan hnathawktute kha danbeh an ni a, NEEPCO a in withdraw a, a hnathawk 95 te pawh kha an sawn a, bungrua kha an veng ta mai mai a ni, kha kha tawite in ka'n sawi duh a ni.

Tin, Saipum bik chungchangah tlem han sawi duh ka neih chu compensation la tur kha mi 152 an ni a, chuta 57 te chu lak dawn chauha rawn lang an ni. Tin, an ram te kha a awmna lai an hre lo reng reng a ni, mipuite khan an rawn ti a ni. Khual khua atanga ram nei ten an dawng hnem lutuk a, chuvang chuan an lungte kha a awi lo nghe nghe a ni. Chu laiah chuan tlema han sawi ka duh chu ram neitu Pu Lalrivunga chuan bigha 15 atan  $\square$  1300 a dawng a, tin, F. Laldawngliana Saipum chuan bigha 15 atan  $\square$  1150 a dawng bawka. Tin, Pu Rualthanchhinga, Saipum chuan Biga 15 atan  $\square$  2500/- Lalnundanga Saipum ami chuan Biga 15  $\square$  4320/-. Chutih lai chuan khual khua atanga ram rawn nei, compensation dawngte kha chu lakh pati vek an ni. Cheng nuai 7 atanga cheng nuai 12 an dawng deuh vek a, tichuan mi 152 in an dawn tur chu vaibelchhe nga, nuai sawmsarih pasarih zet kha a ni. Chuta tang chuan Saipuma In 95 khan 24.8% an dawng a, tichuan mi thar tute nge an nih hriat loh, khulai hmuna in lo ram an neih leh neih loh an va hriat tawh loh mihringte khan cheng vaibelchhe 4 leh nuai 34, 75 point something kha an la dawng daih mai a ni. Tichuan a difference a chu a awmzia kan hriathiam dan tur zawngin, thingrem pakhat vaibelchhe khat dah ta sela, thingrem pali an keng phei a, thingrem pakhat an va sem zo a; thingrem pathum an hawn leh a ni, chu chu kan hriathiam theih dan a ni ang. Tin, chutih laia pawimawh deuh mai chu, anmahni hming kha a lang lo khawp mai a, a ram neitute kha mi hming aia tih deuh vek mai kha a lo ni a, khulai a kha a pawimawh lai tak a ni. Aizawl Electric Venga mi 5 in an dawn zawng zawng hi nuai 53 a ni a, Durtlang Leitana miin an dawn zawng zawng hi nuai 111 chuang, tin, Champhai pawn kan lo dawng ve tho mai, 38 lakh vel chu. Khang vel kha a ni a, chuvang chuan vawiin nia kan ti thar leh hi a lawmawm dang ve riau mai a.

Tin, ka'n sawi leh duh chu Tuirial Crop Compensation Association hovin an dawn lai khan Durtlang atanga address nei ho khan pakhatmah a hmunah an lo kal lo a, kan Chief Minister hmasa nau khan a dawn sak vek a ni. Chumai chu a la nilo a, saw lai Saipum hotute kha an tha a na tlat mai a, "Kan dawn hi a tlem lutuk si a, kan dawn a in tam hleih em mai", an ti a, an lung a awi lo a; kan Chief Minister hmasa nau khan an lung dam nan 3% kha a sih hek sak leh a ni. Kha kha thil awmdan a ni a, a mak ang reng khawp mai a.

Tin, N. Hlimenah pawh kum 2001-2002 kum tirah khan kan hotute thenkhat, kan Minister Electric Venga mite an lo va kal a, tin, Electric Veng lam mite an lo va hruai a, khatiang khan V/C pass lem, V/C pass blank paper-a V/C seal chhut leh hming sign panga an hawn a, khatiang khan an kalpui a ni a. Chutah chuan kan Minister chu Vartian magazine editor khan a interview naah ram a neih leh neih loh a zawt a, N. Hlimenah ram a neih loh thu a sawi bawk a ni. Chu chu tawitein ka'n sawi a ni.

Vawiin niah hetiang lawmthu sawi thei a kan han kal leh ta hi a lawmawm hranpa khawp mai a. Eng hi kan mamawh a, Mizoram hmasawna bulthut tak tak tur a ni tih kan hria a, chawhmaah khan kan Member zahawm tak Pu Lalthansanga khan, "Power hi kan atchilh a ni e", a ti a, an atchilh a ni reng reng lova, an finchilh a ni. Tunah hian Zoram hi power atang hian kan ding chhuak leh thei tih kan hria a, kan move-tu zahawm tak khan a rawn sawi a, nakin hnuah phei chuan kan revenue lakna tur ber a ni a. Chuvangin helai a resolution-a an rawn tih, 'ram hmasawna bul power kan intodelh theihna tura Sorkar hmalakna te hi lawmawm kan ti' a tih hi ka rawn thlawp a ni, ka lawm e.

**Pu P.P. THAWLA** : Pu Speaker, ka lawm e. Power chungchanga Sorkara lawmthu sawina tur resolution chungchang kan sawi dawn mek laia kan Speaker hnen atanga ka bial Palak Constituency chhunga power avanga thil thleng rapthlak tak mai chanchin report kan ngaihtlak kha rapthlak hlein ka hria a. Ngaithuahna lo awm thutah chuan a sun nan ka chhuak/hawng nghal mai dawn emaw chu aw ka ti a, lehlamah chuan chu em chu ni love, ka chhuak anga information te ka va la ang a, sawina hun remchang takte pawh a ni ang tih te pawh ka ngaihtuah a. Ka chhuak a, mahse line a chianguang lova, report dawn dan chianguang lo tak kan Speaker-in min rawn pek kha chianguang ber turah ngai ta ila, pakua thih thu kha chu a chiang a, a thenin sawm pakhat an ni te an ti a, chu chu chanchin a ni. Chuvangin Palak Constituency hi Mizoram Map kan en chuan Aizawl atanga tehin a hla ber bial kan ni a, Sorkar ngaihsak loh ber Constituency ti ila, a mawi lo lutuk ang em aw ka hre lova. Chutiang bial atanga helai lo thulut ve kha ka ni a.

Power chungchangah pawh hian ka phak ang tawk tawkin kum 7 dawn lai ka thut ve hnuah hian ka sawilang thin a, mahse a effective vak lote pawhin ka

hre thin a. Kawlchaw atanga va kalin New Serkawr kan thleng hmasa ber a, New Serkawr atanga a dawt leh chu New Latawh a ni a. Chumite khaw pahnih inkar New Serkawr atanga hla vak lovah hian Pu Pauka Mini Bus service ah khan kawnga electric hrui inzam khan a man a, chutah chuan Lawngban mi 4 an thi tih a chiang a, Maisa atangin 2 an thi tih a chiang a, Lohry 1 leh Bymari 1 tih thleng kha kan hriat chian theih chin a ni a, a piah lam erawh chu line te a clear loh em avangin hriat chian theih loh a ni. Chuvang chuan Power chungchanga Sorkar hmalakna lawmthu sawi resolution kan hmuh mek laia power avanga tuarna rapthlak tak mai, khuti lai bial rethei tak leh mi khawsa ho pawh rethei bawh si te ina thihna an lo tawh ta hi a rapthlak hlein ka hria a, Sorkar tan pawh a mualpho thlak bawkin ka hria. Mimal han in puh bik tur chu a ni lovang a, mahse Sorkar kal lai hi mawhphurhna chelh mek lai a nih avangin heng hi thil rapthlak tak mai, he resolution hi a tha emaw a tha lo emaw, ka tan pheih chuan lawmthu sawi hi thlawp harsat tak hun, tunah hian kan thleng ta niin ka hria a. Chuvang chuan Pu Speaker, hei hi pawh ka ti em em a, thi zawng zawng pawh rilru leh tihtakzetin ka tuarpuaia, ka bial chung mite an ni bawh nen chuvang chuan he House zahawm takah hian mithi ta te ka uiin pawh ka, an chhungkua pawh thinlung takin ka tuarpui a ni tih kha ka sawi lang hmasa duh a. A dawtah chuan Sorkarin an phu tawh a tam thei ang berin lukhawng min pek sak hram rawh se, tih pawh ka'n ngen bawh a ni.

Pu Speaker, resolution lamah khan kal ta ila, 'Ram hmasawanna tur atana Power kan intodelh theihna tur atana Sorkar hmalaknate hi lawmawm kan ti' tih hi Resolution-a a inziah dan a ni a, a chianguang lo hle a, lawmthu han sawi dan tur pawh a chianguang lo hlein ka hria. Keima rilruah chuan Power kan han sawi dawn hian MLA zahawm tak Brig. T. Sailo, Chief Minister a nih a Sorkarna a chan lai khan power lampang hi thingtlang mite pawhin kan lo hre tan ta in ka hria a. Tichuan anin term khat a hmang zo a, chumi dawt ah chuan Congress in tum 3 a zawnin Sorkarna la chhonzawmin kum 13 chuang hret a ni awm e, chutiang chuan a kal a. Tichuan State ah te kan in hlangkai a, tlai khaw hnuah MNF kum 10 an Sorkar bawh a, chutiang chuan kan Zoram rorelna hi kalpui a ni. He Resolution kan han en hian a tu ber Sorkar hnenah hian nge lawmthu han sawi tur ni ang le tih te pawh chu hriat a har hle in ka hria a. Amaherawhchu, tunah Congress Sorkar lai a nih avangin he Sorkar a tihna nge ni ang tih te min ngaihtuah tir a. Hmasawanna bul power kan intodelh theihna tura tun Sorkar kal lai hmalakna te hi lawmawm kan ti tih emaw a ni law law bawh si lo. Tin, lawmthu sawina tur chhan point ah clear taka inziak a awm bawh siloh chuan hei hi tu party sorkar lai ber kha nge lawmthu kan pass sak ang le tih pawh chu a chianguang lo hle in ka hria a. Chuvang chuan Pu Speaker, Saiha District chhungah 1995 hma vel khan Saiha leh Lawngtlai inkarah Tuisumpui ah khan Hydro project te tak te siam a ni a. Kum 1995 ah hawn a ni a, chhiatna rapthlak thlengin a ti chhe vek a, a ruang pawh chhar tlak awm lovin a chhe vek a. Tin, Tuipanglui Hydel Project pawh kha Palak Constituency-ah tho ropui takin bul tan a ni a, a kal a kal a, kum 2004 nge 2005 zawk ka hre chiang lo, MNF Sorkar lai khan Commission a ni a. Amaherawhchu, hemi hi a tira Mega watt chhuak tur zat ang te ngaihtuahin a chhuanawm lo hle in ka hria a. Contractor te ho fel loh nge ni hemi a bill

tute fel loh nge ni tih pawh hriat mang lohvin mumal lo takin commission a ni a. Hei pawh hi anih tur ang anih mai loh bakah Case nei an awm thu te pawh chanchinbuah ka lo hmu a. Dik maw, dik lo maw ? Chutiang te chu a ni a. Vawiin niah hian Power lama hmasawna tur atan leh ram intodelhna tur atana hmalakna ah hian lawmthu sawi tur hian he Sorkar kal lai mekah hian lawmthu han sawi na em em tur chhan a awm bik pawhin ka hre lem lo.

Amaherawhchu sorkar lo siam tawh zawng zawngte chungah lawmthu sawi ang u tih te a nih law law chuan hnial thu a awm bik pawhin ka hre lova. Chuvang chuanin Pu Speaker, he resolution hi chu a chiang tawk lo em mai a. Session leh atana chiang zawka ziah a, thehluh leh atan atha mai zawk lawm ni ? tuntum ah hian chuan pass lovin dahtha rih mai ila, ava tha awm em, ka ti a ni. Pu Speaker, ka lawm e.

**Pu ZODINTLUANGA, MINISTER:** Pu Speaker, ka lawm e. Sorkar hmasa a kan hotute khan ‘kum 2 chhungin engmah kan thawk hman lova, in chibai nan hun kan hmangral mai a ni’ an tih thin kha kan hre thin a, vawiin niah kum 2 Pu Lal Thanhawla kaihhruai Sorkar an kal a, a hmalakna chi hrang hrang bakah Power bika Sorkar hmalakna he House-a lawmthu sawina resolution a rawn lut thei hi a in ropui hleih hle in ka hria a.

Kan resolution kha keipawh a wording kha ka lo ngaih pawimawh lai a awm ve a, ‘Ram hmasawna bul, Power kan intodelh theihna tura sorkar hmalakna te’ tih hi ‘kan intodelh theihna tura Congress Sorkar hmalakna te hi lawmawm kan ti’ tih ni thei sela, a tha in ka hria. Nichin khan kan hma lawk ah Palak bialtu MLA zahawm tak in a sawi a. Pu Speaker, Congress Party a Sorkar hian Power lamah hian tuin nge hma la tih hi vawiin nia Zoram mipui hian kan hriatthiam a tul tawh hlein ka hria. P.C-in power kan atchilh an tih hian nichinah a Mover khan a sawi tawh a, an Sorkar kum sarikh chhung khan Power Project Megha Watt 1.5 pahnih bul an tan ve a ni. Chumi piah lamah chuan power an tiha hi thuneihna power nge an atchilh electric power tih pawh hi zawhna tham a niin ka hria. A chhan chu P.C. Sorkar kum sarikh an Sorkar chhung khan power lamah hian hmasawna leh hmalakna an neih hriat a ni lova, an sawi lar ber thin Bairabi Hydrel Project lah kha vawiin niah hian insawi chian deuh tulin ka hria. Kum 1982-ah DPR siam tantir a ni a, a tawi zawngin sawi ila Pu Speaker, hun a tam lo si a. Kum 1984-ah DPR kha rawn thehluh a ni. Khatah khan Congress Sorkar Pu Lal Thanhawla kaihhruai Sorkar chuan theitawp chhuahin kha DPR hmang khan Central Electricity Authority te, Central Water Commission-ah te clearance chi hrang hrang lak tumin nasa takin an bei a ni. Amaherawhchu, kha DPR-ah khan tihfel loh tam tak a awm avangin clearance an hmu thei lo va. Chutih chhungin kum 1987-ah MNF Sorkar Pu Laldenga kaihhruai Sorkar a lo ding leh a, chu Sorkar pawh chuan Pu Speaker, he DPR PC Sorkarin an siam kha bawhzuiin theitawp an chhuah ve a. Amaherawhchu an puitlin thei lo. Engvanga puitlin thei lo nge kan tih chuan kha PC Sorkar Pu Thenphunga Sorkarina DPR an siam an thehluhah khan DPR Volume I-na forwarding an ziah pheik khatna para-5 naah khan ti hian a in ziaik, Pu Speaker ka quote min lo phal sak la. ‘The feasibility report has been prepared on the basis of field investigation which were completed in a report period of

eight working months during 1982-1983. Despite of a number of hurdle in time of communication, climatic conditions, remoteness of area and insurgency' a ti a ni, Pu Speaker hetiang ang Project lian hi thla riat chhunga peih mai mai chi a ni lo. Tin, a detail project volume chapter 1 pheik 12 naah khan para 2 naah hetiang hian a in ziaak leh a, 'Field investigation to arrive at the techno economic feasibility report of this project to be started in February 1982 and were completed within 8 working months in April - May 1983 inspite of the difficulty which are unique to the areas' a ti a.

DPR ah khan Pu Speaker thlariat chhung in an tan a, a tak takin a hmunah an kalpui lova, dawhkan atangin political consumption atan mai an ti a ni tih a chiang em em a ni. Hetiang ang project lian Bairabi Hydrel project ang te chu Pu Speaker, a chhe berah kumnga investigation tih a ngai. Thalvaekchar lai berin tui kumkhat mai nilo kumli kumnga chhung tui a tlem zawng te furtui len lai berin engchenge a chim tih te tuilianin lei a tih min ang chi te, chutiang chu tih a ngai a ni. Hetianga dawhkan mai mai atanga DPR siam a Mizoram mipui hnena power kan atchilh a ni tih hi sawi chi ah ka ngai lo a ni.

Pu Speaker, Congress a lo Sorkar leh a hetiang DPR hi bawhzui tlak a nih loh avangin kum 1995-96 ah Pu Lal Thanhawla kaihhruai Sorkar bawh in hma a rawn la leh a. Chutah chuan Brahmaputra Board investigation titha leh turin an ti a, ka la hriatreng chu Pu Speaker keini pawh politics ah kan lo tui ve tawh a, House Proceeding te pawh ngaihnam kan tiin session te pawh hmuhnam kan ti thin. Kan Power Minister Pu C.L.Rualan DPR Brahmaputra Board an tih tir leh thu a puan ni te khan opposition lama kan hotute khan engtingge an tih kha proceeding a inziak dan chuan, 'Brahmaputra Board te hi hetiang ang DPR siamtir theih a nilo, tuilian danna mai mai a ni' tiin he House ah ngei an chhuahchhal a nih kha. Ama'rawhchu, Pu Speaker, vawiin niah document a lang chiang em em chu kum 2000 ah MNF a lo Sorkar a, Congress Sorkarin DPR felfai tak, uluk taka a siamtir chu MNF Sorkar thar hnenah State Guest House ah an hlan ta a nih kha. Kumnga chhunga uluk taka an tih chu an vannei a niang khatih laia kan Forest Minister zahawm tak vawiin nia Lunglei West bialtu MLA Forest Minister a nih lain Forest clearance awlsam te in an la a, clearance chi hrang hrangte pawh an la chho ta a nih kha. Ama'rawhchu, khami kum 2000 hnuah hmalak chhunzawm lehna a awm ta lo a ni. Chuvang chuan Pu Speaker nichina Palak bialtu ina a rawn sawi eng party nge a Sorkarin tu Sorkar hian nge power ah hian hma la le tih hi point khatah rawn sawi ka duh a. Congress Sorkar hmasa hun lai khan power lian tham investigation tih chhungte a rei a, a project tih chhungte a rei a, State Sorkarin a tih ve theih 3 megawatt chin kha kan lo ti ve tlah tlah a. Mizorama lui awm zawng zawng chu investigation tih leh hmalak loh hi a awm tawh mang lo a ni. Nichina kan sawi Kau-Tlabung te, Tuipang lui te, Vawra lui te, Ramri lui, Teirei small Hydrel Project, Tuirivang te, lui te zawng zawng Sorkarin a tih theih chin kha a lian nghah nan khan kan Sorkar khan hma a la vek a ni.

Nichina kan mover-in a rawn sawi tawh, eng Sorkarin nge an Sorkar lain hma la? Sorkar hmasa MNF Sorkar lai khan eng angin nge hma an lak? Tuirial Hydel Project 60 Mw pe chhuak thei Sorkar hmasa kan Chief Minister zahawm takin a lungphum a phum tawh, kum 2006-a zo tawh tura hmalak tawh te kha. Nichina Champhai bialtu zahawm takin a rawn sawi ang khan compensation dik lo taka an lak avanga pamtul a nih te kha a uihawm em em a ni. Sorkar dang chuan power kan neih theihna tur atan hma an la, kha Sorkar kha chuan Pu Speaker, power kan neih lohna tur atan hma an la a ni. Hmanni lawka Aizawl khawpui chhunga Mombati an sem te kha a zahthlak ka ti khawp mai, khang Mombati an sem te kha compensation dik lo taka an lak atang khan an lei em ni? Tuirial Hydel Project a hlawhtlin lohna tur atana Pu Speaker, khawvela total band rei ber ni 90 chuang a awm thei te kha Sorkar tha power a awm theihna tur atan kan ring thei em?

Chuvangin Pu Speaker, vawiina kan resolution, ram hmasawna bul power kan intodelh theihna tur atana Congress Sorkar-in hma an lak thin te hi ka rawn support a, vawiin niah 'Congress a Sorkarin mombati sem a ngai, kan tih ang chi te kha Congress Sorkar ina Tuirial Hedel Project, 60 Mw pe chhuak thei ruahmanna a neih te kha tih tak takna thinlung leh corruption rilru tel lovin lo puitling sela chuan vawiin niah Mizoram ina power kan mamawh hi 65 Mw bak a tling lo, kum 2006 ah khan khang kha zo tawh tur kan ni. Vawiin niah hian Mizoram hi chu duhthusama power intodelh thei tur kan ni a, chuvang chuan Pu Speaker, kan resolution Pu Joseph Lalhimpuia rawn putlul hi ka rawn thlawp a ni tih kha ka rawn sawi ve a ni e. Ka lawm e.

**Pu LALTHANSANGA** : Pu Speaker, ka lawm e. Resolution kan sawite hian party dang kan sawi nasa hle mai a, hei hi House ah hian kan chin dan thin a ni chho ang tih ka hlau em mai a. Tin, PC Sorkar a lo din khan kan ramah hian power lamah kan pa chhe hle tih hriain PWD hnuai atangin hma a lo la chho a, 1980 chho atang khan, nang te, Pu JH Rothuama te, Pu Rina te pawh hian an hre chiang a ni. A chhan chu 1980 atangin Bairabi Hydel Project Investigation tan niin 1982 ah ABA Konikhan Choudhury khan a foundation kha a lay chauh a, tuna an rawn sawi portion lai phei kha chu a hnuai khuahna tur kha a dawl ang em? tih kha, monsoon lo thlen hmaa tih zawh tur atana khami kha within 8 months-a an zawh a ni. Khati lai portion a kha an rawn sawi mai a ni, a whole investigation DPR ah khan chutiang chu a awm lo. Chandra Sekhara pawh khan a rawn tlawh a ni. Khamia kan Central Minister-in a rawn sawi kha, 'Brig. T. Sailoa ang hi India ramah hian Chief Minister ni vek se chu India ram chu khawvela hmasawn ber kan ni ang' tih kha a remark a ni. a lehkhabu pawh vawiin niah hian kan sawi hman lo turah ka ngai a, ka rawn keng lo a ni. Chutiang khawp chuan Pu Speaker, hemi chungchangah hi chuan kan ti a, mahse vawiin niah hian ka lawm hle a ni. I dinglama thute hi lawmthu ka hrilh duh a, tun hmaa in ngaihdan in rawn thlak a, hmasawna bulpui ber chu Power a ni tih, in ka atanga kan han hre fo mai hi a lawmawm ka ti a. Chuvangin kan pu Brig.

T. Sailova chungah pawh hian lawmthu ka'n sawi duh a, party aiawh pawhin lawmthu ka sawi bawk a ni. In hmalakna tam takte hi a ropui ka ti a, non-conventional energy atangin, chutah lo kal chho zelin khawvelah renewable energy hi rawn ngai pawimawhin, India ramah hemi hi Department hranin a lo awm a, kum 1980 atangin 1992 ah, khatiangin hemi hi lo awm chhovin India ramah hian chutiang taka hma a rawn lakna chu a lawmawm ka ti a.

Tin, kan hun laia achievement lawmawm tak chu Palak bialtu zahawm tak khan chulai hmuna mi chu a len bo e a ti a, Serlui saw va en teh u, an la tuai hlawm bawk a, in la hmu lo a niang e. Saw saw PC Sorkar ina Central-in enchhin tura min tih a ni. Saw saw Small Hydro Project a ni a, 3 Mw an phal lai a ni a. Tunah chuan Small Hydro Project pawh hi 25 Mw thleng tih a ni tawh a, Mizoramah hian 190 Mw Small Hydro Project ah hian siam chhuah theih a nih rual hian 30 Mw emaw chauh hi vawiin niah hian kan la ti chhuak a. A dang hi medium leh large ah pawh hian 2000 Mw chuang kan tih theih laia vawiin niah hian kan kal dan hi Pu Speaker, lawmthu ringawt mai helaiah hian ka sawi ang tih ka hlau a. A taka hmuh theih ni sela, a takin hei hi Zoram mipuiin chhawr ngei ila tih kha ka sawi duh a ni.

Tin, kan atchilh leh vei em em hman atanga tuna Ruling party-in min han sawina lai hi keini chuan kan ti mai a. 'YMA no ang' min tih pawh hian kan pawm mai zel a ni. Amaherawhchu, kan thil tum hi kan Chiang a, mihring nun bul 6 kan tihte zinga pawimawh bera kan dah chungchanga lawmthu sawina, a bika tun Sorkar tih pawh tel lova a mover-in a rawn ti hi a lawmawm hlei hleiin ka hria a. Tun Sorkar tih chu ni sela, 'ngawi teh u dah rih mai teh ang u', tih kha a chakawm a. Pu Speaker, lawmthu sawina a tih ringawt avang hian he resolution hi ka pawmpui a ni tih ka sawi duh a ni e. Hun min pek avangin ka lawm e.

**Pu LALDUHOMA** : Pu Speaker, kan mover-in a move dan kha a convincing-in a ngaihnaawm hranpa hrim hrim mai. Kan zingah a la thalai zawk te, lekhathiam zawk legislator kan nei hi ram tan hian a lawmawm ka ti a. A move tha em em mai a, a mimal tak pawhin lawmthu ka sawi a ni.

Tin, UT ah hian kum 14 kan awm tawh a, State ah kum 25, kum 39 Sorkar kan nei ve ta a, kum 39 chhunga kan ram anga potentiality tamna si ah hian overall achievement lak hian a lungawithlak loh kan ti tlangin ka hria a. Amaherawhchu, project lian reng reng hian hun hi a duh rei em mai a, Bairabi Project kha kan sawi lar bawk a, practical-a ka hriat ve ka'n sawi ang a. MP ka nih lai khan clearance lak a ngai a, Prime Minister hnenah ka thlen a, Ministry pakhatin kum tam tak chhung clearance tur ringawt pawh an khel a. Heng Ministry zawng zawng clearance pek turte hi Committee min siam sak la, mi pakhat Chairman-na hnuaiah a rual hian Committee thin sela, tichuan clearance hi min pe hma thei deuh ang a tiin ka nawr ve a. Chutiang Committee chu din a ni ta nghe nghe a. AC Das-a Silchara kan Commissioner thin kha Chairman a ni



a, khatih lai khan clearance kan buaipui a ni tih kha practical-a ka hriat a ni a, ka'n sawi ve duh a ni.

Tin, project chungchangah DPR te kan ti a, investigation engkim kan zawh tawh hnuah hian rei tak clearance nei turin hun a duh a. An clear tawh hnuah hian kan khuap mai dawn tawh emaw tia kan inzirtir thin hi chu a dik lo deuh hlek a ni. A taka ka hriat chu Andhra Pradesh ah khuan clearance pek vek tawh kum 20 chuang pending (khuah loh) an neih avangin lungawilohna an entir a, an MLA zawng zawng leh an MP zawng zawng Delhi ah an rawn chho a, Prime Minister in ah luh luih an tum a, kawng zan zawh a, hliam te pawh an tuar a ni. 5<sup>th</sup> Year Plan-a kal kan ni a, chumia kan inkhung hman loh phei chuan a lehpek nghah te a ngai a, a kal mekah chuan token provision chauh min pe thei emaw te a lo ni a. Chuvangin project lian hi chu engkim a fel hnu pawh hian kan khuap thei nghal tihna a la ni chuang lova, hengte hi ka'n sawilang ve duh hrim hrim a ni.

Tin, kan ram hruaitu hrang hrangin bul an tan a, thenkhatin a bul an tan lai chuan ram te a buai a, communication te a chhia a, chuti chung chungah theih tawp an lo chhuah avangin a lawmawm vek a ni. A bik takin Brig. T. Sailo Power lama a tui zia leh thahnem a ngaih zia hi kan sawi te turah ka ngai lova. A hun laia boruak kha a chhah em mai a, tun ang huna boruak zalena te hian nise chak leh zualin PPP mode tih zung zung theiha a awm chinah phei chuan han awm ve se, chak takin min kalpui ang tih ka ring a ni. Mi tam tak tui taka a siam thei pawh kha kan tluk lo ka ti hrim hrim a. Pa pakhatin fiamthuin 'PC chu kan thih hunah direct-in vanramah kan kal mai lova, Bairabi kan tlawh hmasa phawt thin' a ti a. Khatiang khawpa mi a convince thei pawh kha tlukloh rimnam a ni a, a tui chilh tak tak a, mahni atanga tui tak takna a awm loh hi chuan midang convince theihna hi a awm thin lo, chuvang chuan a ropui ka ti a ni.

A chang hi chuan kan hmalakna lawmawm lo lam te pawh hi a awm thin a, hmanni lawkah Tuirial Hydel Project kan tih tlawlh dan chungchanga he House-a Zero Hour puluttu kha ka ni a. Khangte kha a pawl ka ti a, tin, Bairabi-a kan thermal vaibelchhe tam tak senga kan siam 22 Mw lai pe chhuak thei tur si, chhit pawh kan chhit ngam loh, to lutuk kan chhit tam poh leh kan chawi tam tura kan chhuah te pawh kha, kan thalai rualte pawh an mangang a, a hmunah kan tlawh tir a, tiang anga project lian kan tipamtul thin hi a vanduaithlak ka ti a ni. Engpawh nise, tun Sorkarah hian kum 2 emaw chhunga hma an lakna te kan ngaithla a, hun reilote chhunga hmalakna atan chuan a lawmawm thawkhat hlein ka hria. Pathian thuin 'in hrehawmnaah pawh lawm rawh u' min ti a, chuvang chuan lawmthu sawi hi chu hreh turah ka ngai lo a ni. Kan ngaihthlak tak ang khan eng hna pawh hi bul han tan ila 13% bak hi a thlawna kan dawn tur a awm chuang lova, tu bul lo tan a ni emaw inlalawn zela kal kan ni a, kan inlawmpui thiam a kan inpuihtawn thiam zel hi kan ram tan a tha a ni. Chuvangin kan resolution hi thil lawmawm lam a ni a, thlawp dial dial

ila, tha tak leh lungrual takin pass leh ila a thain ka hria a, ka support ve a ni e.

**S P E A K E R** : Awle, tunah Pu Joseph Lalhimpuia a resolution neitu i lo sawm ang.

**Pu JOSEPH LALHIMPUIA:** Pu Speaker, ka lawm e. Hun a chep deuh chung pawhin sawi chak tam tak Member zahawm tak takte zingah an awm a, Member 5 lain an sawi baw a, an sawidan pawh kha a lawmawm hlein ka hre baw a, an hnenah leh Member dangte hnenah pawh lawmthu ka sawi a ni. Thui tak ka sawi tawh lovang a, thil pahnih/pathum chauh tarlan duh ka nei a. Pakhatnaah chuan kan MLA zahawm tak Pu Thawla-in a sawi ang khan a bialah vanduinawna taw a, paw ka tiin ka tuarpui hle a ni tih kha ka sawi duh a ni.

A pahnihnaah chuan mipuiin power vei ber leh anmahni pawhin vei ber anga inngai PC party atang pawha kan Chief Minister hmalakna tea lawmthu an sawi te pawh hi a lawmawmin ka hria a. A tir lama ka sawi ang khan party dang sawiselna emaw mahni party fak tumna emaw kha ka nei hran lo. Amaherawhchu, facts finding records te hi mipuite hian hria sela, tunge ni power lo siam thin tunge hma la thin tih thudik tarlan hi a thain ka hriain ka hria a, chu chu ka'n sawinawn leh duh a ni.

Tin, resolution wording chungchangte kan sawi a, kan chiang thawkhat vek chuan ka hria a. Kan Sorkar hmalakna kum a la rei lova, chutichung chuan theihtawp chhuahin kan hotupa ber kan Chief Minister zahawm takin thahnem a ngai baw a, hmasawna ropui tak kan neih avangin lawmthu ka sawinawn leh duh a ni.

Awle, Pu Speaker, vawiina ka resolution rawn putluh 'ram hmasawna bul power-a kan intodelh theihna tura Sorkar hmalaknate hi lawmawm kan ti' tih resolution hi he House zahawm taka Member zahawm takte hian min support a, min pass pui turin ka rawn sawm e. Ka lawm e.

**S P E A K E R** : Awle, resolution neituin adopt a rawn dil a, tunah kan buk ang a, remti apiangin 'remti' ti rawh u le, remtilo kan awm chuan 'remtilo' ti rawh u le. Awle, remtilo an awm lo maw. Pu Joseph Lalhimpuia resolution 'Ram hmasawna bul power-a kan intodelh theihna tura Sorkar hmalaknate hi lawmawm kan ti' tih chu House-in lungrual takin a adopt ta a ni. (Pu Joseph Lalhimpuia : Pu Speaker, ka lawm e)

Vawiin atana a kan business chu kan lo zo ta a, kan chawl tawh ang a, ni 26 Inrinni leh 27 Pathianni-te hi kan chawl ang a, ni 28<sup>th</sup> March, 2011, Thawhtanni zing dar 10:30 ah kan thukhawm leh dawn nia.

Sitting adjourned at 4:11 PM